





Dwight.


Tunisia cork post lg. 237















VIRTUTE DUC


COMITE FORTUNA



55497

II





GLORIOSISSIMO ac INVICTISSIMO
VLADISLAO IV.
REGI POLONIAE, MAG: DV-
CI LITHVANIAE, RUSSIAE, PRUS-
SIAE, MASOVIAE, SAMOGITIAE, LI-
VONIAE, SMOLENSCIAE, SEVERIAE,
CZERNIHOVIÆQUE;

NEC NON

SVECORUM, GOTHORUM, VANDALO-
RUMQUE HÆREDITARIO REGI

Domino suo Clementissimo.

INVICTISSIME, POTENTISSIME REX

AB ultimis Germaniae oris,
qua, facto divortio, Rhenus,
in Batavorum Insula, Schen-
kij monumenta premit: qua medius
felices Cliviæ terras secat, &

Intonsus Vahalim babit Sicamber,

(2)

ad

DEDICATIO.

ad Regiæ Majestatis vestræ conspec-
tum navigo. Inter audaciam tamen
& verecundiam medius, ut qui à po-
pulo Mercurij Sacris prorsus dedica-
to, non exoticas à Madagascare aut
Moluccis merces, sed Heröica Maje-
statis vestræ gesta, in Poloniam veho.
Sed quæ malum, isthæc insolentia est?
Ignoscet Serenissime Rex: & quic-
quid hic presumptionis fuerit, eadem,
qua victis hostibus pepercisti, cle-
mentia condonabis. Tuum est quic-
quid hic peccatum, Tu causam & oc-
casione præbuisti. Insolentibus e-
nim tuis Victoriis Triumphisque,
omnium ad insolentiam animos,
qua-

DEDICATIO.

quaqua terrarum, commovisti: adeo
ut & virtutes tuas loquatur ultima
Thule, quæ olim etiam, cum in flore
esset Romanum Imperium ignoravit.
Et quid mirum? Cœpit hæc victoria-
rum tuarum fama, à primo adolescen-
tiæ tuæ crepusculo, & continuis tot
annorū triumphis, ad presentis gloriæ
splendorem adolevit. Honori Magno
Pompeio fuit, quod de Africa primo
& Iarba Rege juvenis & nondum Se-
nator triumpharit: Tu puer adhuc,
de habitantibus Asiæ & Europæ con-
tinentem Moscis, Pompeio Magno
ætate minor, gloria maior, triumpha-
sti; adeo etiam, ut eos, tibi Domino
fuo

DEDICATIO.

suo electo, tandem vertere terga co-
geres, cum flectere antea docuisses.
Inde attonitus Orbis duos adolescen-
tes, ætate propemodum pares, vix la-
nugine prima decoros, Te, & Osma-
num Turcarum Imperatorem, sep-
tingentis bellatorum millibus, & qua-
si generis humani viribus subnixum,
ad Tyram in Valachia æmulos pugi-
lesque vidit, & anxio in utramque
partem Mundo, calcata Othomanni-
ci nominis gloria, tot Te virtutibus su-
periorem ostendisti, quot Osmanide
millibus prævalebant. Et ipse Osma-
nus tandem, cladibus & ignominiosa
pace confusus, stolidæ præsumptioni
exi-

DEDICATIO.

exitio suo parentavit. Nondum Re-
gio Diademate cinctus eras, cum ini-
ta armorum societate, fœdifragus à
Septentrione Moscus, à Meridie Tur-
ca, Poloniæ latera infestarent. Tu in
medio positus, & erectus tamen sub
quolibet pondere, tunc maxime do-
cuisti terrarum Orbem, quid possit
in summo periculo summa virtus. Et
fœdifragos illos à Smolensci mænijs,
velut una manu abactos, eo tandem
desperationis adegisti, ut, inaudita ab
ullo sæculo felicitate, universus exer-
citus, qui jam nutu Tuo, aut vivebat,
aut moriebatur, ter genu flexo, cle-
mentiam tuam sollicitaret. Amura-
them

DEDICATIO.

them vero Turcarum Imperatorem,
sola, quis credat! adventus tuifama ad
arbitrium tuum humiliasti; cum vic-
tricum armorum tuorum fulmen a-
bominaretur. Borussia denique, cum
prælia minareris, sine sanguine & ve-
litatione, ab hostium manibus vendi-
cata, nominis tui terrorem ipsiſ litto-
ribus Sueciæ illisisti. Adeo ut superio-
rum Regum, & Magni Vitoldi termi-
nos victoriarum supergressus, jam,
Tu a iterum virtute, secure Vistula,
Berezina, Tyras, & Boristhenes navi-
getur. Maiore tua gloria quod nulla
unquam felicitate corruptus, omnia
in circuitu bella, clementia consum-
itordi māris,

DEDICATIO.

mâris. Sic ut libere gloriari pos-
sis, quod apud Senecâ (Lib: i. de clem:)
primo quinquennio suo, Ne-
ro Cæsar. In hac tanta facultate rerum non
ira me ad iniqua supplicia compulit, non juvenilis im-
petus, non temeritas hominum & contumacia, quæ
sæpe tranquillissimis pectoribus quoque patientiam
extorsit: non ipsa ostentandæ per terrores potentiae di-
ra, sed frequens magnis imperiis gloria. Conditum,
immo constrictum apud me ferrum est. Summa parsi-
monia etiam vilissimi sanguinis. Nemo non, cui alia
desint, hominis nomine apud me gratus est. Seve-
ritatem abditam, clementiam in promptu habeo.
Et hæc tua sunt, Gloriosissime
Rex, in limitibus Asiac Europæ-
que gesta, quæ utriusque ter-
minis nescia circumscribi, ada-
lios vagantur Mundos, & ibi
nominis tui gloriam famam-
): (que

DEDICATIO.

que spargunt, ubilatent potissima Christianitatis. Quid ergo? Quæ homines, quia non capiunt, passim admirantur, ego nefas non judicavi stupere Scripto: ut quæ singuli invicem ore referebant, ego calamo loquerer omnibus, & posteritati cruda proponerem, quæ nunquam bene digerat terrarum Orbis. Quia autem, Invictissime Rex, Tua erat, nec alibi, quem virtute Tua causaveras, generis humani stupor, nisi in animo Tuo solvi poterat, vela feci: ut Regie suæ Majestati offerrem, quæ sola

DEDICATIO.

sola capit, nec admiratur. Pan-
de itaque nunc, Serenissime
Rex, clementiæ & facilitatiſ tuæ
portum, &, ſicut exotica ple-
rumque ſapiunt, non quia opti-
ma, ſed peregrina; ita placeat
hic, in honorem Regie Tuæ Ma-
jestatis, fuſceptus labor, non
quia optimus, ſed peregrinus.

Sacra Regiae Tuæ Majestatis

humillimus ſervus

Everhardus Wassenbergius
Embricensis.

AD

AD CLARISSIMUM VIRUM
EVERHARDUM
WASSENBERGIUM

Invictissimi VLADISLAI IV.

Poloniæ Sueciæque Regis vitam
resq; gestas describentem.

Felicem Macedo præcone ferebat Achillem
Mæonide, tanta dignior ipse tuba.
Te quoque felicem præcone, ego censeo, Regem,
Sarmata quo gaudet, quem Sueonesque ti-
ment.
Nec minus ipse tamen felicem prædico te, cum
Suadæ materies obtigit ista tuæ.
Vivite longævi! Scribi à te digna gerat Rex;
Tu Rege à tanto scribito dignageri.

Surgentí ejus famæ applaudens
ludebat

M. R. H.

Ad

AD LECTOREM.

Non sum nescius, humanissime Lector, plurima
à glorioſiſſimo Rege Vladislao IV. geſta, quæ
ego non attigi: ſed, ingenuo fateor, neque cepi.
Et quis, rogo, ſufficiat omnibus? Extrema
quæque ē vulgaria ſcripsi, quæ ſic in partē tamen ē
libros valuerunt. Et hæc intentio mea fuit, quæ de hoc
glorioſiſſimo Rege conceperam, in ſpeculi modum hu-
mano generi exhibere: in quibus, ſicut in hoc humani
corporis lineamenta non animus ipſe appetet, extera
tantum Regiarum virtutum lineamenta, non intima-
tamen conſiliorū, legenti repræſentarem. Neq; enim fas
eſt. Velle enim privatum in Persona Regia, peregrini-
num in aliena Republica, videre amplius quam intuitu
primo appetet, ſacrilegium judico. Relinquo hæc ma-
gnis illis in Polonia viris, quos, hoc aeo, plurimos, ſtylo
ē doctrina, præ aliis nationibus, excellentes genuit.

Ne interim deſſe aliquid historiæ completae pu-
tes: quantum enim tibi ſcire (neque enim Conſiliariis
Reipublicæ Historiam formo) tantundem ē mihi ſcri-
bere licuit. Nec etiā te frontale illud, Panegyricè re-
præſentans, terreat. Candidè enim, quæ ſcripsi, vera
existimo: utpote ē à gravissimo Senatore Regni perle-
cta. Sed, mi Lector, delicatum hoc ſæculum noſti; cui,
ad leniendam invidiam, è viventis glorioſiſſimi Re-
gis victoriis, ē conformi virtutibus ejus elogio, emer-
gentem, hanc voculam tribuere viſum eſt.

AD LECTOREM.

Quantum vero ad dispositionem totius operis attinet, ut rei natura poscere videbatur, in duas partes distinxi: quorum altera, tribus libris, Vladislauum Principem: altera, totidē libris Regem representat. Et in prima quidem parte (secundam enim suo loco relinquo) Authoribus fide dignis subnixu, censorem non facile, nisi iniquum, reformido: excepta perplexa illa, de Demetriis, historia, in qua omnes Authores fere, qui illam attigerunt, aut variant, aut vacillant. Ego autem (relictis illis, qui in Polonicam jugiter virtutem & felicitatem obliqui, affectui non parum indulserunt) Sarmatas potius, qui & interfuerunt, & corum pars magna fuere, sequutus fui.

In bello Valachico doctissimum virum Johannem Innocentium Petricium, Almae Universitatis Cracoviensis eloquentiae Professorem, Cornelium Tacitum, si quis unquam aliis, stylo experimentem, Authorem habui. Cujus elegantissima dictio in eadem nonnunquam verba vel invitum traxit. Sed dabit veniam, hac in parte, gravissimus Author: & placabitur, more Cœlestium, ingenua confessione.

Peregrinationem ex Diario manuscripto, eruditissimi, piæ memoriae, Adolescentis, Johannis Hagenaw à Mazaunen (qui Alberti Stanislai Radzivillij Ducis Secretarius peregrinationi interfuit, & quicquid toto itinere singulis diebus actum, sedulo annotavit) sumpsi.

Quia

AD LECTOREM.

Quia autem non integrum in manus meas pervenerat,
quicquid in calce desiderabatur, à Caspero Nagot
(qui Vladislai Regis, tunc temporis, expensarum Prae-
fectus, in fidelibus ejusdem Regis obsequiis porro conse-
nescit) oretenuis hausi; quæ deinde, sicut illa quæ hu-
mana infirmitate, præsertim in obsidione Bredana, in
Diario fuerant prætermissa, fideliter addidi.

Licet autem opportunis locis variorum Authorum, quemadmodum in Scena mea feci, sententias in-
terserere potuisse, maluit tamen unius Senecæ. Quod
enim Cosmographi de Insula Creta respectu Orbis, hoc
ego de Seneca respectu aliorum Authorum. Videlicet
ut, quæ in aliis regionibus bene, in Creta optime nasci
dicuntur; ita, quæ in aliis Authoribus recte, meo ju-
dicio, melius in Seneca inveniuntur.

Et hæc sunt, bene vole Lector, quæ Te, in hac pri-
ma parte, scire volui: atque jam valedicerem, nisi me
Illustrissimorum virorum, qui me in hoc opere libera-
lius animaverunt, beneficia distinerent. Fama enim
meæ interest, ne virtutem illorum, & gratitudinem
meam, nesciat terrarum Orbis. Quippe qui abominor ^{Seneca} lib. 2. d.
eos, qui furtive agunt gratias, & in angulo, & ad ^{de bene:}
aurem. Non est enim ista verecundia, sed infici-
andi genus. Excelluerunt itaque, hac in parte, Caspa-
rus & Paulus Dzialinij: quoram ille Culmensis &

Po-

AD LECTOREM.

Pomesaniæ Episcopus, hic Pomerelliaæ Palatinus: Georgius Princeps Ossolinus: & Gerhardus Comes à Dönhoff. Ut sunt enim hi Illusterrimi viri, Zelosissimi nominis & honoris Regij, ita, quicquid in hoc stadio studioque sudabam, benevolentia singulari recreare voluerunt. Macte generosissimi viri, non perdidistis beneficium, quod in Serenissimi Regis gratiam collaccastis. Tam diu enim studiorum Mæcenates, tam diu fautores eritis, quam diu in pretio erit gloriosissimi Vladislai Regis gesta cognosci.

Valete, favete.



IN-

INTRODUCTIO AD VLA- DISLAUM REGEM.

Poloni gentium terrarum Orbis liberrimi à Venedis Sclavisq; Originem duxere. Et quamvis sub hisce nominibus, felicia olim in circuitu arma circumtulerint, nequaquam tamen ullo tempore ad hodiernum famæ gloriæq; fastigiū accessere. Quæ enim ulla gens infantiam suam habuit, ut adolescentiā, adolescentiā vero ut matritatem? Quis adolescentiæ suæ vigorē puer: virile robur adolescens habuit? *Nulla non res principia* Senec. lib. Eu. 3. de ben. *sua magno gradu transit.* Aspice Rhenum, aspice Eu-

phratem, omnes deniq; inclitos amnes, quid sunt, si illos unde efflunt æstimes? *Quicquid est quo timentur, quo nominantur, in processu paraverunt.* *Principia sua semper sequens magnitudo obruit.* Romanos illos rerum Dominos, si ad incunabula sua reduxeris, ad tectas stipula culmoq; casas, & humilia pastorum tuguria revolveris. Amplissimam Carthaginensiū aliquando rem ad fontem suum prosequere, bulbili olim corio circumscriptam videbis. Non mirum itaq;, si, quod florentissimis Imperiis, quod passim rebus omnibus contingit, Sauromatis quoque evenisse intuearis. Paulatim, ut quicquid nascitur, crevere. Adeoq; subsequentibus sæculis, sub Polonico nomine feliciores, postquam cum Lithuanis in unam coaluere Rempublicam, Rus-

(†)

siam,

INTRODUCTIO AD VLAD: REG:

siam, Prussiam, Mazoviam, Samogitiam, Livoni-
am, Podoliam, Volhyniam, Smolensciam, Severi-
am, Czernihoviamque, rara quadam felicitate,
ditiones sibi adjunxere. Quod mirabitur quisquis
inspexerit. Non illis famosus Chinarum adversus
Tartaros murus. Non maria innumerabiles multi-
tudine avertentia gentes. Nulli ferocissimorum
populorum cohibentes impetum Pirenæi. Nulla
Thermopylarum claustra. Nec propugnacula qui-
dem (adeo Spartanis generosiores robori suo fi-
dunt) nec munitiones, nec mœnia, nec valla. Sed
toto corpore Regnoq; obnoxii, illabatam tamen,
quam potiorem omnibus habent, libertatem, se-
curitatem, & in alias gentes imperium, sola ma-
gnitudine animi, fortiq; dextera paravere. Non
parum tamen eos in hoc Regum, quos habuere,
prudentia, virtus, & fortitudo juverit. Sed hæc i-
psa in non modicam eorum laudem revolvuntur.
Quia Reges, quos invictissimos, inclytos, pruden-
tia, virtute, fortitudine, præstantissimos habue-
runt, ipsi elegerunt; non electuri, nisi tot Heroas,
quot Reges voluissent. Nunc autem tot Heroas,
quot Reges numerant, cum nō nisi omni virtutum
genere absolutissimos, qui plane viris imperarent,
Senee: E- elegerint. In hoc naturam secuti: Naturæ enim est,
pist: 90. potioribus deteriora submittere. Mutis quidem gregi-
bus aut maxima corpora præsunt, aut vehementissima.

Non

INTRODVCTIO AD VLAD: REG:

Non præcedit armenta degener taurus, sed qui magnitudine ac toris cæteros mares vicit. Elephantorum gregem excelsissimus dicit. Inter homines pro summo est optimus. Et, de aureo sæculo loquens Stoicus, pergit dicere. Animo itaq; rector eligebatur. Ideoque summa felicitas erat gentium, in quibus non poterat potentior esse nisi melior. Ita Poloni aurei sæculi mores secuti, ut melioribus semper sua colla submitterent, sub quibus provincias jugiter & Regna subjicerent, eos, ut rem rarissimam, & in sua Polonia, & in Transylvania, & in Gallia, & toto terrarum Orbe quæsierunt. Et quamvis semper bene, nunquā tamen quam in Jagellonica, et, quæ ex hac, Suecica familia feliciores. Quæ enim & qualia sub Sigismundo III. Catharina Jagellonia, Sigismundi Primi filia genito, non fuere tentata & felicissime consummata! Elegantissimi viri Innocentii Petri-
ci verbis utar. Hoc Polonorum Rege Hieremias Σ Hist. rerū Simeon Principes Valachorum, oblati veetigali, in tu-
telam accepti. Exutus Rosuana Transyluanorum Dux Σ in Polon-
exercitu, paloq; suffixus. Livonia armis vindicata.
Aditæ Σ fractæ, longinquitate secretae, ac pene inco-
gnitæ gentes. Smolenscum Civitas, à Moscis ultra cen-
tum annos, non bello sed proditione nostris erepta, aedi-
ficijs auæta, Σ validissimo ingentis arcis præsidio mu-
nita, obsidione bienni, ab ipso vastata, Σ in potestatem
redacta. Tota Moscovia victorijs peragrata: Σ ca-

INTRODUCTIO AD VLAD: REG:

ptus Imperator Basilius Szuiscius, cum Johanne & Demetrio fratribus, ante ejus solium procubuit. Severia & Czernichovia, Moscorum Provinciae, à Vladislao filio, Paterno jussu exemploq; Imperij nostri jugum acceperunt. Quin ejusdem Regis auspicio & fortuna, vastata à Cosacis Turcarum Achilles, Techinia, Kozlovia, Belgradum, Theodosia, Trapezuntium: & super alia insignium Urbium excidia, Synopis caput & Regia Ponti, dum tempus mercatus, ditem alioquin Urbem, majorum opum specie compleverat, gravi ruina concidit. Jam Præcopum expugnatum. Sed & mare tentatum; in quo Ciculæ Bassæ filius victus, & occisus. Alter item Bassa, Classe victa, captus, & in vinculis mortuus. Territa Constantinopolis subitis armis, suburbiorum incendijs: incussaq; saepius Turcis Polonorum reverentia. Ethic est ille Sigismundus, sub quo hæc gesta sunt, hujus gloriosissimi Vladislai IV. Parens. Hic ille Philippus, qui Magnum hunc Alexandrum genuit. Cujus virtute cum Poloni in immensum creverint, & nominis sui fama, Terrarum Orbem impleverint, ominosam magnitudinem ejus, ab ipso vitæ exordio, deducamus.



GESTO-

1.
GESTORVM

GLORIOSISSIMI ac INVICTISSIMI

V L A D I S L A I IV.

PARTIS PRIMÆ,

LIBER PRIMVS.

C A P V T P R I M V M.

ARGUMENTUM.

Vladislai IV-nativitas & pueritia.

S U M M A R I U M.

Omina magnitudinem **V L A D I S L A I IV.** antequam nasceretur, insinuantia. Ejus nativitas, puerilis instructio, & præcox ingenium.

Vides illum Sarmatiæ Regem, inquit Romanus
Philosophus, insigni capitï decorum? si vis illum Senecæ Ep. 80.
æstimare, totumq; scire qualis sit, fasciam solve. Fa-
ciam hoc ejus consilio satis, & non fasciam tan-
tum, sed & vestimenta, & corpus ipsum solvam,
& quantum per ingenii quidem, perspicaciæ,
& mediocritatis meæ modulos licebit, in ani-

A mum

2 GESTORUM VLADISLAI IV.

mum ipsum me insinuabo, lustratus alieno sic
an suo magnus. Itaque licet ille maximus Sarma-
tiæ Regum VLADISLAUS IV. Paterno genere, Re-
giis, Jagellonica Sueticaq;, familiis; materno Au-
gustissima Domo Austriaca, Vitam, Sangvinem,
& generosissimi animi domiciliū traxerit, tamen
quia naturæ hoc magis beneficium, quam virtu-
tis opus, ad omina, veram nobilitatem ejus & re-
rum gestarū magnitudinem vaticinantia, venio.
Quemadmodum enim Cyri, Alexandri Magni, &
aliorum rarissimæ felicitatis Regum eminentiam,
antequam ederet, signis natura prodidit; ita glo-
riosissimus hic VLADISLAUS Rex, adhuc in ute-
ro materno latens, hisce non caruit. Cum enim
Regina mater Anna Austriaca, Caroli Archiducis
filia, sacratissimi Ferdinandi II. Romanorum Im-
peratoris soror, ab Invictissimo, gloriosæ memo-
riæ, SIGISMUNDO III. concepisset, toto concepti-
onis tempore, insolita quadam majestate vultus,
grandius aliquid utero bajulare, omnibus vide-
batur. Adeoque & Stanislaus Radzieiowski Pala-
tinus postea Lenciciensis, & Maximilianus Prze-
rebiski Castellanus deinde Siradiensis (quibus jam
animus præfigiebat, illam Sarmatiæ lumen., to-
tiusq; Reipublicæ Christianæ decus alvo contine-
re) ab actis stipatoribus Regiis & Doryphoris, aut

omina
futura
magni-
tudinis.

ali-

PARTIS PRIMÆ, LIBER I.

3

alienigenis illis, quibus in more erat gravidam
Reginam portare, id quicquid erat oneris, in-
speratae Polonicæ felicitatis gratiam, ipsi subiere.

Vladislai
IV. nati-
vitas An-
no 1595.
9. Jun.

Inde cum Anno 1595. jam tempus partus adesset
non ante Regina Mater, quam 9. Junij, in festo San-

ctorum Martyrum Primi & Feliciani enixa est.

Quod à summis prudentissimisq; viris in non va-

num quoq; omen acceptum, quasi infans modo
genitus primus omnium Sarmatiæ Regum esset
felicitate futurus. Aderant quoque ipsi Infantii
aptissima humani corporis lineamenta, quod
magnæ indolis signum Aristoteles judicavit. Nec
in vanum. Ut primum enim, pulsa infantili cali-
gine, ratio usum sibi vendicavit, generosa pluries
quam puerilia loquebatur, & in eum paulatim
crescebat, qui ominosæ nativitati, & speratae ma-
gnitudini corresponderet.

Congratulabatur interim sibi SIGISMUNDVS
Pater, & tacito fortunam sensu adorans, dispositus
illi viros doctissimos, quasi domesticum magi-
stratum, sub quorum custodia contineretur, &
quorum prudentia instrueretur, Nulla quipperes
magis animos honesta induit, quam bonorum virorum
conversatio. Paulatim enim descendit in pectora : Senec. Ep.
94.
vīm p̄ceptorum obtinet, frequenter audiri, aspici fre-
quenter. Occursus mehercule ipse sapientium juvat:

A 2

5

4 GESTORVM VLADISLAI IV.

Est aliquid, quod ex magno viro vel tacente proficiat. Nec tibi facile dixerim quemadmodum prospicit, sicut illud intelligam profuisse. Minuta quædam, ut ait Phædon, animalia, cum mordent non sentiuntur: adeo tenuis illis, & fallens in periculum vis est. tumor indicat morsum, & in ipso tumore nullum vulnus appareret. Idem tibi in conversatione virorum sapientum eveniet. non deprehendes quemadmodum aut quando tibi prospicit; profuisse deprehendes. Quemadmodum enim qui in solem saepius venerit colorabitur, qui in vnguentaria taberna resederit, & aliquamdiu commoratus fuerit, odorem loci secum adducit: ita qui cum sapientibus viris conversati fuerint, trahant aliquid necesse est quod prospicit in posterum. Præsertim cum hoc virtutes pariter & vitia habeant, quod in proximum quemque transiliant, & contactu ipso prospicunt aut noceant.

Sen. lib. 2 de ira. Hinc, alio loco Sapiens Latinus. Proximis applicatur omne quod tenerum est, & in eorum similitudinem crescit. nutricum & pædagogorum retulere mox in adolescentia mores. At an ille tantum? consulamus Horologium Principum. Quales Magistri sunt quos habemus, & præcepta, quæ audimus; tales & scientiae sunt, quas discimus, & actiones quas exercemus. Aderat quoque efficax in exemplum absolutissimus Genitor, in cuius quodammodo facie, Religio, Tem-

pe-

PARTIS PRIMÆ, LIBER I.

perantia, Fortitudo, Modestia, & Regiae virtutes omnes legebantur. In hujus aula, sub hujus oculis Vladislaus crescebat. Quid ergo? Prodest sine ^{Sen. Ep.} dubio, inquit Anneus, custodem sibi imposuisse, & habere quem respicias, quem interesse cogitationibus tuis judices. Colligebat quippe justissimos paulatim Regiarum virtutum Catalogos: & Religionem, temperantiam, modestiam, fortitudinem, & quasq; dignissimas integerrimo Principe dotes, quia a domestico magistratu didicerat, quia in optimo parente viderat, in crepundiis æmulabatur. Quā feliciter, tum demum videbimus, cum exerentem & exercentem paulatim se Principem, per Heroica gradientem vestigia, hisce cum fœnore, multo virtutibus, ad regium usque fastigium deducemus. Non poterant enim non germinare feliciter, quæ in tempore sparsa, felicissimo solo credita, in uberrimos fructus optime digerebantur. Habent enim ingenia quiddam cum semine simile, quod (ut Stoici similitudine utar) cum occupavit idoneum locum, vires suas explicat, & ex minimo in maximos actus diffunditur. Idem facit ratio: non latè patet, si aspicias: in opere ipso crescit. Pauca sunt quæ dicuntur: sed si illa animus bene exceperit, convalescunt & exurgunt. Eadem, inquam, præceptorum conditio, quæ seminum. Multum efficiunt, et si

6 GESTORVM VLADISLAI IV.

angusta sunt : tantum , ut dixi , idonea mens rapiat illa ,
Et in se trahat . Multum invicem Et ipsa generabit ,
Et plus reddet quam acceperit .

*Varib lin.
guis in-
struitur,
& ejus
præcox in-* Inde capacior disciplinarum , iisdem , quibus
excellebat Sigismundus parens , Latina , Italica ,
Germanica , Polonica , linguis instruebatur : &
quia felix illi ingenium erat , salutaria omnia qua-
genium . si in transitu rapuit . Nam ut Dij Immortales , Senecæ
pp. 95. verba sunt , nullam didicere virtutem cum omni editi ,
Et pars naturæ eorum est , esse bonos : ita quidam ex ho-
minibus , egregiam sortiti indolem , in ea quæ tradis-
sent , perveniunt sine longo magisterio , Et honesta com-
plexi sunt , cum primum audierunt . Verum enim
vero hæc naturæ indulgentia , sive insolentia po-
tius , magis omnino admirabilis est , cum insolent-
iam rerum omnium pariter videamus . Immo
Fortuna ipsa , quæ prosequi non nisi adultiores
consuevit , non vano omne ab blandiensi puerο
cæpit fortissimum æq ; ac felicissimum futurum
ali quando Regem , adhuc Principi in ætate rene-
ra ab blandiri ; & mox vastissimum illi imperium
contulit , cum ante ætatem posse sufficere judi-
caretur . Sed insolentiam hanc fortunæ , & occasi-
onem expeditionis primæ videamus .

CAPVT

CAPVT SECUNDVM.

ARGUMENTVM.

Vladislaus IV. in Magnum Moscoviaæ
Ducem elititur; & ejus, ob Moscovitarum, alium
Ducem eligentium, levitatem, expe-
ditio prima.

SVMMARIVM.

Moscovia Tartaris aliquando fœdè tribu-
taria, sub Iohanne Basilide in maximam potentiam
crevit. Hujus filius junior Demetrius, à Boris-
fio jussus interfici, arte matris evadit: sed filius alter
Theodorus, qui Basilidi Patri successerat, ab eodem
Borissio veneno necatur. Post cujus obitum Borissius in
Magnum Moscoviaæ Ducem elititur, & aliquot annis
imperat. Interim Demetrius adolescens, Polonorum
ope paternum Regnum recuperat, Borissio conser-
natione mortuo. Mox Demetrius à Szuiscio interfici-
tur, qui in Magnum Moscoviaæ Ducem deinde electus
Poloniæ Regis legatos cæptivos detinet. Demetrius
supposititus exoritur; quo Moscoviam devastante,
Sigismundus Rex Poloniæ, ob legatos suos ultra bienniū
detentos, Smolenscum obsidet: ab Hoc Zolkevius in pe-
nitiorem Moscoviam missus, Moscos & Svecos cedit.
Lissovijs quoq; ab eodem Sigismundo Rege missus, latè

Mo-

8 GESTORVM VLADISLAI IV.

Moscoviam vastat. Quare Demetrio suppositio circa Moscuam urbem etiam tumultuante, Szuiscius rogatus deponit imperium: quo in monasterium secedente, Zolkevius Moscuam urbem, dum à Demetrio suppositio oppugnatur, occupat & defendit. Hinc Moscovia Senatores Vladislaum in Magnum Moscoviae Ducem eligunt. Smolenscum expugnatur, & Szuiscius cum fratribus in Poloniam abducitur. Moscovitæ à Vladislao desciscunt & Michaelem Fedrowicz in Magnum Moscoviae Ducem eligunt: Moscuam Urbem recuperant, & Smolenscum obsident: sed Polonis, Magnis viribus Moscoviam ingredientibus, Mosci obsidionem solvunt. Vladislaus à Patre missus Severiam Czernihoviamq; Provincias subjugat, & Moscos in angustias cogit. Quare Mosci supplices pacem petunt, quibus Poloni, etiam victoriis & bello fessi, quatuordecim annorum inducias, tandem concedunt.

Moscovia Russiæ Provincia est, quæ, devolutis ad ejus Principem Ducatibus cæteris, ad præsentis Imperii Majestatem ascendit; Tartaris alias, paulo ante, tam foeda servitute obnoxia, vt, advenientibus Tartarorum legatis in equis, Magni Moscoviae Duces pedes obviam irent, & bibentibus, more illis gentibus consueto, lac equinum Tartaris, decadentes forte in jubam guttas Magn

Magni Duces ore lingerent, quin imo stantes aper-
to capite, sedentibus legatis Tartarorum, jussa au-
diren. Sed foedam hanc servitutem, Basilius, istius
famosi Iohannis Basilidis parens, fortiter à se reje-
cit, & Magnorum Moscoviaæ Ducum libertatem ^{Maxima}
armis procuravit. Iohannes Basilides inde in im- ^{Mosco-}
mensum Moscorum imperium ditionibus auxit, ^{rum pe-}
& nō solum vicinum Czeremissis Casanense, & ad ^{tentia}
Caspium vsque mare, Albanos, et confinia Persiaæ ^{s. b lo-}
Astrachanense, Regna, Tartaris vice versa eripuit, ^{hanne}
sed ad Balthicum mare Livoniam quoq; sub juga-
vit: tam absoluti Imperij Monarcha, ut jure de illo
ingeniosus aliquis Vates, hos, in persona Tyranni,
versus scripserit.

Russorum Rex & Dominus sum jure paterni
Sanguinis: imperij titulos à nemine, qua vis
Mercatus prece, vel pretio: nec legibus ullis,
Subditus alterius. Sed Christo credulus uni,
Emendicatos alijs aspernor honores.

Sed formidabilis illa etiam Turcis potentia, à nul-
la sèpius gente, quam Polona accisa est, ad hostium
vsque desperationem viætrix: nam sub inlyto Ste-
phano Rege & Livoniam totam extorxit, et, cum
ditionibus aliis, Polotiam Lithuaniae reddidit.

Verum-enimvero (vt ad propositum venia- ^{post Basi-}
mus) post huius famosi Basilidis obitum, Theo- ^{lidis obi-}

^{tū Theodo-}
^{dorus fili-}
^{us impe-}
^{ratus.}

dorus filius imperavit, qui Borissium (quem Ho-
dunum alii vocant) nobilitatis antiquæ virum
purpuratorum Principem legit, in suam ipsius, &
familia& suæ ruinam. Erat quippe Borissius, littera-
rum quidem ignarus, sed juncta comitati astutia
plebi charus simul & venerandus; & qui crudelia
nomine Principis machinaretur, quibus deinde
palam interventu suo discussis, invidiam, odium,
execrationes Principi, sibi favorem & clementiæ
^{Borissius}
^{Theodoro}
^{& Deme-}
^{trio fra-}
^{tri ejus}
^{infida-}
^{gur.}

laudem conciliaret. Et addebat gratiæ quod foro-
rem Borissij duxisset Theodorus vxorem. Cum vi-
deret itaque technas suas ad intentum adolevisse,
Demetrium vnicum Theodori fratrem, et tandem
Theodorum ipsum, aut ferro, aut veneno, tollere
statuit. Quod facile ipsi efficeret, cum ipsius arbi-
trio prope omnia agerentur, & fratum juvenculus
alter, alter, qui et imperabat, fanaticus, & vel ipsi-
us Basilidis parentis judicio, tintinabulis per tem-
pla pulsandis aptior, quam Imperio videretur. A-
ctum erat de vastissimo prope terrarum Orbis im-
perio. Sed comprehendit Deus sapientes in astutia
sua, & quem primo & maxime sublatum voletabat,
juvenculum Monarchæ fratrem Demetrium, ad
tollendum tandem Borissium reservavit: tanto
cum eiusdem Tyranni ludibrio, ut interfictum læ-
taretur, qui in perniciem eius vivebat. Quippe
Borissii

*Demetrie
ueradis.*

Borissii in Demetrium technas sollicita Princi-
pum Mater advertit, & consilio omnino salubri,
filiolum suum periculo mature subduxit. Cum
enim sicarii ad necem Principis properarent,
puerum qui Demetrium ætate & ore referret, in
ipsius, callidè, strato locavit: quem immisi per-
cussores (qui minus eum, centum à Moscua Ur-
be, ad Vielikam, milliaribus educatum, nove-
rant) ibidem pro vero Demetrio jugulavere: fa-
ma deinde astu Borissii sparsa, peste Demetrium
periisse, qui in exitium tamen ejus crescebat.
Borissius interim de Demetrio porrò securus, jam
quoque paulatim Theodoro Monarchæ immine-
bat: quem deinde, Annos 36. natum (ut commu-
nis fama est) veneno sustulit: hoc quoque ei in-
dulgente fortuna, quod Theodorus Gerniam
conjugem suam, sororem vero Borissii, provin-
ciarum omnium administratricem testamento
sctipisset.

Itaque Gernia mox, Borissii suasu, in mo-
nasterium sacrarum Virginum, extra arcem, in-
tra tamen adhuc Moscuæ muros, secessit: expe-
riimentum factura, quid de ipsa & Borissio fratre
Moscovia universa sentiret. Quid itaque? Mo-
naстicam, Mundi тædio, profiteri se simulans, ad-
ministrationem imperii, in Cnesios Boriariosque

*Theodo-
rus vene-
no perit**Anno**1698.**Borissiu
in Mag-
nū Duce
eliguur.*

(senatus hic & nobilitas gentis est) omnino reiiciens. Populus, fucata jugiter Borissii comitate demulsus, ad Gerniam properat, & observans sacrarum Virginum septa, lamentabili Gerniam voce precatur, ne se tempore tam periculoso deferat; Cnesiorum quippe & Boiariorum superbi amaversati, & si quid sequioris sexus prudentiae desit, esse Borissium fratrem, Theodori Imperatoris sui sacerum, cuicunq; oneri parē: tuto huic imperii graviora committi posse. Gernia tergiversari, instare populus universus: nec illam, nec penetralia virginum relicturus, nisi æquissimis, ut putabant, postulatis satisficeret. Jamque res, ultra tumultum, prope seditionem erat, cum Borissius foras venit, & aptis temporibus, fluctuantes, ad malaciam animos revocavit: nec se à petitis illorum omnino alienum ostendit, dummodo Cnesi & Boiarii in partem sollicitudinis veniant. Et sic quidem tunc ad pauculos dies induciæ. Cum vero interim Regina, omni sæcularium rerum cura à se abdicata, monasticam verè profiteretur, & pro Gernia Alexandrinæ nomen assumeret, tum populus magis moveri, & Basilio Salo Calfio Cancellario Regni, convocanti se & hortanti, ut Gnesiis Boiariisque fidem obstringeret, in faciem restitit, & concordibus votis

votis Borissium Reginæ fratrem, Principatu dignissimum nominat: hunc esse cui fidem addicere paratissimus sit. Borissius, qui præsens erat, ad honorificas de se voces exurgens, modeste se excusat, ignosci mediocritati suæ petit, & (quo desiderium populi irritaret, & Cnesiorum Boiariorumque invidiam effugeret) in vicinum primo templum, mox, à populo vociferante retractus, inter excusationes subdolas, in monasterium virginum integrum cum sorore mensem se abdit. Augetur conatus populi, cui resistitur; & crescit, qui irritatur, affectus. Totius itaque mensis spatio, undique fugam metuens, claustrum obserdet, & sororis interim Reginæ, & ipsius Borissii oportunis, importunis vocibus aures pulsat. Et Borissii quidem, ut admitti se ad gubernacula Regni patiatur, & imperii fasciam, diadema, & insigne capessat: Reginæ, quatenus apud meritissimum de se fratrem preces suas interponat, tandemque persuadeat, quas millies mereatur, fasces admittere. Ille sumpta modestia larva, tanto confidentius renuit, quanto ferventius petebatur, & subdolè, quibus appetebat imperium, modis, negat: Hæc autem expugnari se tandem passa est; & hujus precibus & interventu, paulatim ille. Cum enim jam temporis mora, quodammodo detrito

livore, matura omnia viderentur, Cnesiis plerisque Boiariisque, ob vulgi pertinatiam, consentientibus, populo cum sorore se fistit, & tandem Russiæ & Moscovia Imperatorem, Casanensium, Astrachanensiumq; Regem, & variarum Regionum Principem, à voti compote populo, salutari se passus est. Inde festivi ignes, & inter millia tintinabulorum, gratulatoriæ voces exceptæ: & addebat confirmationi regiminis, quod Tartaros Crimenses, interregni tempore provinciam ingressos, coactis mox centum, vel, ut alii volunt, trecentis armatorum millibus, multis velitationibus secundis, retro ageret. Itaque ea fallacia, iis artibus, dolisque, Borissius, sive Hodunus, imperium Moscoviticum, fasces, & diadema, invasit, ut invasisse jure videretur.

Demetrius in Livonia liberalibus studiis operam dedit,

Interim autem in ejusdem imperiis spem Demetrius adolescebat, & vieto paulatim duro Moscovitarum genio, laudabilem civiliorum Europæ gentium humanitatem induebat. Adeoque & in Livonia liberalibus imbutus studiis, & loqui eleganter latinè, & scribere didicit. Et poterat hoc septem annorum spatio, quo Borissius impetravit. At jam, adulta, cum ætate, regnandi libidine, vindicias familiæ suæ, & universæ Moscovia, in uno Borissio meditabatur. Sed vana erat, quod dicuntur,

citur, *sine viribus ira*. Quemadmodum regia vitis, sine sustentaculo, prona fatigathum, sustentaculis autem erecta, maturescit citius, mage fructifera est, & viridantibus deinde foliis, suaveolentibus quoque botris, & aliis gratiarum generibus, ipsa sui sustentacula recreat; ita Regiae familiæ Principem, flexum à fortuna deorsum, sublevamine & auxilio, citius ad consequendi imperii maturitatem, & fructus confidentiæ suæ convenientes progenerandos, indigere videbat; quod deinde, gratitudinis ergo, viridi semper affectu, & multi-granis gratiarum botris, reficeret, & prosequeretur. Quid itaque? Polonia in facie erat, *Patribus Societatis in Polonia nascens perit.* formidabile jam olim Moscoviaæ suæ regnum, & ad intentum magnanimi adolescentis potentissimum; nec dubium erat hanc ipsam sollicitare, dummodo saltem desolato fides adhiberetur. Tentandum duxit. Cum esset ergo à catholica fide non alienus, potentibus in Polonia Societatis Jesu Patribus, primo personam suam aperit, & quod felix faustumque, fidem invenit. Præsertim cum altero breviore brachio, & verruca in facie, notabilis esset, quæ in vero Demetrio fuisse, nemo erat qui inficiaretur. Adhæc ingenio acri, præsentia animi liberalitate, comitate, non indignum se regali prosapia proponebat. Additum efficax quoque, à

que, à prudenti adolescente promissum: fore, si patrium recuperasset imperium, cultus divini maximam rationem haberet, & Moscoviam, ad Ecclesiæ Catholicæ unionem, universam adduceret. Non spernenda visa conditio. Itaque res testa primum, monitoq; Romano Pontifice (ad quem & Demetrius ipse literas non inelegantes sua manu latinas scripserat) commedatitias ad Poloniæ Regem & proceres impetravit. Primum ad potentem in Regno Sandomiriensem Palatinū Georgium Mniscum, supplex introducitur, spe clam facta, ut, si voti compos fieret, ipsius, in quam oculos cōjecerat, filiam uxorem duceret. Igitur à Sandomiriensi & genero ipsius Visnoviczio, ad Sigis-

*Ad Sigis-
mundum III. Poloniæ Regem introduceitur, &
mundum:
III. intro-
ducitur.* quod summū votorum erat, legitimus Moscoviaæ hæres apparuit. Et, ut habent hoc desolati principes, quod misericordiam facile sui similiū excitant, dignus auxilio visus est: præsertim cum res tota in non modicū Ecclesiæ (cujus Sigismundus studiosissimus erat) & Regni ipsius commodum vergeret. Itaque Polonia tota delectus, & Sandomiriensi Palatino large pecunias subministrante, brevi temporis spatio, decem milliū coadunatus exercitus. Additus necessarius belli apparatus, et promissis invitata Cosacorū itidem decem millia.

*Polono-
rum ope
Regnum
recuper-
rat.*

Hoc

Hoc exercitu Borysthenem superat: & ad Czernichoviam prima prosperitas, cum Urbs ipsa, præsentiam hæredis adorans, ipsius partes ultro sequeretur. Altera ad Putiwlam fuit: cum sub Michelovitzio Soltokevio, præsidium octo Volochdensium Cosacorum millium, ad Demetrium cum ipsa acie transiret. Inde ad Novogardiam primum belli fulmen: ibi aciebus instructis acerrime dimicatum. Sed Borissio, centum millium exercitu, numero prævalente, Demetrius damnum tulit: Sed non, nisi ut irritaretur. Mox enim, cum ad Rilscum arcem se receperisset, & Borissiani, victoria feroces, petulantius insultarent, aciem instruit: & miro fortunæ ludibrio, vixsus antea, equitatum victorum concidit, peditatum internecione delevit. Hoc alterum belli fulmen: quod mox quinque vicinas arces, & inter illas Bialogrodam, centum quinquaginta majoribus machinis munitam, cum universa Seyeria, ad Demetrium traxit.

Sub hæc scriptæ à Demetrio ad Borissium monitoriales litteræ: se respiceret legitimum Regni hæredem, & imperio, quod injuste invaserat, mature cederet. De cætero, oblatis familiæ, & ipsi conditionibus optimis, quod vellet monasterium ingrederetur. Has litteras cum in

Borissii
mors An.

1605.

execunte

Apr:

FIUDDO

C

præ-

præsentia, obliquorum Polonicę Reipublicæ Legatorum, Danię Suecięq; legeret, excandescens subito corruit, & magna vi sanguinis, per os, nar-
es, & auriculas fusa, pariter animam exhalavit.

Interim Cromo arcī, (quam elata prima victoria pars exercitus Borissiani obsederat) subvenire placuit. Et ibi ab initio acriter certatum: sed ad Demetrium, cum exercitus parte, Petro Busmanio, à Borissianis transeūte, absoluta mox victoria Demetrius potitur. Septuaginta in castris machinę reperte, & tam vastę magnitudinis aliquę, ut singulas bini viri brachiis circumdatas, vix completerentur. Ut ergo in castris,
*Uxor
Borissii &
filii inter-
ritus.* sic et Moscuę secuta animorum mutatio. Et jam ad Demetrii nomen exultante populo, uxor Borissii vidua, cum filio suo et filia [post mortem Borissii, ne et illi ludibrium deesset, in matrī solium, paulo ante collocata] jam, ab eodem, in custodiā traditur. Mater, Demetrii adventum metuens, lethale poculum hausit, et libēris propinavit. Quo illa quidem et filius periit, sed filiola, contraria statim potionē sumpta, su-
pervixit.

Biduo post solutam Cromi obsidionem, ma-
gno Procerum consensu, Demetrius Moscuam petiturus, viam ingreditur, undique per vias
occur-

occurrente, ad novi Principis spectaculum, multitudine. Ac tandem, vicesimis castris, summa magnificētia, Regiam Urbem ingressus est. Et mox, festa omnium acclamatione, Russorum Imperator, Magnus Moscoviae Dux, plurium Regionum Princeps, & Astrachani Casanique Rex, salutatur. Denique, ad occasum vergente Augusto, honorificētissime accersita Matre (quæ procul à Metropoli, ad exiguum monasterium, à Borissio, ablegata fuerat) illi pedes obviam ivit. Et illa præsente solitis solennibusque Ceremoniis, mauguratus est: Cui Nicolaus Cemicovius, Societatis Jesu Pater, luculenta & elegantissima Oratione congratulabatur.

Secura, ut videbatur, pace domi forisque Legatus parta, proxima, de bene meritis Polonis rependenda gratia, cura fuit. Itaq; trecentorum equitum, sub Thesaurario Regni, Athanasio Rosclovio, ad Sigismundum Regem decreta legatio est. Tum publicæ actæ, pro auxilio, gratiæ: desponsata Demetrio Marina, Georgii Mniszek Sendormiriensis Palatini filia: & fiduciariæ mox Cracoviæ contractæ nuptiæ, præeunte in verba, Bernardo Maczieiowscio Cracoviensi Episcopo Cardinali. A Palatino deinde, Rex, sponsa, Legatus Moscicus, & Persarum Regis, qui tunc ad-

Demetrius
in Moscœ
via Dux.

Demetrius
in Polonio
am, & fi-
duciarie
nuptia,
cum Sen-
domiriœ-
sis palati-
ni filia,

erat, Nuncius, convivio excepti: & dona, à Demetrio, Sponsæ, ac Parenti ejus missa, (quæ ducenta aureorum millia excessisse feruntur) tradebantur.

*Demetri-
u apud
suos mate-
audi, &
tandem in
ipsum o-
juratio.
De Con-
sol: ad
Mar:*

At in summo nunc erat & præcipitio Demetriana felicitas: & verissimum tandem apparet, quod Anneus, Nulli fere ē magna bona, ē diuturna contingunt: Non durat, nec ad ultimum exit, nisi lenta felicitas. Hęc ipsa, qua benefacto-ribus suis Polonis gratificari volebat, benevolentia in exitium cessit, & præservido prurientis voluntatis desiderio, se fortunamque suam, in exitium miser juvenis præcipitavit. Quantum enim Polonis benefemeritis tribuebat, tantum apud Russos odii colligebat. Preseruum cū septuaginta familiæ nobiles, aut sanguine Borissium, aut favore contingentes, extra Imperium deportatae essent, ut eorum (sicut fama, vel invida, vel maligna sparserat) bona extraneis, & hereditariis quodammodo Moscoviaæ hostibus, Polonis distribuerentur; adeoq; novorum hominum, in Russiam, coloniæ introducerentur. Accendebat sinistros sermones, Basilius Szuiscius, nifallor, illius Johannis Szuisci Plescoviensis olim Prefecti, cum à Stephano Rege, & Johanne Samo- scio oppugnaretur, frater. Hic belli paulo ante,

sub

sub Borissio, Generalis, cum aliis, post Borissii mortem, fortunam Demetrii quoq; respexerat. Sed novi mox iterum Imperii pertæsus, cum omnes in adulationem effusi, ad pedes Imperatoris novi prociderent, pertinaciam, spreto periculo, solus servavit. Insuper insigni contumelia Magnum Ducem traducens, advenam eum et terræ filium (quod talibus circumstantiis gravissimum erat) nominare solebat. Itaq; criminè Læsæ Majestatis damnatus, cum ad supplicium duceretur, & jam jam carnificis iustum exspectaret, mira Demetrii Imperatoris clementia, et vitam, et dignitatem pristinam recuperavit. Sed, ingrato quod feceris, perdidisti. Quippe Szuiscius, Scharabœi instar, Demetrium, à quo vitam acceperat, pungere non desinebat. Et post beneficium pejor & audacior factus, cum pluribus aliis, in Demetrii, qui ipsi Spiritum dederat, necem conjuravit. Et, quod amplius, parricidii satelles & latro, præmium sperabat, Imperium Domini. Nevero putes sanguinem tantum sitiisse, divitias pariter anhelabant, et adventantis Sponsæ gazam prestolabantur: quasi ejusdem sceleris esset, parricidam simul et raptorem esse.

Et jam Sendomiriensis Palatinus, cum filia ^{Demetrio}
^{us cum}
^{Sedomi-} Sponsa, & numerosa nobilitate Polonica, Craco-

riensis
 Palatini
 filia nu-
 trius ce-
 lebrat.
 via & à Sigismundo Rege discesserat. Sed lente
 progrediebatur, quasi non omnia prospera omni-
 naretur. Ut longinquitatem tamen itineris col-
 ligas: cum exeunte Januario abire cœpissent, non
 nisi Majo mense Moscuam pervenere. Ibi die-
 bus aliquot quiete consumptis, tandem de so-
 lennibus cogitari cæptum. Et jam ad magnifi-
 centiam comparatis omnibus, ipso illo mense
 Majo, in Palatio Regio, verba faciente Russorum
 Patriarcha, Sacris matrimonii vinculis, Deme-
 trius & Marina, constricti sunt. Ut autem Im-
 perator quoque Imperatricē frueretur, à Palatio
 ad Templum Attalicis vestitum aulēis, eodem
 magnificentiæ tenore migratum est. Ibi aurea
 corona tempora redimita, Russorum Imperatrix,
 Magna Moscoviae Dux, variarum Regionū Prin-
 ceps, Astrachanensium, Casanensiumque Regi-
 na, more solito, salutata est. Vespera deinde illa
 & nox Hymenœo pariter Comoque dicata.

a szui-
 scio, &
 conjura-
 tu occidi-
 tur. Anno
 1606.
 16. Kal:
 Janua-
 ppi.
 dum autem sequentes dies, hastiludiis, lu-
 dicris, tormentorū fragoribus, & similibus aliis
 letitiæ argumentis consumuntur, interim cum
 conjuratis Szuiscius, Tragædiam suam instruit.
 Et eo confidentius, quod paulo ante, adducto-
 rum ex Polonia secum Germanorum satellites,
 Russis gratificari volens, Demetrius dimisisset,

Itaq;

Itaq; Sabbatum, quod in 16. Kalendas Junias in-
cidebat, cœdi destinatum: ipso etiam Demetrio
harum rerum penitus non ignaro. Qui jam ab
aliquot retro septimanis, ut sibi caveret moni-
tus, quod Germanos satellites tam leviter dimi-
sisset, serio dolebat. Hinc subitarias aliquot, è Li-
vonibus, Gallis, Anglis, Scottis, Polonisque co-
hortes conscripsit: sed hoc imminentis fati erat
leve solatium. Szuiscius enim cum conjuratis
jam summo mane aderat, fama interim per Ur-
bem sparsa, Polonos in armis esse, & ad interne-
cionem Russos delere constituisse. Itaque ab o-
mni parte tumultus: & aliis ad prædam, aliis ad
Polonorum cædem discurrentibus, Szuiscius
cum suis in Demetrium vertitur, sub id majus
tintinnabulum, in incendii signum, pulsari im-
perans, ut Demetrius excitaretur, et, quod hoc
casu solebat, extra conclave procurreret. Exci-
tatus Demetrius, cum satellites fugisse adverte-
ret, & majus aliquid, quam incendii, periculum
suspicaretur, acinacem Turcicū corripit, & per
fenestram sese dimittens, luxato, præcipiti lapsu,
femore, à circumfusa turba capitur, & in aulam
majorem, in qua externorum Principum Legati
audiri solent, Szuisci jussu, ducebatur. Non sta-
tim tamen insitam generositatem posuit. Cum
enim

enim è Boiariis, hoc est nobilibus, unus, proditionem illi, vitamque sceleratam objiceret, strieto acinace, medium dissecavit. Inde conversus ad Proceres, alloqui populum petiit, ut, quicquid esset, palam confiteretur. Sed conjurati hoc illi negaverunt, & in miserum irruentes, non uno vulnerè confecere. Sic ut illud ibi verissimum fuerit, quod in Ruffino Claudianus,

& non infecto puduit mucrone reverti.
Ne vero ultima Demetrii verba, & genuina confessio ejus, in vulgus spargeretur, Germanum, quem unincū penes se habebat satellitem, simul interfecere. Tum in vulgus sparsum, impostorem Demetrium fuisse; adeoque ultra mortem crudeles, in defuncti cadaver levierunt. Et fune, per pudenda, transmissō, per calcata viarum stercore, ad forūm traxere. Ibi sanguine lutoque fædatum, in mensa quadruplex extensum jacuit, utrica quoque fistula, quo rustici Poloni utuntur, in os inserta, cum denario, quasi pro musici cantus auctoramento. Sendomiriensem, quod diversorum delectis firmatum haberet, infessis aditibus, claudere contenti, ad aliorum Polonorum, & miserè Sponsæ gazam diripiendam discurrere, quæ una cum Germanorum Polonorumq; direptis opibus computata, integras vingt tonnas auri excessisse dicitur. Post

Post publicam hanc rapinam simul & lanię-
nam, quasi re optime gesta, à Boiariis, Cnesiis,
& Basilio Szuiscio, in consilium itum, & denovo *Szuiscio.*
rursus Principe eligendo serio deliberatum. Sed *wMagnus*
quid multis? Tantū in Szuiscio parricidium va- *Moscovia*
luit, ut hic plus quam Catilina, præ aliis omnibus
eligeretur. Cujus mox in Demetrium furor re-
cruduit, & ut se Ducem legitimum faceret, ille-
gitimum illum publico scripto demonstrare co-
nabatur: hæreticum subinde, veneficum, impo-
storem, transfugam, & sacrilegum nominando.
Postremo ad plenam imposturæ fidem faciendā,
cum sub id, insolito his mensibus, gelu fruges u-
bique adurerentur, ad divinam hoc in Demetri-
um iram retulit, non, nisi penitus annihilato i-
psius cadavere, leniendam. Itaque mox reëffe-
rata, ut ita dicam, plebe, Demetrii, ægrè nuper
mandatum terræ, corpus eruit, & illo publicè cre-
mato, cineres in aëra sparsit.

Cæterum ut verissimum supra, de Demetrio,
Romani Sapientis dictum erat, ita & verissimum
hoc, de Basilio Szuiscio, doctissimi Severini Boëtii
Quicquid, præcipiti via,
Certum deserit ordinem,
Lactum non habet exitum.

Deme-
trius sup-
positius
in Szu-i-
scium.

Quippe vix Demetrius erat occisus, cum illico

D

sup.

supposititius, immo nondum visus Demetrius fuit exortus, qui Szuiscium persequeretur: ita ad gubernante fortuna, ut qui legitimū verumque peremerat, à supposititio & nondū viso vindicaretur: Res est. Post Demetrii obitum, qui res in M oscovia turbatas malebant, Cosacis se adiunxerunt, & iterum fugisse Demetrium, aliumq; pro illo interfectum dicentes, ipsius adhuc partibus militabant. Et, quod mirere, rumori ex eo fidēs accessit, quod eodem, quo tumultuabatur, tempore, quatuordecim vacua generosis equis loca, in hippone reperta fuerint, quos fugiens ille, ut vulgabatur, abduxerat. Itaque hi Demetriani in Szuiscium omnino féroces, terribiles, per annum & alterum, Moscoviae toti vastitates intulerunt. Ad extremum, ut fucus magis coloraretur, insigni temeritate, Demetrium, qui nullibi erat, quendam de suo corpore creaverunt.

*sigismundus III. in
Moscoviā* Interim Sigismundus III. Poloniæ Rex (cujus Legati per biennium jam & amplius captivi movet. Moscuæ detinebantur) variis injuriis irritatus, exercitum militemq; legit, & mox Smolenscum versus in Moscoviam movit. Cæterum quod illud Smolenscum, quis situs, conditio, status, quia ad rem pertinere videtur, breviter aperiemus. Præsertim cum illud, quam diu erit, & fortassis etiam

iam cum non erit, VLADISLAI IV. vi & oriarum,
illustre monumentum futurum sit.

Smolenscum ergo non exigua Russiæ, ad Boristhenē, natura pariter & arte munitissima Urbs ^{smolenscum de-}scribitur. est, et, quod claritudini addit, turribus & vastissima arce famosa: Hanc, allecti sæpius opportunitate loci, Magni Moscovia Duces astu & ferro tentavere. Sed eripi Reipublicæ Polonæ non potuit, nisi Polono Duce; qui, ad magnum Sarmatiæ damnum, ad propriam patriæ suæ perniciem, quod mirere, tamen inventus est. Is erat Michaël Glinski, nobili Rhutenorum Principum familia natus, ceterum virtute bellica longe famosior. Hic in Germania adolescens, sub Alberto Saxoniæ Duce, tum temporis in Frisia belligerante, rebus, per omnes militiæ gradus, strenue gestis, celebre sibi nomen pepererat, tandemque, moribus Germanorum imbutus, in Patriam redux, apud Alexandrum Poloniæ Regem authoritatem adeptus, eo loco fuit, ut graviora quæque negotia ipsius arbitrio committerentur. Tartaros ea quoque clade affecerat, quali à Witoldi tempore Lithuaniae postea nunquam. Una illi, Regis causa, cum Johanne Zabrezinio, Palatino Trocensi, Lithuaniae Marscalco, discordia nocuit, non tam sua, quam Zabreziniij ipsius culpa. Cum enim A-

exandro Rege, componente dissidium, ac postea mortuo, Sigismundus succederet, mox Johannes Michaëlem, crimine affectati Imperij, & proditiois Patriæ accusavit. Cujus injuriæ Glinscius omnino impatiens, rogavit s̄epius Regem, quatenus communi judicio, ut tantum à se crimen de pellere posset, causam discerneret. Sed, pr̄occupato Regis animo, petitio locum non habuit. Itaque ad Vladislauum Hungariæ Regem, Sigismundi fratrem proficiscitur. A quo litteris & Oratoribus, quibus, ad cognoscendam causam, Rex monebatur, impetratis, quod æquum videbatur non una via tentavit. Sed incassum, omnia Zabrezinio discutiente. Quid itaque? Indignitate rei permotus, tale facinus, Regi, aggressum se dixit, quod ipsi sibiq; mærori, esset aliquando futurum. Mox iratus domum se contulit, & impetratis, clam, à Mosco, salvi conductus litteris, ulciscendi libidine flagrans, in Zabrezinium, qui in villa tum, circa Grodnam, erat, toto impetu fertur. Cumque, ne elabi posset, dispositis circum eades militibus, immisso percussore quodam Mahometano, in lectulo dormientem interimit. Ita Zabrezinium ultus, ne, sine utilis fidei tessera, ad Moscum accederet, Lithuania quædam castra aggreditur. Sed, superveniente

Regis

Regis exercitu, cum par non esset, Moscuam fugit. Ibi, à tum regnante Basilio, famosi istius Jo-hannis Basilidis Patre, honorifice satis suscep-tus, illi author fuit, Smolenscum, à cuius obsidione, paulo ante, cum clade recesserat, denuo obsiden-di; fore enim, dummodo sibi Smolensiæ Ducatus con-de-re-tur, ut Urbem tantam Imperio Mo-scico, se Duce, adjiceret. Assensit Basilius, certus se nihil daturum, si vicisset. Itaq; Glinzcius Ur-bem, arcta iterum obsidione, pressit: & adimens omnem defendendæ arcis, præsidio, sua præsentia, spem, vi, astu, industria, corruptione, deditio-nem extorsit, Anno, post Christum natum 1514. et, ab hoc tempore, Smolenscum Moscoviticum fuit. Ne autem ulterius esset, Sigismundi Tertij Polo-niæ Regis, prudentia, virtus, industria, effecere.

Ergo Anno Christi 1609. obsidione premi-
ceptum & aditibus ubique interclusis, turribus,
munitionis, propugnaculis, & multis, paulo an-te, exoticis artibus, sollicitatum est. Adeoque
Mosci de Scuto Imperij sui jure solliciti, ad Bialam
numero-so exercitu congregato, solutionem à Ion-
ginquo minabantur. Non tulit præsumptionem
illorum Sigismundus Rex. Sed ipse Smolencen-
sem obsidionem continuans, Stanislaum Zolke-
vium, felicissimum exercituum Ducem, aliquot

*A Poloniis
obsidetur.
An. 1609*

*Moscico-
duntur.*

militum millibus instructum, in hostes misit. Qui magno animo Biallam in hostes profectus, congregatum ibi Moscorum exercitum dissipans, reliquias in Zarembam (monumentum sic vocant ex arboribus terraque in modum fortalitii stratum) pepulit, et, ne esset qui evaderet, statim obsedit.

Interim à tergo Smolenscum urgebatur. Et tantum Sigismundi, juncta virtuti, industria valuit, ut aliae quoque, præter Moscovitas, Nationes, ne eaperetur, in sollicitudinem verterentur. Quid ergo? Sueci, Gothi, Vandali, & quicquid populorum latet sub hisce nominibus, sub Carolo Sundermanniæ Duce, in defensivum, offensivumque, cum Moscis, fœdus coäluere. Et sane horum quoque intererat, ne Urbe tam opportuna, commoda, & munita, Polonica potentia stabiliretur. Præsertim, cum jam legitimum & hereditarium Regem suum, & Principem, à quibus desciverant, timere didicissent. Ergo, sub Pontio Gardia, novus hostis, novus exercitus, et, quod mirare, in ipsa Moscavia. Et tanta quidem erat Szuiscio Duci exterorum fiducia, ut jam non tantū de reprimendo Demetrio, sed Smolencensi obsidione levanda, cogitaret: ad quod, si ad Zarembam Zolkevium oppressisset, momentum allaturum arbit-

*Sueci jū
gunt se
Moscis.*

arbitrabatur. Quare hunc viginti quinque milli-
um exercitum eo destinat.

Sed intellexerat jam Zolkevius propositum
ejus, & parum mox interesse docuit, cum Suecis
dimicaret an Moscis, cū multis præliaretur an pau-
cis. Immo tanti nō æstimavit, ut, relictis duobus ad
Zarembā millibus, quinq; millib^o ipse & centum
militibus, his obviam copijs processerit. Et, ab-
solute quinque horarum itinere, in Clussinensi-
bus campis assecutus est. Res Moscis Suecisque
prodigio similis & temeritati visa est, cum de fu-
ga potius, quam pugna, Zolkevium cogitare ar-
bitrarentur. Sed dispulit ille, presentia sua, pra-
væ opinionis nebulas, nec temeritatem, sed vir-
tutem esse, fortitudine pariter & exitu pugnæ de-
monstravit. Eā siquidem militari arte, eaq; ferocia
hostes aggressus est, ut circūfusæ, & à lateribus, &
à fronte, paulo ante, catervæ, quasi uno momento
dissiparentur: & tam numeros^o exercitus, à quinq;
millibus deleretur. Pontius Gardias, exterorum
Dux, inter fugientes erat: Sed, eodem fortunæ
cursu, Sarmatæ & illum, & receptaculum ejus O-
strosciam arcem aggressi, benevolentia exteris fa-
cta, & abeundi facultate concessa, victoriam sequi
coegere. Nec Zaremba, suorum clade audita, diu
tenuit, sed Polonicam quoque felicitatem suspi-
ciens,

Zolkevi-
us Suecos
& Moscos
vincit.

ciens, ad deditio[n]em se ipsam humiliavit.

Lissovius Moscovia rastat. Alia parte, Lissovio Duce, Poloni, totam vi-
ctoriis Moscoviam peragabant. De cuius Ducis
militiae moribus, mira Petricius. *Mora fuit*
Histor: Rerum Poloni: apud eum, inquit, *& lassitudo formidata: in aviaq;*
& remota progressis, si quis obhæsisset, ne index ubi
alij versarentur exstaret, necatus relinquebatur.
Quærere pontes vadaque illicitum: pro ut usus aut
necessitas inciderat, in altum se immittere, nihil tre-
pidanti animo, & transnatare profunda equo, aut eo-
dem amne gurgitibusque mergi necesse erat. Hoc
Et Demetrius sup- posititus. Lissovius modo intima Moscoviae viscera lacera-
bat: & citius Oppida spoliabat, quam venire nun-
tiaretur. Demetrius quoque supposititus immi-
nebat, immanis æque ac spurius. Non omnino ta-
men infelix, qui plurima, etiam circa Moscuam
Urbem, Castella occuparet.

Szuiscius imperio se abdi cat. Boiarii ergo Cnesiique, à tot hostibus in
angustias summas redacti, quo pax generalis impe-
rio toti conciliaretur, Szuiscium rogavere, Titulu
Magni Moscoviae Ducis, Reipublicæ pacique do-
naret. Fecit ille, tot cladibus humilior redditus,
facilius, quam rogabatur. Et Imperii insignia, Sce-
ptrum, cum purpura ponens, relicto quoque Pa-
latio, privatas in ædes secessit: & mox assumpto
cucullo, ad Zudnovam Monasterium, ultro mi-
gravit. Itaq;

Itaq; jam, absque Magno Duce, Moscovia
erat: nec legitimus quisquam futurus (ita quip-
pe inter Senatores convenerat) nisi qui suffragiis <sup>Moscoviæ
de novo
Duce de-
liberatio.</sup>
omnium eligeretur. Difficile fuit, cum in tres
partes divisa nobilitas, Patriarcha cum suis Basili-
lum, Basilii Galitchini Ducis, Primi Moscoviaæ
Senatoris, filium: Telephus vir nobilis, cum suis,
Demetrium supposititium: Mscislavius, vir ma-
xime authoritatis, & Polonis addictus, **V L A-**
D I S L A U M Principem, tunc temporis quindecim
annos natum, & Vilnae agentem: & jam nunc
tamen, è longinquo, virtutū & generositatis suæ
radiis, Moscorum animos affidentem, nomina-
ret. Et Patriarchæ quidem ratio potissima erat,
in ipsa Provincia potius, quam extra, **M a g n u m**
Ducem quærendum: præsertim cum non adeo
adhuc Moscovia Prudentiorum Virorum ste-
rilis esset, ut in illa Imperio dignus inveniri non
posset. In oculis Basilium, Basilii Galitchini,
primi Senatoris & prudentissimi viri, prudentissi-
mum filium esse: cui nihil, ad eminentiam
hanc, natura negasset; adeoq; Imperio admo-
vendum videri, cui, omnium judicio, nihil, nisi
inauguratio sola deesset. Sed in contrarium e-
rat, quod remediū publicis malis, & totius Impe-
rii salus quæreretur, quæ ex hac electione sperari

E

posse

posse non videbatur. Quid enim Galitchini filium ad Polonorum & Demetrij vires debilitandas, momenti allaturum? Szuiscium quoque in Moscova natum fuisse, quod si suffecisset, abdicationem ejus non fuisse postulandam.

Telephus Deme- triū sup- positiū. Telephus, quia pro Demetrio suppositio affectum potius, quam solidas rationes adduxerat, ab ini- positio statim non placuit: præsertim quia electione illam plus turbarum, quam concordiae, allatu- *Mscislavius Vla- dislaum Principē.* Mscislavius Polonorum pa- tentiam, legitimi Demetrij cæde, & rapina pub- lica Moscuæ irritatam, ob oculos ponebat: Insu- per Legatos eorum biennio integro amplius de- tentos, & non una injuria Regnum ad arma pro- vocatum. Jam à Zolkevio auxiliares copias cæsas, & Pontium Gardiam in vinculis esse. Lis- sovium intima Moscovia viscera lacerare: ipsum Sigismundum Regem, Imperij quodammodo Scutum, Smolenscum obsidere. Et quid ab omnibus hisce nisi extremam ruinam metuendā? Satius ergo videri Vladislaum Principem, cuius virtutes Regiæ passim celebrentur, in Magnum Ducem eligere: quo uno & mala imminentia tollerentur, & facile, pulso Demetrio, pax toti Imperio conciliaretur. Hęc sensentia, et si cor- da percuteret, tamen, ob ingenitum fere, in Po- lonos,

Ionos, odium, tum quidem locum non habuit.

Itaq; periculosa Moscovia scissio erat. Sed, cum salutare nihil, communibus votis statuetur, casus occasionem obtulit. Telephus enim, turbatoris ingenii vir, patefacta aliqua porta, intromittere Demetrium Moscuam statuit.

Quod Mscislavius subodoratus, Zolkevio scribit, quam posset agglomeratis passibus Moscam festinaret: in mora periculum esse. Et eam Urbem videri, quæ nec contemnenda, & si defenderetur, maximum Vladislai partibus allatura momentum videretur. Zolkevius, occasione letus, victoria circumagit arma, et, demonstratis, per Moscos, viarum compendiis, opportune adfuit, cum jam Urbs à Demetrio oppugnaretur. Itaq;, quot Mscislavius petiit, millia Urbi immisit: quæ juncta Moscis, sub Syoltifico Duce, qui jam antea Regi Poloniæ fidem obstrinxerat, tam acriter restitere, ut, eodem quasi momento, & Urbem tuerentur, & magna clade Demetrium, trans fluvium Moscum, submoverent. Tum, capti centenialiquot nobiles, quo clementiæ fama colligeretur, statim, sine Lytro, omnes dimissi.

Verissimum est, ut magnes ferrum, ita humanitatem, victoriæ junctam, mentes trahere. Se-

cuta quippe ingens statim animorum mutatio,
 & omnes, relicto, tanquam Impostore, Deme-
 trio, favorem, ut suetum est, prosperę fortunę
Omnes in
electione
Vladislai
consenti-
unt. dicaverunt. Pr̄esertim cum Mscislavius Galit-
 chino author fieret, ne Moscoviam periculo ma-
 jori exponeret, nec onus susciperet, cui par (pre-
 sertim si rursus Szuiscius affectaret Imperium)
 futurus non videretur. Post maturam delibe-
 rationem assensit Galitchinus. Et mox omnes
 Moscovię Senatores, triumphalem Pompei vo-
 cem secuti, Orientem potius quam Occidentem So-
 lem adoravere. Et ut Vladislaum Principem,
 qui jam magnus virtutibus erat, magnum ti-
 tulo quoque facerent, communibus, quod æ-
 quissimum est, suffragiis, in Magnum Moscoviae
 Ducem elegere.

Vladislai
in Magnū
Moscovia
Ducem
electio.
An. 1610
Mense
Septem: Itaq; tentorio, pro more gentis, inter Ur-
 bem, & Polonorum Castra, erecto, quo pacis &
 concordię cōmodis maturius fruerentur, Mscis-
 lavius, Galitchinus, universa nobilitas, & Patri-
 archa gentis, Vladislao Sigismundo, Sigismundi
 III. Polonię Suecięque Regis, & Magni Lithuanię
 Ducis, filio, Suecorum, Gothorum, Wandalorumque
 hēreditario Principi, tanquam Magno
 Moscoviae Duci, juravere. Zolkevius autem, no-
 mine Serenissimi Vladislai Principis, conven-
 tos

tos inter Gentem & Principem articulos, jure-jurando vicissim confirmavit. Et mox Decretum electionis, & litteras, Magni Moscoviae Ducis titulum continentes, & confirmantes, ad Sigismundum III. ad Smolenscum, in castra misit. Tum ad lætitiam versi Proceres utriusque gentis, se muneribus invicem prosequebantur. Et, post solennes tintinnabulorum pulsus, tormentorum boatus, vulgi voliferationes, ad arcem, cum Zolkevio, migravere. Ibi Sexcentis, quod dicitur, luciniarum ferculis, opipare pasti, Salutationes invicem propinaverunt. Demetrius o-
Demetrius
suppositi-
tui exitus
mnia, per Exploratores, edoctus, desertis, quas circa Urbem occupaverat, arcibus, cum suis præcipiti cursu fugit. Et ad Polonos suorum aliis, ad Moscos aliis defientibus, ipse tandem vivus in manus hostium venit, & in rheda, propria jugulatus est.

Maxima cum Smolensco difficultas restabat, Et quamvis ita Zolkevium inter & Moscos convenerat, ut illud Sarmatię restitueretur, adeo-
Smolen-
scum sub
Sehino,
pertinax.
que & suppetiæ nullæ illi mitterentur; tamen illud, sub Præfecto suo Michaële Boriszowicio Sehino, annua amplius obsidione debilitatū, ultra Moscoviam quoque pertinax, nolebat, nisi iisdem cum illa conditionibus, ligari. Post cen-

tum enim annorum (quibus Moscis servierat) obsequia, ne Polonicum esset, Moscoviticum videri voluit, & dditionem quidem, sed Vladislao Princi, tanquam Magno Moscoviæ Duci, non Sigismundo III. ut Poloniæ Regi, facere. Contra Magnus Lithuaniæ Cancellarius Sapieha nitebatur: aliamque cum illis, quam Moscis, agendi rationem esse demonstravit. In hos quippe Polonię Reginihil juris esse: in Smolenscum autem, tanquam incontroversum, ab antiquo, Lithuaniæ membrum, jus Regi, ut Magno Lithuaniæ Duci, vel Moscovia ipsa concedente, omnino competere. Quare, omissis subtilioribus rationibus, ad Clementiam Regiam potius, quā inutiles distinctiones, confugerent. Secus; non aliter cum illis, quam Rebellibus, aetumiri. Sed frustra omnia. Obfirmato enim Sehinus, ad omnem eventum, animo, pertinaciter resistebat. Praesertim cum diurna, iis in locis, & pluvialis hyems immineret, et, ebulliente paulatim Borysthene, deserturos stationes Polonos opinaretur. Si minus; Urbem esse, cum qua occumbere, non inglorium yideretur. Utrumque fere accedit. Nam, intumescentibus aquis, potiorem militem Sigismundus in hyberna deduxit: Sed, via mox hyemis asperitate, non aliter ac si respiret,

rasset, animosius, ineunte vere, iterum obsidio-
nem aggressus est. Sed resolutio Regis intra Sehi-
ni Moscorumque pertinatiam erat, quā, omnis
conatus ejus, irritus reddebat; adeoque Rex
obsidionem solvere proponebat. Tum illud me-
morable, Bartholomēi Novodworsii, Equitis Me-
litensis, Poloni. Hic, intellecto Regis proposito,
magna fiducia illum accessit. Et, ignoscat Regia
sua Majestas, inquit, quod Solus ego Regiam suam
Majestatem à proposito suo dehorter. Octo dierum
moram supplico, & pauculos sumptus, & hanc Urbem,
per Dei gratiam, Regiæ suæ Majestati tradam. Et,
quos sumptus, inquit Rex. Centum Centenarios pul-
veris, respondit. Sed, edissere rationem, ait Rex,
quomodo hanc Urbem trades. Cum Regia suæ
Majestas, Respondit, hanc Urbem primo, ante bien-
nium, obsidione clauderet, canalem ego, ferreis crati-
bus munitum, sub mœnibus animadvertis. Has ego
erates, toto illo biennio, varijs instrumentis ferreis,
frangere & tollere penitus laboravi. Et ne Mosci
(qui aliquoties me laborantem in mœnibus audierunt,
& canem esse putantes, ossa rodentem, lapidibus im-
petivere) me animadverterent, hyeme vestem Gri-
seam glaciei similem, æstate viridem gramina expri-
mentem indui. Adeoque hostes fecelli, ut sublati jam
cratibus ferreis, fossaque facta, Dei gratia, salvus suæ
Regiæ

Regiae Majestati, frustratentatum hactenus, ad disjicienda, subiecto pulvere, mœnia, ruinam hyatumque faciendum, occasionem offeram. Simule itaq; aliis partibus Regia sua Majestas assultus, & divertat Barbaros, ego interim, cū minime, & qua minime hostes putabunt, parte ruinam faciam, & subito cum delectis irrumptam; adeoq;, citra sanguinis effusionem, Regiae suæ Majestati, Urbem tradam. Rex Novodworscii Oratione letus, ipsoque collaudato, centum centenarios pulveris dari jussit, et, prout petierat Novodworscius, oppugnationem instruit.

smolen-
scum ar-
mata
manu ex,
pugnatur
Anno
1611.
4. Non.
Jun.

Itaque Anno, post Christum natum, 1611. 4. Non: Jun:, divisis, ad irruptionem, copiis, seorsim (quo æmulatio vires adderet) Polonis, Germanis, Hungarlis, Cosacis, totidem, una vice, locis, Urbem aggreditur. Dum pugnatur, dum resistitur, Novodworsius, accenso pulvere, stratisque immani ruina mœnibus, à tergo, & inopinantibus Moscis, cum delectis irrumpit, & facile Poloni, citra jacturam militum, Urbe potiuntur. Ad arcem vero pugna recruduit. Sed mox, ut fit, Clamor, strepitus, & consternatio; turbabant, animos: frangebant oppugnantium, ab extra virtus, ab intra, depascens armamentarium, templa, ædes, & omnia, ignis. Quæ cuncta, in mise-

miserorum Moscorum horrorem, nimium momentis crescebant. Ad extreum ergo cessere, & Smolenscum Sigismundo III. Poloniæ Regi, suo interitu, Poloniæ membrum permisere. Hoc eis genio famæ, in malis, indulgente, ut Urbem, inter paucas, sua strage, memorabilem facerent. Biennalis siquidem obsidionis spatio, amplius, quam ducēta Moscorum millia interiisse dicuntur. In expugnatione vero ipsa, octo millia, ferrū & flamma consumpsit. Michaēl autem Boriszowicz Sehinus, Prefectus Urbis, jucundo spectaculo, vivus in Polonorum manus venit. Quem Sigismundus III, etsi ut rebellein punire potuerat, tamen, ut Moscorum animos sibi conciliaret, in Vladislai filii, electi Magni Moscoviae Ducis, gratiam, vita denatum, captivum duxit.

Sehinus
capitn.

Parta hac tam insigni victoria, tempus reliquum Sigismundus, ordinandæ Provinciæ, & [quo Vladislao filio suo, electo Magno Moscoviae Duci, magis consuleret] Moscoviae ipsi impendit. Ne vero in absentia filii sui, quicquam in Imperio illo innovaretur, Basiliū Szuisciūm, cum Johanne & Demetrio fratribus, per Zolkevium Ducem, in Poloniā abduci curavit. Qui, insigni novercantis fortunæ ludibrio, Sigismundi Regis triumphos, in comitiis ipsis Warsawien-

Sigismundus Provinciam ordinat.

Szuiscius
in Poloniā abducitur.

sibus, cum Sehino capto, postea nobilitavere.

Jam itaque indubie, Vladislaus Princeps, le-

Vladislae gitimus erat Magnus Moscoviae Dux. Quippe,

virtutes. quod æquissimum est, liberis legitimisque o-

mniū votis, cum dignissimus omnium videre-

tur, electus, litteris publicis, & Moscorum jura-

mentis confirmatus. Et profecto, mira naturæ in-

dulgentia, prudentiorum quorūq; judicio, suffice-

re, & illi, & quantumcunq; imponere fortuna pos-

se videretur, oneri par existimabatur. Nihil ergo

Moscorū, deerat, nisi Moscorum constantia. Sed quid par-

aliū Du- levitati gentis? ad perfidiam paulatim degene-

cem cli- gentium, ravit, & publico Senatorum scelere, ex Cnesiis, si-

tevit as, & in po- ve Magnatibus, unum, Michaëlem Fedrowicz,

tonos ar- Princeps *Vladislae* relieto, in Magnum Moscoviae

ma. Ducem elegerunt. Et successu temporis iterum

Moscua Urbe potiti, multos per annos, vario

Marte, cum Polonis dimicavere, ad extremum,

eo etiam præsumptionis progressi, ut Smolenscū,

quod Alexander Gonzevius, Palatinus Smolen-

scensis, Romana virtute tuebatur, denuo obsidio-

ne premerent.

Horribi- Irritari Sarmatia videbatur, & tangi genero-

lis Mosco via deva- sitas nobilissimæ gentis. Quid ergo? Serio tan-

statio An. dem in ultionem excanduit, et, indulgentiis à Sum-

1617. mo Pontifice quoque concessis, qui sacram illam

mili-

militiam, contra Schismaticos, sequerentur, AN-
NO 1617. non uno exercitu Moscoviam ingressa-
omnia sursum deorsum miscuit. Mosci, quasi una
manu, à Smolensensi obsidione fugati, et, terro-
re deinde latius dato, Provinciae singulæ devasta-
tæ. Tum quoque Vladislaus Princeps, accepto à
Patre exercitu, Moscoviam suam ingressus est ;
lætus quod occasionem bellandi nactus esset, qua
spargere generositatis suæ indicia posset, nec otio
domi desidioso corrupti cogeretur. Et, aversari
se ejusmodi, factis ostendit, de quibus idem, quod
jure de Prætore illo Romano, Seneca : *Hic Vatia Ep. 55.*
situs est. Sciebat enim, quod non palpatur, ærugi-
ne ferrum corrupti, quod pulsatur autem & te-
ritur, candorem pariter & fulgorem oculis inti-
mare. Et hominem otio saginaque sua diffluere,
ignavia prorsus corrupti : laboribus autem &
strenue gestis ad gloriæ victiarumque radios, ad
laudabiles triumphorum fulgores, teri quodam-
modo & contrectari. Verbo, Generosus apparuit.
Hoc est (ut Seneca vult) *ad virtutem à natura* ^{Ep. 44.}
compositus. Itaque insignis fortitudine, & felicita-
te, arces & Urbes varias aggressus, quæque obvia ^{Vladislaus} _{expeditio}
subjugavit. Non Novogrodekum, non Starodu-
bum, non Czernihovia restitit. Sed integræ Pro-
vinciæ, Severia Czernihoviaque, ad ipsos usque

Præcopensum Tartarorum fines, Vladislai im-
tu expugnatæ, jugum admisere. Adeoque Vladis-
laus Princeps, continuis, expeditionem primam,
victoriis, illustravit. Post hæc nihil intactum to-
ta Moscovia fuit. Rezania vastata, Wolodi-
meria spoliata: Novogardiaæ majoris minoris
que ditiones populataæ. Transmissi, Tanais, Mo-
scus, & Volga, fluvii. Astrachani & Casani Re-
gna exhausta. Permij & Pizarri ad paupertatem
redacti. Populi ad cingulum terræ, & adorantes
Auream Anum pellibus, substantia, & divitiis suis
exuti. Ad usq; Caspium mare, glacielem Ocea-
num, & horridam perpetuis nivibus lappiam vi-
ctoriis penetratum. Verbo. Tanta Polonorum per-
tinacia & resolutione, temeraria Moscorū levitas
castigata, ut, spreto Moscoviaæ gelu, multa mil-
lia, præsertim Lissovio Duce, non ignem, non te-
cta, non domos villasve, longo temporis spatio
subierint, nisi ut aut exurerent, aut spoliarent.
Itaque tot continuis cladibus Moscovia Imperi-
um deformatum, cum nec in agris amplius villæ,
nec in villis, si alicubi adhuc casu steterant, homi-
nes reperirentur. Cum Urbes & Oppida in solitu-
Inter Po-
lonos &
Moscovis dines abiissent, & immania tantum, vastissima-
rum Provinciarum, cadavera superessent, Poloni,
concessis Michaëli quatuordecim annorum indu-
ciis,

ciis, dimissis quoque Johanne & Demetrio (Basi-
lius quippe in captivitate obierat) Szuis ciis, Sehi-
no etiam & Magnatibus aliis, juramento tamen
prius prestito, se nunquam in Poloniā arma re-
sumpturos, fessa etiam victoriis arma posuerunt; ^{1617.}
ut deinde, majori cum fructu, sub Rege Vladislao
(cui Severia Czernihoviaque Provinciæ, & Magni
Moscoviæ Ducis titulus, & jus permittebatur) re-
sumerent, & summa, perfidæ gentis, ignominia
vindictam consummarent.

Etenim, si rem penitus inspiciamus, non sine ^{Moscoviæ}
occulto quodam fortunæ sensu, ob binas potissi- ^{rebellio}
mum rationes ad gloriam tamēn Vladislai utraq., ^{in gloriæ}
hanc perfidæ gentis, in præjudicium ejus, culpam,
Superos permisso videbimus. Tum ut felicitas
ejus adversis radiaretur, &, utrum prospera por-
ro mereretur, infortunio probaretur. Sed quod
Sapienti in suis calamitatibus accidit, omnem for-
tunæ iram quodammodo reverberavit, & ante se
fregit, eandem semper faciem servavit, placidam,
& inconcussam. Quod in non modicam Vladislai ^{Sen: Con:}
laudem Ille enim qui se lætis rebus non inflavit, nec sol: ad
mutatis contrahit, aduersus utrumque statum in vi- ^{Hel:}
Etum animum tenet, exploratæ jam firmitatis. Ad-
eoque hæc illi, in infelicitate quodammodo, feli-
citas contigit, ut nosset simul & vinceret, rerum.

naturę alteram partem. Tum etiam ut gentem
inimicam, & perfidam, cum suo Tyranno, majo-
ri Vladislai gloriae & ultioni reservarent. Nec enim
triumpho, ab omnibus proptermodum sēculis in-
audito, famosissimus Regum postea evasisset, nisi
inimica gens materiam, in suam ipsius ruinam,
perfidia subministrasset.

Resurgat ergo paulatim, sub Michaële suo,
Moscovia, si resurgere est, ad prēcipitium elevari.
Resurgat, inquam, & clevetur; sed ut lapsu, quod
Claudianus, graviore ruat. Interim legitimū
verumque Magnum Moscoviae Ducem Vladis-
laus agat, Michaël Scenicum & Tyrannum: quo-
usque eo gloriae ascendentem Vladislauum videa-
mus, ut titulum, Majestati ejus minorem, ultro
projiciat: adeoque, cum Magno Pompeio,
bo non minoris gloriae, facere Magnos Du-
ces, quam vincere, judicet.

CA.

CAPV T TERTIV M.

ARGUMENTUM.

Vladislaus IV. vulnerati Patris vi-
tam servat.

SUMMARIUM.

A natura inditam Régum reverentiam esse:
hac tamen posita, in templo Sicartus Sigismundum Re-
gem vulnerat. Ictum ad verticem directum Opalin-
sci virga excipit Vladislaus, in Patrem pius, subvenit,
è periculo liberat, & Sicarium persequitur. Rex non,
nisi absoluto Sacro, à templo discedit. Ambiguus de
illo rumor, sed ubi populo se vivere ostendit, pietas
Vladislai passim collaudata. Hæc carmine ab Autho-
re concepta. Sigismundi Regis clementia, Sicarii sup-
plicium.

Quemadmodum natura commenta est Re-
gem, ita mortalium animis quandam, subje-
ctam Majestati, reverentiam indidit, ut faciem eo-
rum augustam, tacita mentium nostrarum angu-
stia, adoremus. Et recte hoc quidem secundum
Apostolum. Omnis anima Potestatis sublimiori-
bus subditas sit, non est enim Potestas nisi à Deo. Quis
ergo naturæ refragetur & legi? Non nisi, in hoc ca-
su, qui naturam ipsam, & divinæ legis reverentia
quo-

Reveren-
tia erga
Reges &
natura.

quoque posuerit. Quamobrem tam arctam humani generis, cum fastigio regali, concordiam, consensus mortalium voluit, ut lesæ Majestatis damnarit, qui verbo, ne dicam ferro, violaverit. Hoc tam grande, tam immane nefas, ut ut in aliis aliquando gentibus auditum fuerit, in observantissima Regum suorum Sarmatia, antehanc diem nunquam. Et nescio quomodo tandem tam impius, in fidelissima gente, unus inventus fuerit, qui sacrosanctam, hac ex parte, Poloniam, Regis parricidio primus deformare conaretur. Noshoc nobilitati Sarmaticæ, & familiæ, dabimus, ut non men Sicarii (nec enim nominare fas est) suppri-
mamus: ut hac saltem ratione, quasi in Polonia, nunquam fuisse videatur. Res est.

Sigismū-
dus III.
VVarsa-
rie ad sa-
erum va-
dit.

Piissimus Sigismundus Rex, ut erat Catholice religioni addictissimus, ita ipsi laudabili more inveteratum, Sacrificio Missæ prius Deoq; varcare, quam ullinegotio Regni, se applicaret. Itaq;
cum Warsaviæ ad templum procederet, Sicarius:
Sed quis ille? si familiam sp̄cetes, nobilis; si mores, mortalium perditissimus. Saltem unus ex illis,
Sen. Epi. de quibus recte Cordubensium decus, qui multa
73. Principibus debent, sed multa eis imputant: quibus
nunquam tam plene occurrere ulla liberalitas potest,
ut cupiditates illorum, quæ crescent, dum implentur,
exsa-

exsatiet. Satis enim constat hunc pessimum Par-
ricidam, licet mente captum, maximis, à munifi-
centissimo Rege, beneficiis affectum fuisse, & cui
singularia, præterquam, quæ nobilibus aliis in
communi præstantur, contigerant. Sed memoria
minimum tribuit, quisquis spei plurimum. Lethen
fluvium liberat, & beneficiorum oblitus, in pra-
vum omnia vetterat. Vere Seneca. *Quemadmo-*
dum stomachus morbo viatiatus, & colligens bilem,
quoscunque accepit cibos, mutat, & omne alimentum,
in causam doloris, trahit: ita animus cæcus, quicquid
illi commiseris, id onus suum, & perniciem, & occasio-
nem misericæ facit. Talis, inquam, hic nefarius,
benevolentiam & pietatem Regis, in occasionem
sui maleficij vertens, foribus abditus, asperatum
saxo malleum, rostrato mucrone, in caput (hor-
reo dicere) prætereuntis Regis attollit; opportu-
no tunc flagitio, cum Vladislauum Principem, Pri-
moresq; sequentium, occupatos & sustinentes à
tergo turbam, ipse etiam, porta paulum ad limen
adducta, moraretur. Sed ictum, fallente manu,
levi tantū genæ vulnere, bis in humerum manu-
brio illisit. Tertium jam ad verticem directum
obversus Lucas Opalinscius, Marschalcus Curiæ,
virga retinuit, infregitque. Plures parabat, cum
ad nuntium rei Princeps Vladislauus accurrit:

*Sicarius
Regem
vulnerat.*

An. 1620

G

quem

Vladisla-
 us Sigis-
 mundum
 patrem
 servat.
 quem ut Sicarius vidit, metu nefarium subeunte
 pectus, relicto vulnerato Rege, fugit. Sed vindicandi Patris (cui, opportuno adventu suo, salutem, dubio procul, attulerat) piissimo studio ardens, fugientis, acinace Turcico, terga sequebatur, et, inflieto percussori vulnere, in frusta concidisset, nisi alii, non commiseratione scelesti, sed quo suspecti latius sceleris indicio reus servaretur, indignantem, & precibus, & amicabili complexu cohibuissent.

Detesta-
 tio scle-
 ri.
 Lib. 7 de verba. Ecce nescio quae non ex Philosophorum domo
 ben. clam, sed ex medio conventu, populos gentesque dam-
 natura vox mittitur:
 Subeunt animum, immani istius flagitii oc-
 casione, verissima, efficacissima, & prorsus quasi
 innuentia tam grande nefas, Romani Philosophi

Non hospes ab hospite tutus.

Non sacer à genero, fratrum quoq[ue] gratia rara est,
Imminet exitio vir conjugis, illa mariti.

Hoc jam amplius est. Beneficia in scelus versa sunt: Et
sanguini eorum non parcitur, pro quibus sanguis fun-
dendus est. A subdito in Regem, pro dolor! vidi-
mus: tam herculè innocentem, ut si ingratum
excipias, in cujusque subditorum suorum sinu
tuto potuisse dormire videretur.

Jacebat interim ille humiç quippe interea,
dum

PARTIS PRIMÆ, LIBER I.

51

dām Vladislaus Princeps Sicarium persequere-
tur, per leve lubricumque pavimentum, gravi
lapsu conciderat) & h̄erentibus cunctis, cum au-
xilium, periculi cujusque, aut suspicionis, tarda-
ret metus, lēsa aliquamdiu Majestas attonitis spe-
ctaculo fuit. Tandem primus Johannes Kalin-
scius, adiuvante per manus Bonaventura Roga-
scio, acceptum medium terræ adlevat. Accurrit
& Johannes Zebrzydovius Ensifer Regni, simul-
que voce, manu, stricto gladio, detestatur scelus.
Hæc autem pietas, etiam in hac miserabili facie
rerum, Regis erat, ut non, nisi peracto Sacrificio,
eduici templo voluerit,

At jam ambiguus, sine authore, rumor, Ur-
bem pervaserat: & aliquod grande nefas admis-
sum quilibet sciebat, quale esset nesciebat: cum
sibi quisque pro fantasia, quod non acciderat,
scelus fingeret, & diversa invicem suspicarentur.
Inde in publicis viis, incerta quærentium pari-
ter & respondentium, sermones varij. Donec
tandem constanti fama innotuit, esse Sarmatiæ
Regem à Sarmata vulneratum. Qui, o, tum con-
cursus! quis tumultus! Res, inaudita hactenus,
prodigio similis visa est. Et, ut est gens suo affe-
ctissima Principi, ploratu omnia miscuit, cum
quasi mortuum fleret, quem vivere non compe-

Ambiguus
Varsavia
rumor;

G 2 risset,

risset. Et quamvis ab aulicis, esse absque periculo Regem, & in melius valetudinem ire, spargere tur; tumultus tamen sedar non potuit, nisi oculis omnium probaretur. Quid itaque e Rex ipse Sigismundus, ut incredulam æque ac piam plebem absolveret, abstergo sanguine, in publicum prodiit, & aspectu mutuo, plebi, in columnatatem propriæ demonstravit. Tunc, decretis per tempora donis, actæ Deo publicæ, crebris orationibus, gratiæ: genus armorum, quo necem Regis parricida tentaverat, editio publico, vetitum & abrogatum. Præmium sublevanti à Regina torque aureus, & triginta festertium millia: à Senatu autem, bona percussoris, dono data.

*Vladislai
pietas
laudata.* Vladislauum interim Principem, tanquam defensorem Regis, Servatorem Patris, & publicæ pietatis exemplar, quilibet intuebatur. Et jam non adeo de vulnere Regis, quam affectu adolescentis, sermo erat: & maximum aliquando futurum, qui jam & à puer magnus omnibus erat, & Magnus Moscoviae titulo, & maximâ pietatem ostenderat, omnes ominabantur. Nec sine exemplo omen erat: quia & olim Scipio, prætextatus admodum puer, adversus Annibalis ferrum, Patrem Scipionem defenderat, & postmodum maximus, & Africanus, & Patre major evaserat.

Pro-

PARTIS PRIMÆ, LIBER I.

53

Profecto Sarmatia illi Sigismundum Regem, Sigismundus debebat filio vitam: non sine imminentium Paterno Sceptro filiorum dedecore: Nuper sic cecini.

Nero quisquis erit, vel quisquis Domitianus
More fuat sevo: quem diri pectoris atrox
Propositum cruciat, cognati sanguinis urnas
Fundere purpureas; adeo positog pudore,
Imperij causa, pravaque cupidine Regni
Cædibus immitem tetricis juvat esse Tyrannum.
Hic (immanc nefas!) naturæ legibus ipsis
Ruptis, nec fratri parcer, nec utroque parenti.
Sæviet ut regnet: fluat unde sanguis ad instar,
Viscera scindantur matris: Pater ipse veneno
Evomat infelict animam: dum Sceptra Tyran,
Auspicio infelix diro, scelerata capessat.
Osmanidæ faciunt: præcedunt funera fasces
Impia sacrilegos. Immani barbarus ausu,
Sanguinis oblitus genitricis, per mare rubrum
(Impulsu flatu præpostero ab ambitionis)
Navigat ad Portum Regni. Procul este maligni
Phalarides, Scythicig procul discedite mores.
Scipio Sarmaticis exortus nuper in oris,
Prætextatus adhue, rhomphaea jam Genitorem
Protegit, Annibal is diro mucrone petitum:
Gratus in exemplum. Felicem dicite gentes,

G 3

Quem

Quem non regnandi studium, de tramite legis
Naturae pepulit: quique expectare Parentis,
Et fatum, & Sceptrum potuit, non precipitare.
At Vladislaum miraculum dicite gentes:
Nereget, juvat esse pium, servare Parentem.
Cæterum ut mirabitur virtutem illius sera poste-
ritas; ita parricidæ scelus, execrabitur toties, quo-
clemen-
tia sigis-
mundi. tias occurret. Præsertim cum & ingratitudinem
hujus, & raram Sigismundi clementiam confide-
rabit: tum quoque in Sicarium se exerentem.
Lib. 7. de Clem. apibus, inquit. *Rex ipse sine aculeo est. Noluit illum Natura, nec sævum esse, nec ultionem magno cō-*
statur ampetere: telumque detraxit, & iram ejus in-
errem reliquit. Exemplar hoc magnis Regibus in-
gens. Est enim illi mos, exercere se in parvis, & in-
gentium rerum documenta minima agere. Imitari Cle-
mentissimus Sigismundus voluit, & more opti-
morum Parentum, qui maledictis infantium,
suorum arrident, beneficia etiam in percussorem
suum congerere. Itaque nec acerbum quicquam,
nec indignum locutus, Parricidam in animo suo
absolebat, & velut innocentia donans, pro per-
cusso, suas apud Senatores preces interposuit.
Sed aliter, ad justitię normam, visum Primori-
bus. Et quamvis nefarium palam mente captum
consta,

PARTIS PRIMÆ. LIBER I.

55

constaret, hoc tamen veniam illi & misericordiam omnem exemit. Quid ergo? Quæstioni subiectus, nec tortura, nec igne, nec ullis pænarum experimentis, conscientium tanti sceleris aliquem nominavit. Magnum profecto innocentiae Sarmaticæ experimentum, quod percussorem ejusmodi, ante hanc diem, neminem suorum habuerit: unicum hodie solum: nec hunc fortassis, nisi insanum. Quamvis tamen & sic ille, in læsa Majestate Regis nimius. Ergo judicio publico damnatus, exemplo omnibus & spectaculo de-stinatur. Et primo quidem arreptum lictores, in obviis viarum capitibus, noxias facinerosi carnes, candenti ferro lacerant, & deductum extra Urbem, in fastigato, erecto ad hoc ipsum, Theatro, aptatam, malleo rostrato, dexteram, flammis adurunt, nudisque jam fluentem ossibus, cum leva amputant. Inde, admotis quadrigis, distentum alligant, & in diversum concitatis equis, in partes quatuor convulsere: quibus ad extrema combustis, cineres in aërem dispersi. Faxit Deus, ex illis nunquam ejusmodi Sarmatiæ Phœnix, in posterum, enascatur.

Partis Primæ, Libri Primi Finis.

GE-

GESTORUM

VLADISLAI IV.
PARTIS PRIMÆ

LIBER SECUNDUS.

ARGUMENTUM.

Vladislaus Osmanum Turcarum Imperatorem vincit.

SUMMARIUM.

Turce qui: discordia Christianorum proficiunt: Origo belli Valachici. Gratianus unde, & quis. Gratianus Valachæ Princeps: ad Polonos deficit, Zolkevius in Valachiam movet: fortissime sepius cum Turcis pugnat. Gratiani interitus. Zolkevius inter continua prælia Poloniæ versus movet, & tandem, ob suorum dissidias, cum quinq; millibus occiditur. Prodigia in Polonia & metus. Sigismundi Regis circa bellum sollicitudo. Hotkevicium Zolkevio successorem facit. Hotkevicius Lubomirscio in Valachia se conjungit. Osmanus Achomati succedit: adulatoribus aurem præbet: cum septingentis millibus in Valachiam movet, Trecentorum Cosacorum fortitudo. Cosaci se Polonis jungunt. Vladislaus Princeps in templo Warsaviæ vexillum in Turcas accipit. Omnia victo-

victoriae. Warsavia ad Tyram proficiscitur: Exercitui de victualibus providet. Hotkevicio se jungit, ejus, in varijs oppugnationibus, virtus. Magna & horribilia prælia. Cosacorum in castra Turcica irruptiones. Hotkevicius, licet æger, ad prælium è lecto surgit, pugnat, & vincit. Karacassius Bassa in castra Turcica venit. Terribilis Polonicorum castrorum oppugnatio: Karacassius cum quatuordecim millibus interficitur. Hotkevicius moritur, cuius munia Lubomirscius obit. Generalis & ultima Polonicorum Castrorum oppugnatio. Vladislai virtus. Osmanus desperabundus à Vladislao Pacem petit. ignominiosam ipsi, gloriosam Poloniis impetrat. Turcae priores discedunt. Vladislaus cum magna gloria in Poloniam reddit: Osmanus autem Constantinopoli interficitur.

TUrcarum ignobilis Scythica gens est, & vel ab antiquo ad Caucasum Montem, à vicinis contemta, ab Europæis, admodum curiosis, vix solo nomine cognita. Et profecto omni compositione corporis ad servitium natis, nescio quo fato acciderit, imperare. Latis quippe Schapulis ad sarcinas ferendas accomoda, pusilaniitate ad bellum inhabilis, prorsus mancipium à natura refert. Et quo uno nomine formidabilis est, abnegantium Christi fidem, gentium robore habet. *Qui, & unde Turcae.*

Discor-
dia Prin-
cipum
Christia-
norū pro-
ficiunt.

Salust.
bello Iu-
gur:

Digresio
ad bellum
Valachi-
um.

ne sic quidem aliquando futura vietrix, nisi discordia Principum Christianorum, integra prius Imperia, quam ipsorum ferocia dissolvisset. Pronum erat nuda Provinciarum latera, mutuis sauciata, dissidiis, ad casum, vel levi concussa motu, tandem perducere. Ita Armenia, Mesopotamia, Syria, Palestina, Asia minor, sive Natolia, Trepezuntium, Græcia, & Ægyptus, cervices submisere. Adeo ut verissimum sit, quod filii suis Mieipsa: Concordiares parvas crescere, discordia res maximas labi. Cæterum qui populi dentes, quod dicitur, ostendere, vel morsu levi laceratam, abegerunt. Castriotus & Huniades, copiis non adeo numerosis, sexaginta sæpius, octoginta, centum, immo & trecenta millia cecidere. Ad unam Hungariam, quod mirere, jam à seculis fere tumultuatur. Cessit tamen, post Schander-Begum Epirus, & Hungaria mutilata, ex parte Turcica est. Una, contermina gentium, & infesta Barbaris, Polonia inviolata persistit: non quia impugnata non fuit; sed quia concors, fortis, & felix. Maximum vero, quod habuit unquam, discrimen, à levibus Valachis habuit. Et discrimen cæpit cum dissidium. Verum enim vero, ut rem penitus inspiciamus, occasio nem belli, Valachiam, breviter perlustremus.

ontra

H

Vala-

Valachia duplex est. Qua Tyram & Poloniā ^{Valachie} respicit, à modico, quo irrigatut, Moldava fluvio, ^{descrip-} Moldavia nominatur. Qua, ab Oriente, ultra mon- ^{tio.} tes est, Valachię nomen retinet: quamvis subinde & Transalpina vocetur. Ceterum hæc tota Regio, libera primum, inde plurimorum dominio va- cillare, ad extremum labi cæpit. Defuncto Ste- ^{Eius dissi-} phano, primo, post Bazaradum, Principi, duo, ^{dia, &} Stephanus & Petrus, filii fuere. Stephanus jus Pri- ^{Polonia} mogenituræ, Petro, turbido adolescenti, vulgifa- ^{vectigalis} vor, Imperium promittebat. At quod in eiusmo- di casu fieri assolet, tumultuorio plebis motu, Pe- trus prævaluit. Stephanus, vectigalem Casimiro Magno Valachiam promittens, hujus opera, ad fastigium paternum evasit. Ceterum Petrus, ma- xime post Casimiri mortem, proniori ad pacem, Stephano infestus, tumultu sæpius omnia popula- ri miscuit, & occasionem Turcis, Bulgariam, Ser- viam, & quicquid à tergo, occupandi præbuit. Exterriti iterum, vicino periculo, Valachi, in Po- ^{a Turcis} lonorū rursus clientelam concessere. Sed Post ^{subjugas-} liminio, ad veteres, de successione, turbas revo- luti, altera Provinciæ parte, Valachia proprie di- cta, à Turcis mutilati fuerunt. Et Moldavia sola restitit Polonorum ope. Postquam vero Maho- meti secundo Cōstantinopolis, & quicquid super-

erat Græciæ, cessit, tunc demum & ipsa ad Turcas
conversa est. Hinc vetus, Sauromatas inter & Tur-
Hinc ve-
tus inter
Turca: &
de Vala-
chia,
qwestio.cas, de Valachia, quæstio: illis legitimi Dominij
jure repetentibus: his ferro partam, ferro defen-
Polonus, dentibus; & ad majorem securitatem, pro suo
arbitrio Principes, attamen Christianos, præfici-
entibus. Poloni, et si armis jus suum prosequi fa-
cile sæpius potuissent, tamen, & ob expertam sæ-
pius Valachorum perfidiam, & quia omnia prius,
Gratia-
nus Polo-
ni spem
recipien-
da Vala-
chia fa-
cit.quam arma tentanda ducerent, cautius & lentius
procedebant: donec tandem Gratianus, ad extre-
mum & ipse perfidus, ostentata occasione, recipi-
endæ ex voto Valachiæ pruriginem afflicuisse.

Erat Gaspar Gratianus Græcii in Styria na-
tus, mediocris ingenii vir, ad opes tamen & divi-
Quis ille
Gratia-
nus.tias parandas proniore. Has quia assequi, in Pa-
trio Solo, non adeo erat proclive, cum grandiore
natu fratre, ejusdem ingenij viro, domestica pau-
pertate pressus, Constantinopolim migravit. Ce-
terum coëmendarum gemmarum, & alibi distra-
hendarum studio tenebantur. Quod ut felicius
paulatim successit, lucro compendioso illecti,
Constantinopoli sede locata, per Christiana pari-
ter, & Mahometana Regna, ut spes lucri, animo
concepta, impulerat, vagabantur. Ita Gratianus
in Italiam quoque delatus, venundatis, Magno
Hetrus-

Hetruriæ Duci, mercibus, ex occasione callidus, ad aliud animum vertit, ex quo, præter Lenocinium lucri, gratiæ quoque publicæ plurimum, à Turcarum præcipuis, aucuparetur. Videbat Liburni non ignobiles domi Turcas, ad triremes, ut mancipia contempta, damnatos, intollerabili labore vexari. Horum ad octoginta præcipuos, ut plurimum Constantinopoli ortos, stipulata pecunia summa, redemptos, ad propriare vehehit. Obstupuit Constantinopolis Christiani factum, & quod avaritia erat, misericordiam interpretabatur. Igitur ad insolentiam rei commota Urbe, quasi momento, portus & littora complebantur. Et dum inter mutuas natorum & consanguineorum congratulationes tumultuatur, rumor ad Achomatem Cœsarem deferebatur: qui, accessum Gratianum, cum fidum sibi putaret virum, Ducatu Naxiæ & Bissacensi donavit. Inde, imperata ad Mattheiam Christianorum Imperatorem, legatione, quia ex voto perfecerat, redeuntem Valachia auxit. At Gratianus originis suæ memor, ut tacito præsentem fortunam sensu mirabatur & adorabat; ita inconstantiam ejus & ludibriaverebatur & metuebat. Et poterat hoc meritissimo jure, ut qui infaustos Turcarum, & breves in Christianum favores; & infida, levia, & novos subin-

Ejus cal-
liditas.

Valachia
Præcep-
titu-
itum.

Ad Polo- de anhelantia Dominos, Valachorum suorum in-
 nos defe- genia nosceret. Quapropter, perinde Turcarum
 gationem favori, quam fidei Valachorum diffisus, ut alias
 parat. vires potentie Turcarum opponeret, eodem, quo
 ante subfuerat, jure, & se, & Valachiam, Polonis
 subjicere statuit. Quod ut eo commodius face-
 ret, de Turcis identidem oblique loquendo, &
 Polonus veteres elevando Dominos, nobiliores
 Valachorum & mobiliores, in partem traxit; &
 per hos Valachiam prope universam. Præsertim
 cum veterum Dominorum memoria nondum e-
 viluisset, & æquitatem tributi, Polonis olim pen-
 sitare soliti, & Turcarum immodicas exhausiones
 perpendent. Quid ergo Gratiano Valachia-
 aderat, Gratianus Polonis, dummodo recipere-
 tur. Quod ut fieret, alia gravis causa & sere neces-
 sitas Polonus urgebat: Sed quæ originem traxe-
 rat ex eadem Valachia. Quamvis enim publice,
 Causa quib⁹ Po- ante Gratianum adhuc, quasi neglecta fuisset, ta-
 loni ad men privati nobiles, indignabundi quod non af-
 recipiēdū Gratianū sereretur publico sumptu, privato repetierant,
 moveba- tur. Et inter alios tam feliciter Dux Corecius Samuel,
 ut victis, non uno prælio, Turcis, gravi rabie A-
 chomatis Cesaris animum commoveret. Ad ex-
 tremum tandem, cum publice desereretur, cæsus,
 in manus hostium venit. Cum vero, paulo post,
 aliis

alius, collectus quoque privatim exercitus, in Vǎlachiam introduceretur, & iniuriate fortunae, ad Dziezam fluvium circumventus, paludibus, sylvis, insidiisque, clausus, ad internationem, die tota concideretur; ita animus Mahometanis crevit, ut, quasi Pǎloniam, in tantillo exercitu, delevissent, ad debellandam, si ita visum Superis, omnino animarentur. Ceterum quia, restineto privatorum bello, causa illis in publicum minus suppetebat, ad antiqua revoluti, Zaporoviensium Cosacorum incursionses obtendebant. Sunt autem Zaporovienses Cosaci, ad Borysthenem vagus, infra Kyoviam, populus: qui, postquam, pulsis Tartaris, Tomakowkam, & alias Borysthenis Insulas occupavit, opportunitate prædaque allectus, Ponto Euxino se credidit, & Pyratica ad divitias crevit. Hos compesci, à Polonię Rege, Turcæ volebant. Et interim ipsi Tartaros in fertilia Podolię & Volhynię loca immittebant. Itaque utrinque querimonię. Ad extremum, ut controversiæ dirimerentur, à Turca Skinder Bassa, à Polonis exercituum Generalis Stanislaus Zolkevitis, Commissarii constituantur. Tum illud insigne Georgii Sbaravii Ducis, qui Barsada Oppidum publicæ paci donavit. Cum enim prolatis Skinder Bassa, Imperatoris sui litteris, quibus, nisi Barsada cis Axiacen, hoc est,

est, parvum Borysthenem, Oppidum dirueretur,
re infecta discedere jubebatur, ostenderet. Ne

Ex patrio. **Dij siverint**, Georgius inquit, *ut per me vestra* \mathcal{E} *Reipublicæ Pax distineatur. Deferam mox in planum*

Bersadam. Patria illic causa \mathcal{E} *cura vacabit.* Et

subjecto, per Piascovium, igne, delevit. Sed patuit per postulata ejusmodi, tentari Sarmaticam,

Semel & iterum, inter Polonus & Turcas, frustra pax tentata. patientiam potius, quam pacem peti. Quippe jam Turcæ nihilo mitiores, injurias Cosacorum, Poloni ut persequerentur, instabant: callido dolosoq; consilio; ut illos, cū Poloni exasperavissent, præmiis & libertate promissa, per defectionem, in eosdem averterent. Sed patuit dolus, et, re infecta, ab invicem discessum, Cosaci vero, vulgata de suo excidio fama, in Mohometanos atrociores, non jam proxima mari littora vastare contendi, interiora Turcarum exscindere sunt aggressi:

tanta audacia, ut Constantinopolim ipsam suggressi, Imperatorem Venationi vacantem, intra mænia trepidum payentemque compellerent. Capi & abduci potuisse, si festinassent, arguento est; quod, incendio deletis suburbii, Thracica

præda graves, ad naves & propria impune migrarint. Tartari cum has clades vindicare velle præsumerent, Podoliam & florentissima Russiæ late-

ra, urebant, vastabantque: sed tot cladibus fere, quot

quot incursionibus, ad sua rejecti. Itaque cum vetera utrinque redirent. Zolkevii iterum & Skinder-Bassæ conventus. Sed omnia vafrities Turcæ, & mutatione rerum discussit. Quippe jam, pro Achimate Cæsare, Osmanus filius imperabat, Osmans, ferocis ingenii adolescens, & pro ætate incautus, Achoma-
ti succes-
dens, fe- qui vix vigesimum annum attingeret. Insuper improvidi adolescentis animus, à Legatis rebel- rocius in
Polonos. lium Ferdinandi Secundi Imperatoris Romani, propria causa, in Sarmatas accendebat. Haud perinde formidoloso sibi futuro Germanorum Cæsare, si Poloni per acies distinerentur. Quid ergo; Oſtinovium, super firmando fædera, Constantinopolim, à Sigismundo Rege missum, ab aula Osmanus, à conspectu, ab Urbe repulit; & jus eatenus gentium, & legationis Sacra violavit. Hoc in Annū, post Christum natum, 1620 incidit, cum spem inter & metum Gratianus tumultuaretur.

Cum ergo Polonis Bellum præ foribus esset, an in tutelam Valachia cum Gratiano recipienda, supervacuum videbatur discutere. Gratia-
nus à Po-
lonis re-
cipitur. Conditionibus certis admissus est, & in Patrocinium ille libens concessit. At jam Skinder-Bassa, non Commissarius amplius, sed belli Dux, Osmanijussu, militem colligebat. Et tanquam

non cum Polonia tantum, sed Valachia quoque bellum gesturus, extra suspectæ Provinciæ limites, attamen in propinquuo, delectus habebat. Omnia à vicino anxius speculabatur Gratianus; & jam spe, fiducia, metu, ratione, subinde fluctuans, non uno modo distrahebatur. Aliquando, alio translatis opibus, circumspicere fugam; aliquando, conscripto exercitu, & Polonis juncto, Mahometanis cuspidem ferrumque obvertere: quandoq; etiam, cum nondum omnem veniat spem, apud Osmanum, præcisam crederet, ad obedientiam ipsius, proditis Polonis, redire meditabatur. Præsertim cum Turcas (quos honoris quodammodo gratia, sed revera ut secretiora ejus rimarentur consilia, circa se habebat) nondum, ulla contumelia affectos, abegisset.

Dum hæret, dum incipit, dum desistit, dum mutat, dum affectus varij, tractum in diversa animum, lancinant, jam, accito Dialet Gereo Galga, Chami Reguli Scytharum fratre, & Kantiro, cum numerosis Tartarorum copiis, ingenti exercitu Skinder Bassa appropinquabat.

Tum vero Gratianus, vicino incendio magis sollicitus, cum metuere, quibus consilia jam ejus patebant, Turcas nimium quantum inciperet, necessario (nisi quidem perire omnino vellet) Polonos

*Skinder
Bassa in
Valachia
movebat.*

II. 11

lonos respexit. Et hi quidem jam septem millia congregati, Stanislaum Zolkevium, Generalem exercituum Duce, & Cancellarium Regni, non conditionibus, ut ante, cum Skinder Bassa, sed armis disceptaturum, quoquo duceret, sequebantur. Cæterum apud Sarmatas dubium erat, an in limitibus Regni hostem opperirentur, an superato Tyra, in Valachiam & aliena transirent. Sed cum Gratianus, viginti millium stipulato exercitu, insuper Turcas extenuando copias, quæ centum millium erant, paucorum millium faceret, prior Sententia sedit, & posterior locum, cum applausu omnium, habuit.

Itaq; Zolkevius, cum prius se, cum Johanne filio Rubiescoviensi Capitaneo, Sigismundo Regi, si ita visum Superis, & Sarmatæ piamentū obtulisset, Tyram copias, insigni militum alacritate, traducit. Illico Valachiam universam, prona in majus semper & mendacium fama, perambulat, Polonus jam terra potiri, & numero ex exercitu, armorum quodam diluvio, Moldaviam inundavisse. Fecit, verbo suo, Gratianus callide, famæ & mendacio fidem. Et præcipites, in temeraria arma, Valachi, Turcas, qui circa Gratianum adhuc, opprimentes, subito trucidavere. Verum enim vero non detestabilis omnino audacia Va-

Et Zol-
kerius in
Valachia
mover.

Iachorum fuisse, si idem ad perseverandum, qui
ad incipiendum, animus hæsisset. Sed mox, pau-
citate Polonorum cognita, pænitentia ducti,
cum ipso Gratiano suo, fluctuavere. Nam & ipsi
paulatim Polonos deserere, & hic, Chocinium,
conterminam Russiæ arcem, flectens, quomodo,
per Pokuce, in Germaniam fugeret, circumipi-
cere cœpit. Sed præoccupavit Zolkevius ea con-
silia, & vana, inter inutiles moras, responden-
tem, severioribus litteris ad castra vocavit. Qui-
Gratia-
nus in Ca-
pucinis
busterritus ille, certo si abnuisset, exitio, paruit:
& paucis suorum comitatus, ad Polonos acce-
dens, mutua invicem simulatione lœtitiæ, fraudi-
lita um est. Zolkevius autem circumspectus
Imperator, de rei summa sollicitus, sincerum
Skinder Bassæ exercitus numerum, expiscari sta-
tuit: efficaci ad hoc, sed frustraneo, tum quidem,
Stratagemate usus. Cum enim Gratianus Sobrius
calliditati minus pateret, convivio primoribus
Valachorum exceptis, propinari vinum largius
imperavit, ratus, quod fieri assolet, post solutum
curis animum, sequuturam mox intemperi-
am linguæ. Sed hac parte Gratianus impenetra-
bilis fuit: utpote qui exercito, per mercaturas,
ingenio, inter cetera Mercurii sacra, tacere didice-
rat. Onus ergo Castrorum Gratianus porro, nul-
lum praesidium erat.

Tan-

Tandem ad Cetforam, vetera Johannis Zolkevi-
moscii Castra, Zolkevius, cum suis, ingressus est: us, ad Ce-
& Odrzyvulsio exploratum misso, Vallum &
Fossas interim, dirutas partim, & vetustate colla-
psas, reparari jussit. Quod à militibus, Gratiani
fallacia, procul abesse simulantis hostem, tradu-
ctis ea ignavia factum est, ut etiam, quod intem-
pestivis fatigarentur operibus, cum murmure,
palam indignarentur. Sed Odrzyvolscius trepi-
dus, inseguente hoste, in Castra reversus, non in-
ertiam modo discussit, sed, ad opus perficiendū,
mutuam exhortationem induxit. Nec hostis tunc
quidem certamen ausus, nocturna meditatione
Belli, ad futurum prælium, militem acuebat.

Ut primum autem, discussa caligine noctis, Prima
Phœbus lucem Europæ gentibus attulit, priores
Turcæ, & Tartari, vix dimidia tamen sui parte,
quadragesima millia congregati, in aciem coge-
bantur. Nec detrectavere Poloni certamen. An. 1620
16. Sept.
Polonoru
victoria

70 GESTORVM VLADISLAI IV.

mis, impetu tam opportuno subvenit, ut & repoen-
teret hosti, eodem momento, periculum, & veli-
tes, vacillantes antea, ad ultionem accenderet;
adeoque, eadem vehementia, Tartari, verteren-
tur in fugam, quā, ad victoriam, venerant. Et jam
exitium hostibus imminebat, nisi pernicibus e-
quis fecissent, ut deessent, qui cæderentur. Cre-
vit hoc successu Polonis animus, & imperfecta
victoria quodammodo irritati, ut absolverent,
justi prælii aleam à Chilarchis suis, & Zolkevio,
flagitabant: tam importune, quasi in crastinum
raptaturi prælium, nisi ducerentur. Et jam Zol-
kevius cum Tribunis, an committendum præ-
lium, deliberabat, cum errabundus Tartarus, à
vigilibus interceptus, centum millia hostium
adesse primus dixit, & affirmavit. Ea res non mo-
dice, cum Ducibus aliis, Zolkevium ipsum tur-
bavit, & in maturorem, futuri prælij, aleam, de-
liberationem traxit. Sed inhærebat proposito
miles, qui nullatenus tantam multitudinem ho-
stium credebat, quia non yiderat, & si fuisset,
quur fugientem ejus diei aciem non restaurasset?
Animum præterea faciebat, Zolkeyij virtus, et,
raro quodam Cælestium munere, nunquam in-
terrupta hucusque felicitas: nec inassueti, vel in-
fatuati, rapti sunt, inq[ui]ntur. Mosco,

Moscovia nuper, parva suorum manu, ingentes copias debellare. Zolkevius autem nihil de fortuna præsumere, & omnium circumstantiarum momenta considerare. Tandem, cum procul à domo, seu differret pugnam, seu anticiparet, subsidium nullum speraret, & annonæ caritas, incassum moras trahentibus, immineret, ardore & ferocia militum uti statuit: præsertim cum primis ausis, aut metum hosti, aut fiduciam gigni, non ignoraret. Militibus igitur, ad corpora curanda, dimissis, de sanguine hostium, & victoria cogitare jussit.

Postera die, simul ac illuxit, inclusa duobus carraginibus acies, ad hostem processit. Tum vero & Turcae & Tartari, in acies congregati, quo uno pugnandi genere valent, in Polonos impetu incurrere. Sed, Theophilo Sembergio, tormentorum fulmine, hostem percellente, pari, à Sarmatis, violentia, sunt reieoti: tanto Tartarorum damno, ut difficilior ipsis, per cadavera suorum transitus, quam per exercitum esset. Inde, in aperto campo, pugna. Sed, multitudine abundante Turca, maiori Polonorum periculo, cum, inter Primores, Zolkevij duo, inclinantे restituentes aciē, telis frequentibꝫ obruti, equis, vindictam spirantes, defluerent. Samuel Korecius, autem

secunda
Polonorū
victoria,
sed diffi-
cili, &
cruenta

17. Sept.

non

non ita pridem, Constantinopoli, captivitate elapsus, ultricia, in Turcarum cuneos, arma circumculit, & inimicis suis immersus, qui consereret secum, singulari certamine, manum, acie tota quæsivit, &, cum fremitu, nullum invenit. Konecpolscius, primus, post Zolkevium, Dux & Collega, ubi Vexilliferum circumventum, à globo hostium, vidi, præcipiti inter hostium tela cursu fertur, & duobus, manu propria, trucidatis, Signiferum aquilamque Polonam servavit. Inde prælium anceps, varium: cum, dissoluta carraginum una, periculum ad Polonos rediret. Mox obfirmatos utriusque partis, in mutuam lanienam, milites, tenebræ diviserunt. Non infelix Polonis prælium videri poterat, cum Turcarum tria milia quingenti, Sarmatarum non nisi quinquaginta trecenti cecidissent: nisi, in tantillo numero, cæforum etiam paucitas æstimaretur.

Panicus
timor in
castris Po-
lonicis.

Inde Sarmatarum castra panicus timor invasit: cum nox, pervagilium, tenebræ, diurni prælii difficultatem, in metum curamq; intenderent. Augebat Tartarorum, inassuetæ pertinaciæ pugna, qualem antea nunquam expertos se meminissent. Insuper tot hostium millia, formidabiliori, quam antea, numero, mentem complebant. Facile illis suorum jacturam esse, cum Hydræ illi,

illi, totidem quasi, quot refecarentur, capita, in prælium renascerentur. Illos à tam paucis conteni impossibile videri, se, si adversum quid contineret, quasi unico ictu, refecari posse. Hæc omnia obscuritas & caligo noctis, nova novaque semper imagine, in majus porro fovebat. Quæ deinde ilucentes dies, quasi in exitium imminens, alternabat. Ingessit opportunum tandem, Gratianus, flagitiosæ & erroneæ menti, scelus. Quippe ille, cum, præsentium rerum diffidentia, vereretur, ne traditus Skinder Bassæ, controversiam belli, supplicio suo componeret, medium se trepidantibus intulit, & aggregando pericula, ut suum evaderet, fugam suasit. Patere recto per Pokuce, aut per Transylvaniam, obliquo itinere, ad Penates, redditum, se, si sequerentur, Duce fore. Alliciebantur his, faciles per metum, animi: & nihil, ad cætera, deerat, quam opportuna flagitio nox. Quæ ubi paulatim obscuritate pudorem obduxit, Gratianum timidiissimi quique: hos, velut amentiæ quodam contagio, constantiores, ad Hierassum, seu Prutum fluvium, sequebantur. Et jam clamantium & tumultuantium murmur, ad Ducum, & Zolkevij aures ferebatur: qui, quid ageretur, Gratianus cum multis Polonis

K

fuge-

fugit, & fugerent, nec persuadere Imperio, nec authorita-
interfici-
tum.

um, & proprium cuiusq; periculum persuasit. Interim, qui proximi Gratiano fuere, aut Hierasso amne absorpti, aut in adversum littus eluctati, à Scythis, & Valachis trucidabantur. Solus Gratianus exitium, quod evaserat, ad breve tempus, latebra distulit. Quippe unius Valachi tugurio, spe præmij, abditus, mox ejusdem perfidia trucidatur. Hoc unum ei, post mortem, indulgente fortuna, ut mors ipsa, in Proditore vindicaretur. Cum enim Valachus interfecti Principis caput, Alexander, qui Osmani jussu jam Gratiano successerat, deferret, non præmio eum, non favore dignatus, simili in Proditorem ultione pensavit.

Nulli dubium erat, & expugnari, ea nocte, ab hostib; potuisse castra, & copias potuisse deleri. Sed tutatus est tunc quidem Deus & fortuna Polonos: & aliam potius Tartaris Turcisq; mentem, quam Sarmatas invadendi, dedit. Cum autem turbatio, pœnitentia, dolor, & quædam animorum verecundia invicem & confusio, inhabiles ad pugnam copias reddidisset: tum illud callide, à Zolkevio Duce, inventum, ut injecta spe quadam concordia, totos integros octo dies, Skinder Basfam, tractationum simulatione eluderet, & exercitum

citum interim & omnia confirmaret. Postquam nihil amplius irreverentia militum erga Duces, nihil discordiae invicem, nihil in exercitu confusione advertit, Classico milites ad Concionem vocavit. Tum venerabilis ille canitie rebusque gestis Milites ad redditum in Patriam adhortatus, ferro per confertos egrediendo hostes, ad tunc propria remeare persuasit. Quippe satius esse, si secus accideret, vel gloriosum in acie mori, vel, si faverent Superi, in Sarmatiæ suæ limitibus, pro salute Patriæ suæ excubare: quam in perfidæ Vallachiæ finibus, & siti, & fainæ, & inutili morte consumi. Inde caput suum, si aut dandus, aut hauriendum sangvis, in omnem fortunæ aleam devovit. Verbo. & multum, in senili pectore, non consilij modo, sed virtutis etiam virere ostendit: & constantia, nullique periculo cedente vultu, ad iter & alacritatem exercitum universum confirmavit. Itaque nihil jam, confirmatis ad omnia, deerat, nisi imperare.

Zolkevius ergo, præsenti militum alacritate usurus, extra Vallum, Munitionesq;, copias univerosas educit, & ad vesperam. 29. Septemb. ordine Poloniam versus movet. composito iter ingreditur. Tum demum delusos se tractationibus hostes sensere, et, tanquam ferro pudorem vindicaturi, ab omni latere circumfundebantur. Sed, fœda clade rejecti, ad opor-

tuniora, inutilem violentiam, distulere. Transf-

undus erat, mediâ noctis, Zolkevio fluvius: di-

Variis in locis constrictus, ferro viam facit. media ergo copiarum parte, Polonica infestare agmina pergebant: dimidia, ad alteram, qua transeundum erat, fluvioli Ripam, præveniebant.

Quis non, sic interclusis copiis, debellatum dixi-

set? evaserunt. Turbabantur quidem, primo im-
petu, fluitantes, labantesq;, Polonorum ordines:
mox tamen, totis connixi viribus, cum gloria per-
rupere contrarios, & ad alterius quoque diei au-
roram, inter infestas subinde, & inopinatas Bar-
barorum incursiones, viam continuaverunt. Tum

Eiuspe- riculū & 1. Octob. vero profundam intrantibus vallem, vix spatio consistendi dato, tota Skinder Bassæ manus, in Victoria. subjectos, è superioribus jugis, quasi Cœlo missa

descendit. Aderant omnia ad terrorem composita,
tympanorum pulsus, tubarum clangor, armorum
fragor, totiusque exercitus clamor: quæ omnia
in formidinem multiplicabant, pro vario Mon-
tium Valliumque situ, repercussæ voces. Et jam
Barbari, non quasi ulla tenus rejiciendi, sed exhorta-
tionibus mutuis, ad certam, conceptam animo,
lanienam, præcipites in Sarmatas ferebantur. Se-
cius accidit. Poloni enim, in orbem se colligen-
tes, & quotidiano periculo cautiores, è jugis mon-
tium Tartaros Turcasque pronos; adeoque impo-

tentes equorum & sui, hastis, telis, bombardis, omniq[ue] armorum genere, certo Barbarorum exitio, excipiebant: sic ut nihil temerarijs fuerit, & audacioribus reliquum, nisi perire. Polonorum autem inconcussa acies, per hostium cælorum cadavera, pedetentim progrediebatur, et, ingenti tandem gloria, in tutiora cacumina montium, felix evasit.

Non erat quod feceret amplius Skinder Bas-
sa, cum hoc, quod certissimum videbatur, non successisset. A violentia ergo ad dolum conver-
sus, ad Duces, facta modestia, mittit. Non inter-
necinum cum Sarmatia Bellum geri. Satis gloriæ si-
bi, si Valachiam recuperatam, suo Domino redderet:
proinde conditionibus agerent. Satius esse stipulata
Pace, cum fructu ad propria, quam periculo suo redi-
re. Patebant Zolkevio fraudes: Sed quia, à tot
laboribus, erat necessaria militi quies, compen-
dio duxit, vicissim simulare. Ad speciem ergo
Christophoro Drusbicio missō, ipse interim mi-
litem, optata refocillatione, ad imminens, quod
suspiciabatur, prælium animabat. Providentia
Ducis saluti fuit. Skinder Bassa enim, detento
Christophoro, recentes jugiter copias accerse-
bat. Inde, sufficienter confirmatus, in Polonos,
prima diei vigilia, ut putabat, improvisus ruit.

Sed, spe sua deceptus, pari, qua venerat, violentia retroactus, non nisi pudorem & cladem domum retulit. Nec tamen ideo Zolkevium, ad vesperam rursus moventem, insequi & impugnare destitit. Sed tumulum stativis ejus imminentem, adulta jam die, præoccupans, Sarmatas Sagittis arcebat. Cæterum, per continua prælia, ad audendum etiam aliquid, lixæ & calones erecti, in clivum entebantur, et, mirum! deturbatis hostibus, obtinuerunt.

Aderat jam quarta Octobris dies, & novum quidem, ut consueverat, sed prælium longe gravissimum. Poloni enim immensam planitiem, & undecunque insessam hostibus, ingredientes, in omnia difficultia simul incidebant. Terra erat aquarum egens, et, qui tenui alveo præterfluebat, Reuta fluviolus, à Turcis insidebatur. Pulvis insuper, prætergressæ æstatis ardoribus, solutus, & tenuis, cum a vento & equitibus moveretur, in ora ferebatur. Itaque, quo ad incommoda & circumstantias loci, novæ hic iterum Cannæ. Sed longe Skinder Bassa aberat à felicitate Annibal, & Zolkevius ab infortunio Pauli. Quamvis enim Turcæ, vento, pulvere, opportunitate, pugnarent, Poloni tamen, cedere nescii, è carriginibus, necessitate, & quodammodo ex desperatione pugnabant. Et

Polonoru
periculū
& victo-
ria.

virtu-

virtutis & constantiæ comes fortuna aderat. Hostes enim tam animose repulsi, ut præcipiti cursu se recipientes, obstantes è suis occiderent, ut ignominiosæ fugæ viam facerent. In hoc tam periculoso Certamine, ut mirabile poterat videri evadere; ita miraculo proprius erat, vicisse.

Tum demum desperatio hostes invasit, & Polonus, ferrea pectora, inexpugnabiles, insequētis diei silentio, & languido tympanorum tubarumque sonitu profitebantur. Itaque, cum octo dierum itinere, & continuato prope certamine, Skinder Bassa, cum centum suorum millibus, in tam pauca millia, nihil effecisset, & jam ad Tyram non nisi stadia quadraginta restarent, stultum duxit, tanto cum suo dedecore, diutius quodammodo Pædagogum agere. Quare cum Dialet Gereo Galgā, mœstus, ubi tum erat loci, remansit; solo Kantiumiro, modica copiarum parte, postremum carpendo agmen, domum euntes, prosequi jussò.

Sed nihil auctum tam insigni virtute, tot præliis, tot victoriis, tantoque favore Cœlestium. Quippe tot, ab uno hoste, triumphos, ad extremum Sarmatæ, una fatali discordia & seditione, corruperunt, nec ob ullam aliam causam se ipsos in exitiū præcipitavere, quam quia se evaluisse credebant. Ob direptas, in Gratiani fuga, & confusio-

Turca de
victoria
desperat.

Seditio in
Polonorū
castris.

ne ex-

ne exercitus, à lixis quibusdam, militibus sarcinas, in limine patriæ tumultuabantur. Urgebat Zolkevius, Tribuni, & Centuriones, paucarū horarum iter, dum superassent Tyram, absolverent: tunc jure legitimo, per otium, agi posse. Frustra. Jam enim in rapinam mutuam rixæ adoleverant: nec pessimæ simul ac inverecundæ rei, quæ post-
habita reverentia Ducum, flagitosè cäperat, mo-
dus inventus est. Ad extreum, nocte, inter quin-
tam & sextam Octobris, media, nefas! fugiunt
raptore, & cujuscunq; sceleris sibi conscia mens
signa deserit: obvia tamen pœna: cum Tartari a-
lios, prædagraves, occiderent, alios Tyras in pro-
fundum raperet. Insuper Kantimirus, ex trans-
fuga seditionem intelligens, accersitis Skinder-
Bassæ, Galgæ, & Valachorum cohortibus, animis
viribusque discretos, ab omni parte aggreditur.
Et resistebant utcunque, primo impetu, Sarmatæ:

à Turciis
interne-
tione de-
nocte, in-
ter . &
6.Octob.
media. ad extreum tamen, tenebris, multitudine ho-
stium, et, quod maximum erat, suāmet confusio-
ne vieti, obruebantur. Quæ tum, ô Superi! Zol-
lentur, kevio mens? Quis animus? Pudebat victoriosum
tot annorum senem, ultimum hoc abominabile,
nefas, per seditionem, perditæ rei. Quid ergo?
Ne vivus caperetur, se frequentibus hostium telis
objectans, mori voluit; ut hanc saltem parte, cate-
nus

nus de hoste triumpharet, quatenus ludibrio exi-
meretur. Factum est: Hoc ad ultimum glorioso
facinore, quod Centurionem, oblato equo, sub-
levare volentem, abegerit, & frameā inflicto vul-
nere, equum repulerit. Inde, ubi densissimæ ho-
stium manus, contendens, mutilatus dextera, i-
gnorantia demum nocturna, oppressus est. Ko-
necpolscius ejus collega, & fortissimus Chiliarcha
Hermannus Dönhoff, integrum adhuc victoriam
morabantur. Sed mox Tribunus Dönhoff, cum
plurimos non ignobiles Turcas propria manu sua
confecisset, ab irruentibus, velut in ultionem, un-
dequaque hostibus, pluribus licet vulneribus &
trucidando obvios debilitatus, pugnans tamen
adhuc animansque suos, occisus est. Magnus pro-
fecto Heros, qui, in plurimis expeditionibus fortis
semper, victoriosus sæpe, ad Cetsoram, paulo an-
te, indubie Polonum exercitum fortitudine sua
servaverat, dignam familiæ suæ, ad armanatæ, mor-
tem, pro Republica tandem subiit. Eo imperfecto
circa unum Konecpolscium universæ hostium vi-
res. Et ille Zolkevum Dönhoffiumque, ut virtu-
te, ita fortuna vitaque, sequi volebat. Sed ipsorum
hostium insigni Stratagemate factum est, ne mo-
rereretur. Cum innotesceret enim Ducem esse, qua-
si ad prædam conversi, neglectum in acie deserunt,

Zolkevi-
us inter-
ficitur

Herman-
nus Dön-
hoff cedit

Konec-
polscius
capitur.

& submisso interim gnaro linguae, qui, simulata fide, ductorem itineris fingeret, in preparatas infidias & captivitatem deduxere.

Hæc est illa, inter paucas, nobilis, Polonorum Zolkevii clades. Hæ Sarmaticæ illæ Thermopylæ, ubi Sparcaput tani illi, devota ab ingressu Valachiæ, fidei, Patriæ, Skinder-Regique capita, occubuerunt. Cœterum, exorto Bassæ of fertur. die, cum ad spolia discurreretur, agnatum inter cætera Zolkevij cadaver, capite mutilatur. Quod ad Skinder-Bassam delatum, aliquamdiu ejus oculos pavit: seu Majestate vultus in longiusculum stuporem raptus: seu vicissitudine felicitatis humanæ in considerationem abreptus: seu etiam, quod, morti proximus, meditatione ejus, occulto ipso naturæ suæ Genio instigante, ultimo hoc edito opere, detineretur. Ut ut sit, pauculas duntaxat Zolkevium septimanias supervixit.

Zolkevij laus. Ethi cest Stanislai Zolkevij exitus: Ducis, sua ætate, militaris rei scientia, nulli secundi. Prima, sub famoso illo Johanne Zamoscio, cognato suo, militiæ rudimenta didicerat: tam feliciter, ut, eo defuneto, in Generalem exercituum Ducem, inde in Cancellarium succedere mereretur. Moscovitico postea Bello, parva manu, numerosas fundere copias suetus, Basiliūm Szufiscium, cum Johanne & Demetrio fratribus, Sigismundo Regi ad

ad triumphum præparaverat. Domesticis porro
inimiciis, usque ad ultimam; & fatalem hanc
expeditionem, conflictatus, tandem pro Patria,
flagitio suorum desertus, invictus cætera, cecidit.
Sed recte Seneca. *Laus Imperatori etiam victo,*^{Lib. 7. de}
Ducire redditur, si prudentia, industria, forti-^{Ben.}
tudo, muneribus suis functa est.

Interim Sarmatia male habebat, cum sub
ignoto vulnere pessime laboraret. Nihil de suo-
rum exitio sciebat, quamvis jam prudentiores a-
liquid adversi suspicarentur. Alij insectatum
quidem exercitum, sed, victis difficultatibus o-
mnibus, salvum ad sua redire, disseminabant.
Alij obsessum à Skinder Bassa exercitum, sed re-
sistere fortiter, subsidij spe: quod ipsis adducere
non adeo difficile videretur. Alij, silentio rerum,
vel quod ab aliis aliquid jam ipsis acceperant, de-
letas copias, fidelioribus sibi, aperiebant. Unde
mox ingens, ut sit, per Templa, per Compita, per
fora, rumor: quem subita in Russiam, victoriae
suæ licentia, Turcarum & Tartarorum irruptio,
tandem confirmabat. Ingens inde, per univer-
sam Polonię, metus, quem Turcæ, immisis per
Urbes & Oppida incendiariis, quibuscunq; po-
terant modis, augebant. Sparsa Cracovię, per
plateas, in partes dissecta cadavera; ut alibi digi-
Varij, de
exercitu,
in Polon-
ia ru-
mores
Metus &
prodigia
per Polo-
nię

ii, pedes alibi, brachia & nares alibi, nusquam tamen capita reperirentur: perinde ac si Regnum à Turcis, cum Author & occisi ignorarentur, beneficiis & devotionibus peteretur. Aderant & Naturæ, vel à Deo immissa prodigia. Crebri & frequentes Leopoli, Cameneci, Luceoræ, Halicci, horridiores etiam per Valachiam, terræ motus. Rupti ibi aliquot montes tumuliq; sedere: ut, ubi juga fuerant, jam, horrendum specus, & aquarum scaturigines viserentur. Hæc rumore ipso in immensum aucta, proclives ad credulitatem & inania mentes, novis subinde & pessimis imaginibus variabant. Schismatici, Unitis infesti, ne mortuis quidem parcentes, Divina humanaque miscebant: et, inter alia, Josaphatum Konczevicum, Polocensem Archiepiscopum, posito pudore, Vitebscii, summa crudelitate, trucidarunt; Deo, sanctitatem Viri, miraculis postea prosequente.

Inter hos tumultus & hæc Reipublicæ vulnera, Sigismundus Rex, neutriquam desperans, erectus stetit. Et de remediis recte sollicitus, in Publicis Regni Comitiis, Johannem Carolum Hotkevicum, Palatinum Vilnensem, Generalem exercituum, per Lithuania, Ducem, Virum Moscoviticis, & magis Livonicis victoriis clausum,

rum, in Zolkevii Locum, Poloniæ quoq; Generalem nominat: & Stanislaum Lubomirscium, Wisnicensem Comitem, Collegam ei adjungit; Virum fortitudine victoriisque probatum, & vel maximè insigni liberalitate præditum; quippe non immemorem hujus Senecæ. *Nunquam ma-* De Vit.
gis nomina facio, quam cum dono. Supremo Can-^{bea.}
cellariatu, Zolkevii quoque morte vacantem, Andream Lipsicum Luceoriensem Episcopum ornat. Decretum insuper adversus Turcas, sexaginta millium exercitu, bellum gerere. Tum per totius Poloniæ Regiones delectus habiti, & inhibitum, ne quisquam militum, auro argentoque cœlatus, quod alias familiare Polonis, in castris compareret.

Dum hæc autem in Sarmatia geruntur, interim in Turcia non feriatur. Summa autem rerum, post Osmanum, in Hali & Skinder Bassis erat. Et Skinder Bassa quidem, difficultatem victoriæ pensans, & minuta prælia multa, in unum magnum, summamque rei contrahens, alienus à Bello, Pacem suaserat. Hali Bassa autem, Præfectus aulæ, inexpertus Belli, uno in Polonos odio formidabilis, per adulationem eos saepius ad aurem debellabat; adeoque primum Osmanni adolescentis, ad Martem, animum, facile expugna-

*Osmanus
adulato-
ribus au-
rem pre-
bet.*

bat. Præsertim cum Skinder Bassam, inevitabile
fatum, ad plures transtulisset. Tunc enim Osma-
nus ferociæ suæ relictus, post tantillam, de Sar-
matia, nuper victoriam, debellandi studio fere-
batur. Accendebant jugiter Hali Bassa & adulatores:
esse Regnum accessu facile, nullis monti-
bus clausum, insuper præsidio, novissima' clade,
nudatum. Nihil amplius desiderari, quam nu-
merosissimo illud exercitu quodammodo inun-
dare, & sui juris facere: nemine præterea, post
Skinder Bassæ mortem, ruenitem in prælia juve-
nem, retinente. Vere Sapiens Romanus. *Omnia*
sane excluderit opulenta felicitas: monstrabo tibi, cuius
rei inopia laborent magna fastigia, quid omnia possi-
dentibus desit. Scilicet qui verum dicat, & homi-
nem, inter mentientes, stupentem, ipsaque consuetudi-
ne, pro rectis blanda audiendi, ad ignorantiam veri
perducunt, vindicet à consensu concentuq; falsorum.
Non vides quemadmodum illos in præceps agat extin-
cta libertas, & fides in obsequium servile submissa,
dum nemo ex animi sui Sententia suadet, dissuadet q;
sed adulandi certamen est, & unum amicorum omni-
um officium, una contentio, quis blandissime fallat?
Ignoravere vires suas, & dum se tam magnos, quam
audiunt, credunt, attraxere supervacua, & in di-
scrimen rerum omnium per ventura Bella: utilem &
necessa-

Lib. 6. de
Ren.

necessariam rupere concordiam: secuti iram, quam nemo revocabat, multorum sanguinem hauserunt, fusuri novissime suum: dum vindicant inexplorata pro certis, fletique non minus existimant turpe, quam vinci, & perpetua credunt, quæ in summum perducta maxime nutant.

Hac adulantium sibi corruptela Osmanus ^{Vniuersitas Imperii sui vires con-} quoq; depravatus, fiduciâ debellandi, jam quasi ^{sas Imperii sui vi-} in titulis numerabat Sarmatiam, quam nondum ^{res con-} attigerat. Ut autem in Provinciæ formam redi- ^{trahit.} geret, tanti tamen æstimavit, ut universum, Vastissimi sui Imperii, corpus commoveret. Itaq; per Asiam, Africam, & Europam, delectus habebantur. Ægyptus, Arabia, Syria, Pontus, Natio- lia universa, Græcia, Macedonia, Thracia, arma, militem, apparatus, expediebant. Accerseba- tur (non, nisi ad præsentiam Turcici Imperato- ris, castra sequi suetus) Dziambet Gereus, Ma- gnus Tartarorum Chamus. Et jam (ut fama re- fert) ad septies centena millia hominum, ad pa- rem Xerxis exercitum, Constantinopoli miles conveniebat. Quicquid toto Imperio virium, quicquid Janizarorum & Mamaluchorum, quic- quid alibi roboris erat, comparebat. Aderant ad magnificentiam & terrorem, peregrinæ Belluæ, Elephantes. Camelorum vero & jumentorum innu-

innumerabilis multitudo. Diceret Tamerlanem vel Attilam revixisse, & Orbem debellatum iri. Profecto qui aderant adulatores, tum vel maxime, ad inauditum antea apparatum, fallacius obstupuere: prorsus eodem modo, quo, de Xer-

Lib. 6. de Ben. xe, Seneca. Alius aiebat non laturos nuntium Belli, et, ad primam adventus famam, terga versuros. Alius nihil esse dubij, quin illa mole non vinci solum Sarmatia, sed obrui posset: magis verendum, ne vacuas desertasque Urbes invenerint, & profugis hostibus vastae solitudines relinquenterunt, non habituris ubi tantas vires exercere possent. Alius, illi vix rerum naturam sufficere, angusta esse militi castra, explicandis equestribus copiis campestria, vix patere Cœlum satis ad emittenda omni manu tela. His similibusq; vocibus animatus Osmanus, credulus & incautus adolescens, his portentosis copiis, ut præoccuparet Danubium, agglomeratis passibus, Vla-
chiam versus movebat.

Vladisla- us affe- ctat ad- vers' Os- manum mitti. Et jam fama adventantis Potentissimi ho- stis Poloniā pervadebat; cum Vladislaus Prin- ceps, electus Magnus Moscoviae Dux, hunc, suo parem animo, deposcere hostem, & Osmanum hunc, alterum veluti Xerxem, sibi à Patre Sigis- mundo debellandum permitti, rogare non de- *Senec. E- pisi. 39.* stitit. Habet enim hoc in se generosus animus, quod conci-

quod concitatur ad honesta. Neminem excelsi ingenij Virum humilia delectant & sordida: magnarum rerum species ad se vocat & extollit. Sigismundus Parens, Generosissimi filii precibus, ut flectetur, adductus est: cum & singularem ejus indolem, virtutem, fortitudinem, perspectam haberet, & felicitati adolescentis quoque à puerō multum confideret. Itaque, cum Stanislaus Lubomirscius, promptioribus copiarum assumptis, Tyram præoccuparet, & transitum Polonis, ab utraque fluvii parte, munitionibus, si quid hostis moliretur, firmaret: cum Johannes Carolus Hotkevicius, incertum consilio, an quod hostem tanti non æstimaret, alias, Jaroslaviæ, nuptias celebraret, ad bella & prælia se præparavit. Deletus fortissimorum, non plurimorum, militum, ratus multum ab exercitu turbam distare, sedulo procurabat. Quorum cum octo millia in armis haberet, jam non ulterius cunctandum ratus, itineri se accinxit.

Priusquam autem Urbe egrederetur, istius non immemor, à Jove principium, Summum Warsaviæ Templum, pro felici expeditionis eventu, vota facturus, ingreditur. Tum vero populus tota Urbe concitari: circumfistere aras: complere sacraria, portas, vestibula, Scamna, &

M editio-

In templo editio *ralloca, quacunque aspici poterat, cum li-*
Vexillum tigio, præoccupare: in Vladislaum corpora ora-
in Turcas accipit. que pretendere: & interim, dum pascerentur
oculi, fiduciam inter & metum, sollicitudinem
inter & spem, animo tumultuari. Subibat enim
Osmani Imperatoris potentia, exercitus Turcici
ineffabilis multitudo, campus Sarmatarum san-
guine frequenter imbutus, & sub Stanislao Zol-
kevio, bellicosissimo Viro, novissima, fortissimo-
rum militum, clades. In hæc omnia, tam infau-
sta, tam ardua, tam periculosa, & eventu summè
dubia, modicis hisce copiis, adolescentem im-
mitti. In contrarium rursus variabat animos, per-
specta adolescentis, à puerō, indeoles, & stupen-
da virtus: inde militaris rei, supra ætatem, com-
parata scientia, cui confidere plurimum, ab hác
emanantes victoriæ, docuissent. Insuper, divino
Cœlestium munere, fluentia ex voto omnia, ob-
latum ultro juveni, quam speratum erat, à Mo-
scis Imperium: Verbo: nullo unquam infortunio
bellico corrupta & interrupta felicitas. Inter
hanc mentium & rationum luctam, Franciscus
Diottalovius Nuntius Apostolicus, Sacrificium
Missæ peragebat. Quo propemodum jam finito,
admotum altari juvenem intuens, omnia illi, à
Domino exercituum, Deo, felicia, fausta, fortu-
nata,

nata, solenni precatione, & astantium omnium votis, expetiit. Inde, benedicto adolescenti, vexillum consecratum, in eoque triumphalem tesseram, & victoriā præscriptam, cum hoc vere Christiano lemmate, *pro gloria Crucis*, in manus tradidit. Accedit amplius Christianam turbam, lecta in vixillo causæ pietas, & egredientem Ecclesia Principem, votivis acclamationibus prosequebatur: ambigua interim, cui eventui, cui fortunæ permitteretur: redditumne aliquando cum victore exercitu; an ultimum jam & supremum videns, prosequeretur.

Sed mox omina non infelia scrupulos extenuabant. Vix, relicto limine templi, publicam ingredienti viam, mulier obviam progressa, auspicium boni eventus, binos panes obtulit. Quid aliud hoc, nisi prosperorum fertilitatem, & non unam, geminata felicitate, victoriam portendebat? Vultus, inter allapsum populi fluctusq;, adolescenti plenus sui, prosperæ gerendæ rei fiducia latus, & quasi victoriam & triumphum spirans; insuper animos omnium, discussis angustiarum nebulis, spei serenitate illustrans, quid aliud erat, quam occultum, triumphantis in corpore Genij, felixque præsagium? Certissimum erat, quia contrarium Osmano acciderat.

omnia
victoria
circa Vla.
dislauum.

*Omina
sladis
circa Of-
manum.*
 Constantinopolim ille tristi, & in prodigium
 rugosa facie egressus erat. Terruerat eum Patruus
 Mustaphas, cui in somnis saepius Osmanus visus,
 quem prodigosæ magnitudinis serpens persequen-
 tur. Ipsi met Osmano, nocturna quiete, obver-
 sata Patris feralis imago, minas intentaverat: egre-
 dientique, cui maxime insueverat, pavidæ è somno
 mulier, ac si profusum manantemque cruento vi-
 disset, illecebris metuque adhæserat. Dissuaden-
 tem insuper expeditionem, insigni probitate vi-
 rum, iratus occiderat, immemor eum Osmanum
 quoque nominari. Ibant ergo in invicem, ætate
 propemodum & statura pares, cæterum armis, a-
 nimis, omnibusq; diversi, adolescentes: relin-
 quentes, quo se inflexura felicitas esset, Terrarum
 Orbem, sui exspectatione, suspensum.

*Osmani
dolus.*
 Interim Osmanus, per Capudzi Bassam, Ve-
 vellum Italum Candensem, Christianum licet,
 compositum tamen ex astutia & calliditate vi-
 rum, cum litteris, ad offerendam pacem, in castra
 Polonica miserat: vel quo promptiores ad bel-
 lum Sarmatas, injecta concordiaz spe, segniores
 redderet: vel quo metu, ut putabat, territos, ad
 eas, quas ipse proponeret, pacis conditiones, invi-
 taret. Sed Lubomirscius, in castra non admisso
 Vevellio, omnia ad Hotkevicii adventantis præ-
 senti-

sentiam distulerat. Hic autem, postquam cum Lubomirscio sese conjunxit, Theophilum Szembergium cum litteris Vevellio addidit, & Osmano, non esse, nec fuisse unquam Poloniam, à pace, alienam, indicavit.

Hotkevicius autem, in utrumq; sedulus, licet Szembergium pro pace dimisisset, necessaria bello non minus providebat. Quoniam vero, ad summam rei, non parum facere judicabat, Cosacorum, cum exercitu suo, conjunctionem, eos continuis nuntiis accersere non desistebat. Illi autem repugnabant, nisi Tyram copias universas traduceret, & juramento, nullatenus pacem aut fœdus Regem & Rempublicam Polonam initaram, nisi iisdem conditionibus reciperentur, caveret. Alterum, fide obligata spopondit: alterum opere ipso statim adimplevit. Hotkevicius enim, ipsius etiam Sigismundi Regis jussu, exercitum, qui præter Vladislai Principis octo millia, non nisi septendecim millium erat, decimo septimo Kalendas Septembbris, in alteram Tyræ ripam, in Valachiam, ad Hotimum Oppidum, vacuum tunc, &, præ timore, desertum, transtulit: postquam octavo Idus Augusti Lubomirscius antevenisset.

Castra deinde locata, ut à peritissimo militari

Polonico- rium rerum, Duce, loco maxime opportuno. *Ter-
rum ca-
strorum di-
ffosatio.* gum tutum faciebat Hotimum Oppidum, arce, in prærupto & excelsa sita, munitum. A fronte planities fundebatur, eliciendo hosti, conserendæq; pugnæ, oportuna; coercita tamen prolixitate, nimia multitudini inutilis, & in qua uti se toto hostis non posset. Lævum latus ad Tyram fluvium protendebatur: ad cujus propinqua, valles, & humus modo depressa, modo elata, inæqualiter sinuabatur. Dexterum virgulta pone internata, sylvasque, & cavas etiam vias, sinusque habebat, struendis occultandisq; insidiis aptos. Istud Hotkevicius sumpfit. Lubomirscius in dextero consedit. Media Vladislao Principi relicta sedes.

Hic suo, quem secum habebat, exercitu, ad *Vladislau-* Tyram, ut erat avidus conficiendæ rei, jam quo-*us provi-
det ne* que pervenerat: & protinus in Hotkevicii castra *Turca in* concessisset, nisi providentia illi non nihil cunctari *Sarmati-* suasisset. Verebatur ne, viribus in unum collatis, *amruant* per sublicium, à Turcis confectum, pontem, Of-
manus partem sui exercitus, in Sarmatiam subinde immitteret, & indigenas, pro quibus servandis in prælia proficiscebatur, Turcæ depopula-
rentur. Insuper ne à fronte se cum exercitu præ-
liante, Barbarorum incursionibus aditus occupa-
rentur, & eatenus Sarmatis à tergo subsidium &
penu

penu clauderetur. Quā provide hoc & prudenter! Jam in istud consilium, à Bernavio Valacho, vetus in Polonos odio, & per frequentia Podoliae latrocinia claro, persuasus Osmanus propendebat. Sed hac Vladislai Principis cautela, insuper nuntiata Kantimiri clade, et, paulo post, paucorum Cosacorum fortitudine retardatus, sententiam in pejus flexit.

Kantimirus, antequam, quem maxime abesse volebat, Vladislaus Hotkevicio sese coniungeret, aliquid audendum ratus, quinque selectis simorum Tartarorum millibus, Hotkevicii castra accessit. Tribus millibus, adversam Lubomirscii castris, sylvam occupavit. Duo millia, ad Tyræ marginem, destinata Zaporoviensibus Cosacis castra, celeriter transire, & à latere inopinatos Polonos agredi jussit. Factum fuisset, nisi Piotrowscius, tum forte ab excubiis Tyræ rediens, in illos, jam transgressos fossam, fortuito incidisset. Ad erat ergo huic, quod primum hostile apparuit, pugnandi necessitas: sed periclitanti, excitati, per tumultum pugnæ, viciniores, subsidio venere. Tum vero, promptissimo quoque deleto, cæteri in fugam versi. Acrior cum Lubomirscio pugna fuit. Jam enim Kantimirus oppugnatum venerat Lubomirscii castra, ne periculum à leva immensus, à distractis, impetu suo, Polonis, adverteretur.

*Kanti-
mirus ex-
stra Polo-
nica ag-
reditur.*

tur. Sed, illis duobus millibus, cum clade, reiectis,
 Lubomirscius non sustinens se oppugnari, edu-
 cens copias in apertum prorupit. Tum vero tam
Pertimax
Tartaro-
rum pu-
gna.
 acris, continua, et, praeter Tartarorum morem, pertinax pugna, ut vir viro, pes pedi conjungere-
 tur, & alterum alter amplexus, mutuis vulneri-
 bus sternerentur. Immo Tartarorum unus inven-
 tus est, qui, per confertissimos Polonorum ruens,
 non ante pugnare desiit, quam, perfracto capite,
 ante ipsa munimenta concideret. Lubomirscio dedecus videbatur, tam diu cum vili hoste pugna-
 ri. Ut ergo insigni aliqua virtute, imposterum i-
 psi confidentiam demeret, denuo, ut ipsius seque-
 rentur exemplum, animatis militibus, sua cohorte,
Insignis
corum
Clades.
Anno
1621.
31. Aug.
 quasi recepto spiritu, in pertinaces invehitur.
 Reliquæ ipsius copiæ, exemplum Ducis imita-
 bantur. Quid porro? Cessere Tartari, & ad syl-
 vā denuo versa fronte, hunc à tergo pertinacię suæ fructum reliquere, quod tecto late cadaveribus campo, eundem sanguine suo purpurarint.

Osmanni
presum⁹
ptio &
Tyrannis.
 Vevellius interim, Szembergium circumdu-
 cendo, à Polonicis ad Osmanni castra, ab invicem non nisi sedecim Leucis distantia, migrando, vi-
 ginti & unum dies insumpfit. Novissime, passim ludibrio habitum, ad Oismanum perducit. Hic, immane! quantum facilitatem Polonorū, ut me-

tum

tum acceperit: non aliter ac si debellasset, quos ad concordiam pronus videret. Ergo, quasi peracto bello, finem incōstantiæ perfidiæq; vindicta facturus, Valachos, quos, ob innatam ipsis levitatem, cōtemnebat, omnes trucidari jubet. Quadringenti ferme, quos vescētes simul dies, simul quietos nox habuerat, diversis tentoriis, à Turcis, extracti, intersectique. Nec Alexander, Princeps eorum, eandem & ante se Principum sortem evasit. Exitus ejus eam causam famamque habuit, quod prohibere transitum Polonis in Valachiam & Hotimum firmare præsidiis omisisset. Peracta hac cæde ferrox, quasi parta ingenti victoria, triumphabat: non considerans, facile esse inermes captosque occidere, & fere idem quod Martialis:

Barbam vellere mortuo Leoni.

Cœterum hanc intempestivam & insipientem quodammodo ejus ferociam, centum triginta, sed armati, sed in acie, Cosaci humiliavere. Horum quadraginta millia, subsidium bello, & debitum Imperatoribus Polonis ferentes obsequium, per Valachiam appropinquabant. Quacunque vero ibant, cædes, populatio, terror; adeo late, ut Alexander, paucis ante finem suum diebus, Urbem Valachiæ Jassum, omni fortuna, apparatuque belli instructam, præ metu deseruerit. Sed ea, à Cosacis

intacta, ab ipsis Valachis direpta est: nam Cosacorum populatio cauta, intra Oppidum Sorokam stetit.

Jam vero memorabile illud, & inauditum ha-
ctenus ab ulla gente, paucorum Cosacorum, for-
titudinis & virtutis exemplum, posteris consigna-
Paucorū
Cosacorū
prodigo-
savitus re aggrediar: & vereretur, propter insolentiam sui, fidem alibi inveniret, nisi scirem Thermopilas in-
venisse. Una cohortium, centum triginta nume-
ro, longius effusa, cupidine prædæ, inter Kutne-
rum & Sotsavam Oppida, à Turcis circumventa
est. Attaeta, impugnata, pressa, tam diu, tam fe-
rociter restitit, ut, desperata victoria, Barbari, plu-
rium legionum opem, à Cæfare invocarent. Os-
manus, auditio Cosacorum nomine, eorum jam
ante audacia, & saepius accepto damno, provoca-
tus, ut in illis saevitiam suam expleret, & gentem
universam, in hac quasi manu, vindicaret, ad de-
lendos, immane exercitus sui corpus, insigni levi-
tate movet: et, triginta passuum millia emensus,
in aperto campo adeptus est. Cæterum jam septua-
ginta eorum, conspecta innumerabili Turcarum
multitudine, pavore correpti, ad proximas mon-
tium specuumque latebras, profugerant. At quan-
to gloriofius erat mansisse? Timoris & ignaviæ pæ-
na quasi obvia fuit. Osmanus enim ora specuum,

farmen-

PARTIS PRIMÆ, LIBER II.

99

sarmenis virgultisque complens, igni fumoque
vivos suffocavit. Reliquos sexaginta, tot centenis
millibus hominum circumdatos, vivos capere ni-
tebatur. Illi vero orbe facto, vim vi repellere, cede-
re alios, alios obruncare, & perniciē in hostes ver-
tere, indefesso robore non desistebant. Immo op-
portuna occasione, erumpentes, promptissimo
quoque trucidato, inter cæteros, Kur Bassam oc-
cidunt, & aliquot hosti vexilla eripiunt. Osmanus
desperans jam vivos capi posse, dirigere tormen-
ta jubet, & immani machinarum gutture, immix-
tos flammis globos, in pertinaces, jaculari: ut, si
quo modo posset, hoc saltem victoriæ frueretur,
tantillam manum campo dimovisse. Frustra fuit.
Omnia quippe adversa, Cosacorum constantia
vicit, & igneos tormentorum globos, ad adultam
usque noctem, fortiter toleravit. Tunc beneficio
tenebrarum, virtute, aut fraude, penetrare hostes
tentavere. Non adfuit fortunæ favor, quæ, Hercu-
leis plane viris, non in longum vitam, sed in sœcu-
la famam, extendere decrevisset. Ergo retro acti,
carragine se claudentes, rotas curruum suorum
defodiebant, terra obruebant, & scrobes molie-
bantur, quibus, adversus tormentorum ictus, tuti,
ex occulto, in patescentes, irruentesq; jacularen-
tur. Quod plus fortassis famæ, quam fidei, habitu-

N 2

rum

rum est: per triduum Osmanus, infinita mortaliū multitudine, in hanc tantillam, taliter militam, manum, armis, tormentis, ferroque incubuit, & incassum. Restitit enim illa fortiter, & suffecit. Ad extremum, non arte, non marte subacta: sed dum invicem, ut custodias frustrarentur, vitabundi, secundo, per noctem, effugium quærunt, singuli in manus hostium venere. Macte beatissimos, meo judicio, viros, & Lacedæmoniorum gloriam longe superantes. Illi quippe trecenti, & ad Thermopylas: hi non nisi sexaginta numero, & in aperto campo, parem Xerxis exercitui multitudinem fatigavere. Et primi omnium, maximo Turcarum ludibrio, Orbi patefecere, hanc immensam molem posse debellari, cum pauci sustinuissent. Ipse Imperator Osman⁹, videre cupidus homines, qui tot per annos, vires Turcicas spernerent fatigarentq;: qui tam parvo numero, in miraculum crescente audacia, quodammodo generis humani vires derisissent, omnes in conspectum suum adduci jussit. Adducti, quot à tormentorum globis supererant, triginta numero, et, prout illis nulla cultus affectio est, plerique laceri, & tantum sagulo leves. Mox ergo pudore, indignitate, ira, in rabiem & crudelitatem versus, ut erat pronus ad ista Osmani ani-

ni animus, direptum à latere ferrum, amplius quam denis immersit. Inde fatigatam manu sua sævitiam, porrecto alteri ferro, explendam tradidit: ut eorum saltem palpitantium exspirantiumque aspectu frueretur, quorum in acie vigorem tolerare non sustinebat. Inde fortitudine virorum in animum redeunte, duorum, qui nondum interfecti restabant, vitæ pepercit: non misericordia aliqua, sed calliditate ductus, ut altero, muneribus blanditiisque corrupto, corrumpendis vicissim Cosacorum castris, & pollicitationibus ad defectionem sollicitandis, uteretur: alterum, pro emisso, fide data, morte sua, ni se si steret, compensanda, pignori ac vadimonio, pro alterius reditu, reservaret. Quod ut eo commodius fieret, & Cosacos, ab Hotkevicii castris, segregaret, aditus omnes, quibus transeundum erat, universo exercitu præoccupavit: ut, si quid emissus, ad alienandos animos, Cosacus effecisset, occasione uteretur.

Interim, quo per simulationem quietis, de-
stinata segregaret, remittere Szembergium ju-
bet, spem pacis Hotkevicio ostentans, si arma po-
neret: interjectis minis, si in contrarium nitere-
tur. Additur simul Vevellius, litterarum comes
& auctor. Quam inania humana consilia! Utrobiq;

ofinianus
frustra
Cosacos
ad se al-
licere
tentat..

spe suadeceptorus est. Cosaci enim, spretis promissis, armisque Cælaris, compositi munitique inferunt se porro in medium ipsius agmen. Turcæ, circumfusis undique copiis, animosè resistebant: quasi jam rejicere millia quadraginta confidèrent, cum ægre, non ita pridem, sexaginta eorum

*Cosaci ad
Polonica
castra e-
mergunt.* potuissent. Itaque, per semineces, per integros, Cosaci pergentes, multa tandem Turcarum cæmergunt. de, in liberum & Polonica castra emersere. Idem dñes ipsos & Szembergium, cum Baptista Vevellio, ad Hotkevicium tulit: & collocati à dextera castrorum parte, qua Tyras præterfluebat.

*Hotkevi-
ciij prudēs
factum.* Cæterum Hotkeyicius, præsentiens Osmani & Vevellij ludificationes, repositis in sinum suum litteris, Osmano respondit, antequam perlegisset: & paucula admodum, obscura, et, tenui mentione pacis, contemptum potius, quam responsum sapiuntia. Quam provide & prudenter id fecerit, apertæ mox Osmani litteræ ostenderunt. Turcico enim ideomate scriptæ erant: qua relicta, si pacem sincere voluisset, familiari aliqua Polonis lingua usus fuisset. Sed jam hoc, ab Hotkeyicio, nefas vindicatum erat, antequam visum. Itaque Vevellius Ludificator, non incorruptus, à Polonis remissus: & interdictum pariter, ne, si de cætero ludificari præsumeret, reverteretur.

Osma-

Osmanus, spe sua dejectus, his Hotkeviciis litteris, magis in ultionem excanduit: nec vana erat, nec sine viribus ira, si, ut instructa numero, ita virtute fuisset. Promovit interim castra, ut, Osmanus
castra
sua, Poto-
nicis ca-
stris oppo-
nit.
2. Sept. si posset, Sarmatas multitudine & præsentia sua terreret. Primū vis magna pulveris appropinquare visa. Dein, magis magisq; exagitata arida humus, latius suffudit cœlum, densaque caligine montes & plana intexuit. Nec mirum: cum præter equorum, ad pugnam adductorū, vim, supra decem Camelorum: bubalorum vero, necessitati & cibo destinatorū, supra viginti milia, tenuioris arenæ cumulos commoverent. Ad hæc quatuor inusitatæ magnitudinis Elephantes, magnificentiæ Barbaræ cultum, & delicias portantes, mole sua fatigabant humum. Centum quindecim grandiores machinæ, quarum aliquæ quinquaginta quinque librarum globos impellebant, numerosis boum jugis trahebantur. Insuper infinitus ille exercitus: tot equitum, tot centena peditum millia, suis distincta legioni- bus, gradiebantur. Tandem, quater mille passibus, à Polonorū castris, spatium, quantum in tria eminentia juga exurgebat, expandebatur- que; tantum, supra citraque fusis in immensum agminibus, oceupavere. Tum credita magis, cum imma-

Turcio-
rum ca-
strorum
facies.

immanis illa exercitus innumerabilis moles visa est. Quamvis nec integra videri potuerit, cum trium montium planis devexisque sparsa, expansa, pendula, vix oculis terminari posset. Dilapsa nonnihil pulverulenta caligine, erectoque prætorio, signum, ad sua promiscue figenda tentoria, datum est. Tunc immensa illa castrorum facies, in canitiem velut hybernam, quasi momento exalbuit. Humiliora usq; ad Tyram, suis seorsim castris, Tartari occupavere: cætera Turcæ.

*Osmanus
castra Po-
lonica
despicit,
& oppu-
gnat.* Inde Osmanum juvenili ferocia & curiositate plenum, cupido, distinctius Sarmatica videntia, di castra, invasit. Altissimam itaq; cum Primo-ribus suis turrim ascendit, & paucitatem Polonorum, & castrorum angustias contemplatus, præ multitudine sua contemnens, in temeraria vota erupisse dicitur, non gustaturum se panem, priusquam & hæc expugnata fuissent, & Sarmatae internecione deleti. Approbavit, felix sæpius antea, Ussaim Bassa, Silistriæ præfectus votum, & summam sibi certaminis, ab Imperatore permisam, alio æque temerario voto, non reversurum se nisi victorem, obligavit. Et, quod periculosisimum erat, devoti, in aciem, Turcæ, mutua alacritate coibant. Actumerat de Polonis, si ad eorum

corum excidium vota valuissent. Sed illi, contra animosi, tanti non æstimavere, ut, relictis castris, in apertum prorumperent, aciemque, ante ipsa munimenta, instruerent. Lubomirscio dextrum cornu permisum, Hotkevicius sinistrum duxit: quicquid ad Tyram vergebant, obiectis levibus munimentis, tenuit Saporoviensium Cosacorum exercitus. Hos adoriri prius Turcis visum, quod clausis nondum, commissisque cum alijs, munimentis, etiam itinere fessos, opportunos magis, & faciliores fore opinarentur. Quo Poloni autem distractherentur, Dziambet Gereū, ipsis, & Kantium, cum Tartarorum exercitu opposuere. Initium pugnæ à tormentis in Cosacos exonerandis factum. Qua præiverant globi, Turcarum fortissimi, & solennius devota capita, sequebantur. Iamque oppugnatio pertinax erat, maiore, cum frustra peterentur, Cosacorum fiducia. Addidit hanc, effusum ad spectandum, ex Hotkevicij munimentis, castrense vulgus. Rati enim in subsidium id sibi venisse, protinus ex munitionibus, in apertum, effusi, in Turcas ruunt. Tunc, ubi clamore concursuque invicem consonere arma, qui spectatum venerant, fugiunt, & unâ, quod antea a lacritatis attulerant, secum auferunt. Itaque in cumbentibus, majori nisu, Turcis, gradum paulatim

tim retro, ad munitamenta, dedere. Oportune la-
borantibus suppetias Hotkevicius tulit. Quippe,
intentus ad omnia, discrimen viderat, & jam pro-
ximam, prout instructa stabar, Cosacis subsidio,
legionem admovebat. Mox omnia proniora his,
graviora Turcis: & quo minus, votorum oblitis,
statim fugerent, sui memor, Ussaim Bassa retine-
bat. Pudebat enim generoso animo Duce, toties
victorem antea felicemque, jam ultimo, juramen-
to devotum, successu irrito, indignabundi Impe-
ratoris faciem subire. Pugnabat ergo jam, non
vincendi fiducia, sed retrocedendi metu. Removit
hoc unum, ad plenam Cosacorum victoriam, for-
tuna obstaculum, & obnoxium ictui, Silistriæ Præ-
fectum, Ussaim Bassam, igneas, è militari tubo, glan-
de costas traiectum, è medio sustulit. Tunc fugi-
entes Barbari, ignominiosa suorum clade, perfec-
tam, sub crepusculum vespertinum, Hetkevicio
& Cosacis, victoriam reliquere. Quam feliciter
dimicatum fuerit, sparsus cadaveribus campus, di-
tantia sagulo leves Cosacos Turcarum spolia, &
quinquaginta tantummodo è suis desiderati, o-
stendere. Captus insuper Minoris Asiæ Præsidis
cognatus: sed, non uno vulnere saucius, vitam li-
quit. Lubomirscio dextroque cornui indictum
sapienter clamore bellum, quam gestum fuit: seu di-
stractis,

Ussaim
Bassa
mors, &
Polono-
rum vi-
ctoria.

stractis, mutua discordia, animis: seu, quod victoriā, post Turcas, Tartari desperarent.

Quæ inde Osmani rabies! Quæ Sarmatarum
alacritas: Ille tristitia, morositate, furore, familiaribus suis intolerabilis, temere effusi juramenti,
acceptæ cladis, & victoriae hostium poenitens,
sibi ipsi tormentum erat: & pertinaci, in mentem
propriam, crudelitate, intempestiva temeritas vapulabat. Hi, multiplici felicitate animo-
siores, jam de armis ulterius inferendis, & promo-
vendis, in penitiora Valachiæ, castris, cogitabant.
Ejus sententiæ sensusque Hotkevicius ipse erat:
Homo revera magnanimus, qui gerere bellum, quam
ducere: victoram potius domum, quam
pacem: gloriam meditari, quam quietem, mallet.
Sed alii, scrupulosius omnia ponderantes, contra-
rium, hærendumque censebant: esse enim quan-
dam etiam, in cunctatione, victoram: pericu-
lum in prosperis, fortunam suspectam in felici-
tate semper. Nullum deinde, ad vincendum, po-
tentius telum videri, quam ex necessitate hostis
non pugnare.

Cum hæc controversia dissentientium finem
non inveniret, omnium ore conclusum est, Vladis-
laum Principem, qui in procinctu erat, exspectan-
dum, ejusque sententiam, aut si quid hac de re

Sigismundus Parens illi in mandatis dedisset, hoc audiendum, amplectendumque. Hic autem vere Regius adolescens, insigni providentia, Sarmatiam, de cuius salute agebatur, ab incursu hostium, pro virili tutatus; hoc insuper prudentissime providerat, ut in tempore laboranti exercitui, de commeatu prospiceretur: incassum fortitudinem & vigorem sperandum ratus, si inopia & egestate debilitato corpore, ad solita & egregia, militis animus, sollicitaretur. Cum jam autem utcunq; exercitui prospectum esset, & coetaneum aemulumque suum Osmanum, oppositis castris, ferociam suam exerere, Sarmatas impugnare, & victoriam meditari, inaudiit; ut aetatem aetati, Majestatem Majestati, & temerariæ, adversarii sui, ferociæ, solidam virtutem opponeret, junctis cum Hotkevicio copiis, trajicere Tyram, destinavit. Multis, generosissimi adolescentis, praeceps ad heroica animus, scrupulo erat. Quippe non nisi vi-

Hotkevi-
cio se co-
jungit.
3. Sept.

ginti quinq; Polonorum, quadraginta Cosacorum millibus, & Reipublicæ, & illius salus, comitabantur. Quibus tam paucis copiis, potentissimum Terrarum Orbis Monacham, & quasi generis humani vires aggredi, plurimis minus consultum videbatur. Sed vere Sapiens Latinus. Fortitudo contemptus timendorum est: terribilia & sub jugu libertatem

Senec.
Epist. 38.

tatem nostram mittentia, despicit, provocat, frangit. Ergo, quod dicitur, *virtute Duce, comite fortuna, Tyram trajiciens, reliquo exercitui se conjunxit.* Tunc Hotkevicius, Lubomirscius, & Primates cæteri, adventum congratulati, & festis tormentorum, in Turcica castra, boatibus, gaudium subfiduumque suum testati, ad determinandam præcedentis diei controversiam, convenere. Tutilissima, Principi Vladislao, placuit: depromptis etiam, hac superre, Patris sui Sigismundi litteris: quibus, non omittendam prælii aleam, aut porro promovenda castra, si certa se offerret occasio, jubebatur. Alias cunctari magis suadebant, donec cum tota, Sarmatiæ universæ nobilitate (quæ centum septuaginta millium fore dicebatur) subfido castris veniret. Promptum quoque tunc diploma dicitur, quo, multo Hotkevicii cū honore, modus tamen præscribatur id aggrediendi, in quod Commissarii, ad id Bellum à Senatu dati, consensissent, ivissentque simulcum eo in suffragium. Quod quanquam civiliter ille accepisset, secus tamen promiscue creditum: præsertim cum in fatalem deinde morbum incideret; quem ex mœrore limitatæ potestatis, toties antea obsoluti Imperii Dux, contraxisse dicebatur. Ut ut sit: omissioni exinde, velut in dolore animo, bellum gessit.

Cæ-

Cæterum Osmanus, auditō fragore, de adventu Vladislai Principis lœtantium Polonorum, sequenti die aciem instruxit: Ut, si quando facultas daretur, concurrentibus invicem copiis experirentur. Non visum filio Regis, itineris molestia nauseabundo, pro tunc, collatis signis, præliari: sed, immissis subinde agminibus, impetum æmuli, frequenti velitatione, elusit. Osmanus postera die, quasi prælio vicisset, quia obtulerat, ferocior factus, oppugnare iterum castra præsumpsit. A prima Luce, ad meridiem usque, tormentis machinisque prælusum: post meridiem, quasi refectis prandio ad labore corporibus, ab omni latere in munimenta incubuit. Sed nullum, ubique à Vladislao Principe, & Lubomirscio, animatis militibus, & resistentibus acriter, periculum erat; nisi ad unum exstructum muro Fanum. Hoc à Polonis non satis munitum, & non nihil eo tempore, incuria quadam, neglectum, à Janizaris premebatur. Et jam in propinquo erat, ut expugaretur, cum, animadverso periculo, Rochanovius, peditem Vladislai, Germanicasq; cohortes, eodē, magna vi, rapiens, violentiā Janizarorū, alia quadam maiore vi, fregit, & quasi à limine exegit. Osman⁹, nihil in Polonos proficiens, facile sentiebat, nisi quidē ej⁹ diei

*Polonico-
rum ca-
strorum
irrita op-
pugnatio.
5. Sept.*

oppur-

oppugnationem plane irritam vellet, alio impe-
tum transferendum. Ergo in Cosacos, tota exer-
citus sui mole, vertitur. Sed illi quoque, strenue
rejectis Barbaris, talem addiderant virtuti dolum.
Multis, ante ipsa castra, excavatis scrobibus, in eas
se dirimittebant, et, eatenus adversus tormentorum
ictus toto corpore tuti, secure eminus hostem im-
petebant: cominus, inopinato exslientes, impro-
viso terrore & impetu in fugam Turcas conjicie-
bant. Laudabili profecto Stratagæmate, nisi cre-
scente paulatim ex successu audacia, omnia, apud
gnaros jam fallaciae hostes, temeritate corrupi-
fient. In redeuntes quippe, & Stratagæmate retro-
cedentes, solito fervore investi, dato signo, acce-
pti in medium, à lateribus cingebantur. Et jam,
omni ex parte pressis, exitium imminebat; cum
velitum, & Germanicæ Vladislai, cohortes, auxi-
lium tulere: et, reserata ferro via, ad castra eis re-
ditum aperuerunt. Vix evaserant, cum alia Tur-
carum fallacia deciperentur. Rumore dissemi-
nato, capta Turcarum à Cosacis tormenta, loco,
ob magnitudinem, moveri non posse, iterum eos
ad temeritatem invitavere. Traxit quippe hæc
vox, per se concitatos, ulterius: tantoque ardore
campum, nullo amplius ejus defenfore, supera-
runt, ut ante, sub ipsa hostium suorum castra pro-

cur-

currisse se adverterent, quam putavissent. Tum vero Barbari, omnibus, in eos, portis erumpentes, simul illos, & venientem subsidio ipsis, cum peditibus trecentis, Morendam, extortis duobus vexillis, ad castra retro compulere. Opportune cavatam in scrobes humum, Sclopetariis Germanis Vladislaus impleverat: hi enim, in effusos ad victoriam Turcas, probe, longioribus tubis, collineantes, fuso ex insidiis glandium imbre, impetum cohibuere. Majora in invicem molientes tenebræ diremerunt.

*Atrox fa-
cinosus in
castris
Polonicis.*

6. Sept.

Sequentem diem, atroci facinore, Poloni, ne fastum reddidere. Ducenti circiter Valachi, ex almoniæ venditione, quæstum exercebant. Adeos ventitabant infimæ plebis homines, aleatores, lixæ, servitia, pretium luxus, jam pecuniam, jam pignora deponentes. Postea, cum hæc ipsos per lusum & libidines defecissent, versa in crudelitatem pœnitentia, tempus condicunt, quo, Valachis ferro trucidatis, sua per internotionem eripiant. Igitur, signo dato, tabernas effringentes, transfigunt alios, alios maestant, in flumen alios mergunt; tanta sævitia, ut, felicitate quadam denuo ad littus ejecti, rursus in gurgites propellentur. Miseranda & deformis ubique facies; cum sanguis, rapinæ, furor, invicem miscerentur. Nefas erat,

erat, & severe puniri debuerat: sed cum per tot mortales flagitium manavisset, authore in patibulū acto, reliquis, ne vulnus, talibus circumstan- tiis, medendo irritaretur, Duces ignorere.

Jam septima Septembris dies erat: quam audaci fortitudine sua, & memorabili hostium suorum strage, Hotkevicius nobilitavit. Occasio- nem hæc, à vigilibus Polonorum, male vigilanti- bus, habuit. Illi quippe, more recepto, longius ante vallum curare soliti, cum periculi eos in a- perto tederet, stationem fossa munivere. Ea con- fisi, defixis pro terrore vexillis, negligentius ipsi a- gere, somno humi procumbere, solita munia cu- stodiasq; remittere. Ad nimadversum id à Turcis, captatoque, quo maturitas lucis securitatem, ca- lor soporem pariebat, sub meridiem, tempore, solutos metu, repente adorti, trucidatis duobus præfectis, stragem latius circumtulere: adeo, ut ablatis duobus vexillis, abductisque ad castra duo- bus scloporum plaustris, numero aucti, animo- siores in præliū reverterentur. Qualis, ad nuntium rei, Hotkevicius erat, felicissimæ temeritatis! Ille ægritudine corporis suis neglecta, arma, per iram & indignationem, induit. Et, assumptis tantummodo quatuor hastatorum signis, insolitum ca- stris suis nefas, vindicatum ivit. Jam vix ad teli

Audax
Hotkevi-
cij fonti-
tudo.

jactum pervenerat, cum, concitato calcaribus & quo, sex Turcarum millibus sese immersit; adeo ut fusis à lateribus, tergoque, Barbaris, haustæ penitus viderentur. Solus armorum fragor, strepitus conferentium manus, vibrata in invicem tela, & fluitantia signa, vivere testabantur. Spectantium alios stupor, commiseratio alios, quasi projecte morientium, invadebat. Felix tandem eventus, stupentium, commiserantium, omnium denique utriusque exercitus, spe metuque ambiguos animos, explicuit. Ad extremum enim Barbari cef- sere Polonis ex necessitate pugnantibus: et, in- genti clade fracti, præcipites, ad sua castra, revolvabantur. Quot ceciderint, tradentium negligen- tia, in occulto est: plurimos autem cecidisse vel ex hoc ipso patet, quod sesqui hora pugnaverint, & cum facibus, totam noctem, Barbari, colligendis nobilium suorum cadaveribus, insumpserint.

*Poloni
prælium
offerunt:
Turca de-
trectant.* Hotkevicius, memorabili hac pugna viator, adeoque ferocior, adnitente Vladislao Principe, aciem in sequenti die instruxit, & pugnæ copiam fecit. Tum vero patuit, quantum præcedentis diei audacia, & victoria partum: cum, succincti tantis viribus Barbari, tamen de victoria despe- rarent. Itaque, ad crepusculum usque vesperti- num, agentibus in acie Vladislavianis, cum nulla

Turcarum signa comparuissent, rursus, triumphantium more, se ad castra recepero. Inde modestiores Turcæ, & Sarmatæ, non insultantibus adeo Barbaris, magno & continuo labore defuncti, fortunæ indulgentia, quiete fruebantur. Et si alicubi velitationes, certe ipsorum pugnantium tantum erant, non commoventibus ideo se reliquis copiis.

Porro utrumque exercitum, intolerabilior ferro, dira famæ urgebat: Polonos quidem non adeo, à Vladislao Principe, non ita pridem adhuc, ad aliquam temporis moram provisos: Cosacis autem infestior erat, sua ipsorum, & Borodawcæ Ducis negligentia. Hic, Petro Konaszevicio, ob morum severitatem, à Cosacis deposito, ipsorum electione successerat: non quod melior esset, sed ad corruptâ indulgentiam pronior. Omnia, sub hoc, impune, flagitia, in Patrio promiscue ac hostili Solo, per fas nefasque, perpetrabantur, & umbraticus ille Dux, ad Cosacorum arbitrium, ipsorum violentia, trahebatur. Adjecterat hoc ultimum nefas, quod, futurorum improvidus, non frumentum & victualia copiis, nō equis alimenta providisset: prorsus quasi, ad debitum, Polonicis exercituum Ducibus, obsequium præstandum sufficeret, venisse. Itaque,

alabala
- regia
- mortua
Fames
apud Co-
- facos.

consumptis, quæ obvia sibi rapuerant, in profici-
entem in deterius quotidie famem incidebant.
Quare, in Borodawkam rabie versa, illi, suam i-
psorum licentiam, pravam ipsius indulgentiam,
& cætera, propter quæ ipsum elegerant, vitia
objiciebant. Occasione usus, cum aliis copiarum

Vladisla-
us Boro-
davcam szevicum, plurimis, sub se, in Moscovia, stre-
ipsorum nue gestis gloriosum, priori loco restituit. Tum
Ducē de-
ponit, & cætera quidem in melius, præter unam famem
Konasze- redibant, quæ periculosa in tam corrupto po-
ricium i-
psis pra-
ficit. pulo, & tam vicino hoste erat. Tum illud egre-
gium Stanislai Lubomirscii fuit: qui, distincto
perturmas & cohortes exercitu, sua ipsis propria
alimenta distribuit. Inde Vladislaus Princeps,
præsentia sua, & donativo, per Commissarios,
quinquaginta millium florenorum, promisso,
ad perseverantium illos porro animavit.

Cosaci
nocturnā Ut autem aliunde, adeoque ab ipso hoste
Turcico- punuriæ subveniretur, placuit, Konaszevicio
rū castro- suadente, nocturna Turcicorum castrorum, in-
rum in-
vasionem Itaque, data tessera, secunda ferme vigilia
parant: egressum castris. Infuper id provisum à Vladislao
sed à plu- Principe, ut, si quid adversum Cosacis contigis-
via impe- set, sequentibus à tergo suis Germanorum co-
diuntur. horti-

hortibus, virtute gentis, & armorum pondere, firmis, protegerentur. Et jam in eo erat, ut per intermissa custodiis loca, nihil sentientes sotiosque Barbaros, Cosaci invaderent, cum repente imber, ingentibus procellis fusus, cohibuit impetum, & indignabundum ad castra militem retro egit. Saluti illum imbrem exercitui Turcarum fuisse plerique dixerunt. Certe ut transfuga Turcis periculū, quod evaserant, enarravit, tanta turbatio Osmanum, tribunos, & universas copias, invasit, quasi prorsus factum fuisset, quod fore in propinquο fuerat. Inde omnia attentiori frequentiorique vigilia munientes, occasionem animumque Cosacis, denuo resumendi, sustulerunt.

Cæterum, præter bellorum & penuriæ mala, Turcarum castra, contagiosa lues invaserat: Calamitatis exercitus Turcici. eo funestius, quod, vergente jam ad senium anno, Ægyptiis, Syris, Arabibus, & quasi ab alio Cœlo hominibus, inassuetus Europæus, maxime Septentrionem versus, aër officeret; ipsa insuper multitudine virus conferente: ita ut multa quotidie millia morerentur. Et tanto indies magis in pejus malum proficiebat, quanto Autumnus adultior, dierum accessione, fiebat. Quid ergo? Osmanus multum, singulis fere momentis, de

ferocia pristina & præsumptione remittens, &
irrita castrorum obsidione implicatus, an abiret,
an adhuc moraretur, ambiguus fluctuabat.

Et jam apparebat pudore magis, quam virtute
resistere. Tandem ad petendam pacem inclina-
tior, obtulit victoriæ confessionem, majoremq;
eius lætitiam quod cogi videretur. Itaque per
Radulium, post Alexandrum, Valachiæ Princi-
pem, Vevellius iterum cum litteris, ad ferocio-
rem quotidiano successu, Vladislauum, Hotke-
vicium, Lubomirscium, cæterosque Polonorum
Primates, mittitur: qui, Epistolâ petitam pa-
cem, ore persuaderet. Nec abhorrebat Sarma-
tæ, maxime ob Cosacorum penuriam famemq;
solliciti. Placuit Jacobum Zelenscium, decora
proceritate corporis, & prudenti animositate in-
signem, cum Vevellio, ad Osmanum remittere.
Tum truces Turcarum, ipso veniente, vultus,
verba, minæ, & alia plura, ad terrorem compo-
sita, quo Zelenscii animum, Polonorum consilia,
ex perterfacto ejus vultu verbisque, quoquo
modo, colligerent. Cum vero imperterritus ille,
nulla ad pavorem inclinantia responsa redderet,
minus simulatione larvati, sincerius agebant.
Et successisset, ut videbatur, negotium pacis, nisi
intervenisset, quo Osmani, ex facili præsumptuo,

sior,

*Osmanus
pacē pe-
tit: sed
Karakas.
sū Bassæ
adventu
cōfirma-
tus, ad
bellum
resilit.*

stor, animus, ad nova Belli consilia recrudiisset.
Cum enim Karakassius Bassa, recentibus
veteranorum copiis, ex Hungaria veniens, pau-
cissim post Zelencium, horis, castra Turcica intra-
visset, quia peritissimus Belli habebatur, & pro-
batissimus miles palam audiebat, tantos, ex ad-
ventu ejus, Osmanus resumpsit spiritus, quasi
jam debellasset, quos nunquam sine clade tenta-
verat. Itaque, quamvis nupera ignominia & te-
meritate doctus, non vovere, meminiſſe debue-
rat, tamen iterum, cum ipso Karakassio Bassa, ad
vota conversus, juramento se obstrinxere, *Nus-*
quam ſe, niſi in expugnatis caſtriſ, cænaturos. Adeoq;
jam Osmanus, veluti eventus prosperioris cer-
tus, editiorem iterum locum ascendit, ex quo
prospiciens pugnam, victoriæ speratae deliciis
frueretur. Omnia in contrarium cecidere: &
Osmanus, pro imaginario lenocinio visus, non
niſi oculorum & populorum suorum afflictio-
nem ad animum retulit. Quippe Karakassius
Bassa, cum exercitum Polonum corona cinxis-
set, bipartito impetu, ad Lubomirscianam por-
tam, & Weieri Dönhofforumque Germanorum
stationem ferebatur. Quippe pro uno Hermano
Dönhoff, jam duo, Martiæ ejusdem familie,
Germani fratres, Magnus, Ernestus, & Gerhardus,

*Gravifl-
ma, à Kæ-
racafio
Bassa, Po-
lonicorū
caſtrorū
oppugna-
tio. 15.*

in præ-

in prælia succedebant; adeoque pro uno Dönhoff in acie nuper occiso, jam pari fortitudine duo pro Republica dimicabant. Itaque Karakassius ab his magna clade repulsus, cum ex Hungaro transfuga, extenuata crebris eruptionibus Mossinii stativa intellectisset, illac violentia versa, per rumpere conabatur. Quod ut eo citius, & antequam succurreretur, fieret, Turcæ ex equis desilire jussi, intermixti peditibus pugnavere. Aderat Karakassius, instabat, etiam in periculis exemplo precebat. Erat tum videre Vladislau Principem mediū inter Imperatorem, & militem, et, unā cum Lubomirscio, præsentia sua, & opportuno subsidio, milites animantem. Itaq; & ibi Karakassius cum clade repulsus, iterum in Weieri Dönhoffiorumque Germanicas cohortes, nunquam sine strage tentatas, vertitur. Et addit illum oppugnationi dolum, quo Stratagemate quodam recederet, & insequentes, & à lateribus, & à tergo concluderet. Et successisset fortasse, nisi contrario astu, Karakassii Bassæ fallaciam, Lubomirscius retudisset. Cum enim Weieri Dönhoffiorumq; Germanicæ copiæ, in dolosè fugientes, longius se concitassent, & Turcæ, flexis ad prælium equis, ab omni parte incumberent, Lubomirscius, circumactis quibusdam Sarmatarum turmis, Barbaros à tergo

tergo invasit. Tum vero acerrimum, & quale nunquam antea, prælum, præsertim subinde novas copias Principe Vladislao submittente.

Itaque ipse tandem Karacassius Bassa, interconfertissimos pugnans, dubium à Germanis subWeihero Dönhoffiisque, an Polonis sub Lubo-
mirscio, sternitur. Karacassius Bassa occidetur, & Polonorum ingens vi-
storie. Quamvis non desint etiam qui à Lubomirscio propria manu interfectum, asseverent. Ut ut sit. Sensit illico casum viri u- traque acies: & quantum remittebant Barbari, Sarmatae proficiebant. Novissime, fremente, de super omnia spectante Osmano, præceps Turcarum fuga & strages. Adeo ut, ad noctem usque, Sarmatae Germanique trucidando fessi, sanguine hostium suorum, licet sitibundi, satiarentur. Quantum apud Vladislavianos gaudium, tantum apud Osmanidas, ob quatuordecim millium fortissimorum militum, & ipsius Karacassii Bassa jacturam, luctus & moeror. Præfectum hic Budæ in Hungaria egerat, & multa olim felicissime ausus, ad extremum, vicissitudine rerum, Sarmatis ad ignominiam fatumque patuit. Sed recte apud Senecam Diocles Carystius inquit. *Una est ad for- tunam securitas, non toties eam experiri.*

Lib. 7.
Controv.

Verum enim vero Oslinanus, recenti hoc ac-



cepto

Osmanus cepto vulnere, ad concordiam iterum propende-
 pacem in-
 ter & bel-
 lum flu-
 ãnat. sa mentem, tum Regum omnium Principumq;
 ad hujus, ab initio, tam formidabilis expeditionis
 exitum, intentio oculique, tum sex annorum
 & amplius apparatus, sine ullo successu, Poloni-
 corum castrorum scopolis illis toties, cõminu-
 tis, & prorsus inhabilis porro ad alia redditus, re-
 tinebant. Projectas ad hæc gazas prope infinitas,
 & computum fere, in exercitum innumerabilem,
 excedentes impensas considerabat.

*Cosaci
castris
Turcicis
damnum
inferunt
18. Sept.*
 Dum hisce similibusq; Osmanus anxius, hinc
 inde fluctuat, geminum, sic jubente Vladislao
 Principe, rursus illi à Cosacis malum. Hi, bipar-
 titis noctu copiis, medietatem adversus Turcarum
 vigiles locant, altera, per observata Tyræ vada, pu-
 betenus, nemine sentiente, in ipsa Turcarum ca-
 stra transiere. Ibi, incisis tabernaculorum furibus,
 somno sepultos suffocant, aut, tegumentis in ora
 projectis, trucidant. Sic cedes, aliquamdiu, fre-
 quens & magna, sine tumultu. Tandem, animad-
 verso periculo, arma præparantibus Turcis, Co-
 faci qui in hostium castris erant, illis qui adversus
 vigiles extra præparati stabant, signum dedere:
 quibus, signis & clamore reciprocantibus, conser-
 nati in medio Turcæ, vigilesque ipsi, fugerunt, &
 Cosa-

Cosacis, onustis Barbarorum spoliis, ad propria, viam fecere. Idem, biduo post, noctu, rursus ab ipsis, & feliciter æque tentatum. Tunc, per obser-vata sibi vada, Tyram transeuntes, Taki Bassam, Iterum
damnum
inferunt,
Turcarum pontem, trans fluvium custodientem, & Taki
noctu invadunt, & omnibus, aut ferro, aut aqua, Bassam
necatis, ipsum Taki Bassam, in lectulo repertum, obtrun-
occidunt: & spoliis Barbarorum graves, sine dam- cant. 20.
no, ad castra se sua recepere. Sept.

Hac duplici clade damnoque rursus irritatus Osmanus, ne omnino contemptui haberetur, vindicias meditabatur: præsertim cum Johannem Carolum Hotkevicium, exercituum Generalem, post novissimam suam victoriam denuo ægrotantem, paulo post obiisse nuntiaretur. Hic enim, cum instare sibi, commune omnibus nobis, fatum adverteret, regimine & Imperio suo, in Stanisla-um Lubomirscium Comitem Wisnicensem, translato, ex castris, in arcem Hotimensem, de-ferri se jufferat, et, biduo post, solutus humanis curis, inter mortales esse desierat. Magnus pro-fecto Heros, gloriosissimus & victoriosissimus mil-les, quod, inter cætera vel ex eo patet, quod in Li-vonia ad Kircholmum, tribus tantummodo suo-rum millibus & trecentis, sedecim, sub Carolo Südermanniæ Duce, Suecorum millia, luce cla-

Hotkevi-cumors.
24. Sept.

ra, marte aperto, acie utrimque instructa, fuderit deleveritque: Et jam novissime quatuor hastatorum signis, sex millibus Turcarum in fugam versis, quasi in triumpho suo conderetur. Cæterum Lubomirscius, si, confecto feliciter bello, ad propria victor reverteretur, templum vovit *Iesu Christo Salvatori*. Audivere Superi vocem, votique compos, solvit in Wisnicz postea, quasi commilitoni Deo stipendum.

*Pium Lu
bomirscii
votum.*

Cæterum Osmanus, Hotkevicii morte, Polono fore faciliores existimans, extrema tentanda duxit. Itaque quicquid virorum in castris & viri-
*Novissi-
ma Polo-
nicorum
castrorum
oppugna-
tio.*
 um erat, in aciem productum: tracta & in alteram Tyræ ripam, Cosacis obversam, viginti quinque majora tormenta, additis Tartarorum circiter triginta millibus, ut, si occasio se offerret, in perturbatos, ut sperabant fore aliquando Cosacos, trajecto celeriter flumine, à latere invehementur. Nonaginta circiter aliæ machinæ, obversæ castris. Tum vero ea rerum facies, ut ruere Cœlum, & i-
Vladislai psaturbari elementa viderentur. Ipse Vladislaus *Principi* Princeps, ut præsentia sua aderat, & verbis milites, *virtus, &* periculū. & factis, animabat, sine periculo, ea die, non fuit: nam & proximus illi, è custodia unus, tormenti iictu stratus laceratusque, & circumvolantia undique, & ad ipsos quoque pedes cadentia, è ma-
 chinis

chinis grandioribus, tela, imperterritus risit. Quippe *avida*, ut Anneus, est periculi virtus, & quo ten-^{De pro-}dat, non quid passura sit cogitat: quoniam & quod ^{vid.} passura est, gloriæ pars est. Ergo omni parte Osma-nica vis circumfusa castris, quasi unum undique prælium faciebat. Sed hoc quoque Principis Vla-dislai felicitati fortuna indulxit, ut primus Turca-rū impetus, à suis, sub Weiero, Dönhoffiisq; Germanicis legionibus, retonderetur. Inde in Lissovienses, loco & munimentis inferiores, versa ferocia. In hos, torrentis instar, extremo conatu illati, pulsi, pellentes, nullo suorum cadentium metu, ferebantur. Perrumpere eorum munimenta, vallum ascendere, milites conturbare, audacia supina laborabant. Sed, quemadmodum nulla tempestas magna perdurat, ita quasi momento circumacta res est. Szembergius, haud procul vallo, repentinam, editiore loco, munitionem extru-xerat: hanc septam levi aggere fossaque, undique frondibus arboribusque texerat, ut objecta hosti-um oculis, speciem internatorum virgultorum redderet. Inde duo tormenta, & aliquoties de-nos pedites, ibi abscondit. Lubomirscius interim, ab omnibus cohortibus, decimo quoque abstra-^{Turcarū} cto, assumpta insuper, è custodia Vladislai Prin-^{strages &} cipis, cohorte, laborantibus subveniebat. Sic alia ^{Polonorū} ^{victoria.}

quadam majore violentia rejecti Turcæ, non suspectis Szembergii virgultis, tegere se & recolligere laborabant. Tum vero Szembergius in confertos tormentis detonuit, & ingenti glandium imbre inopinatos obruit. Erumpunt pariter, & ex insidiis, & ex castris Sarmatæ, intolerabili Turcis impetu, & miseranda Barbarorum strage. Adeo ut nihil jam, per mortuos, per seminecès, per vulneratos, proficiens ad ulteriora fervor, nisi cedem, cruentum, & sanguine purpuratam humum faceret.

*Osmannus
pacem
petit &
imperatr.* Agnovit, hac novissima clade, inferiorem se Vladislao Principe, virtutique Polonicæ, Osmannus Imperator: & prosperiora desperans, Vevelium, ad pacem sincere petendam, & cum eo Zelencium, quem hucusque detinuerat, remisit. Profecti Stanislaus Zoravinscius Castellanus Belzensis, & Jacobus Sobiescius palatinides Lublinensis. Quia autem in celeritate multum momenti erat, instrumentum, in quo conditiones conceptæ erant, ut signandas Senatoribus & Commissariis offerret, apud Andream Soldrscium Secretariū Regium, & Vladislai Principis Cancellarium, deposuere. Disceptatio diu tenuit, circa coercitionem pœnamque Cosacorum; pari pertinacia, quod in Cosacos Turcę cupiebant, id in Tar-

taros

taros ut fieret, Sarmatis postulantibus. Quæ controversia, cum inexplicabiles utrumque exitus haberet, oblivione condonatis consepultisque injuriis invicem, Sobiescius ad castra rediit, & instrumentum à Soldiscio, & à Lubomirscio litteras ad Osmanum accepit. Inde ambo Legati, in conspectum ejus admissi, post solita venerationis officia, & conditiones, & Lumomirscii literas obtulere. Accepit Osmanus omnia, necessitate potius, quam aliqua bona voluntate ductus. Pax autem in antiquas fere conditiones convenit: nisi quod hæc, honorifica Polono nominis adjicerentur. Ut Constantinopoli Sarmatiæ Reges, more aliorum Regum Principumq; perpetuum Legatum haberent. Coditiones pacis initia: Anno 1621. 10. Oct.

Quemadmodum navigatione Borysthenis, Zaporovienses Cosacos Rex arceret; ita Cæsar quoque Tartaros Bialogrodienses, Tehinenses, Kilienses, Dobruenses, & Crimenses, ab incursionibus contineret: nec ultra Otzakovum exire permitteret. Nullus deniq; ad Valachie Principatum, nisi initiali fidei lavacrotinctus, evehernetur, nec ullatenus Turcicæ religionis admitteretur.

Ethic est finis famosissimæ per terrarum Orbe expeditionis; maxima Turcarum præsumptione susceptæ, majori ignominia finitæ. Præterquam enim quod sex annorum apparatus, im-

Damna
Turcarū
ex hoc
bello.

mensos deinde, & prope infinitos sumptus prodigissent, etiam Veteranorum militum, crebris hisce oppugnationibus, ultra centum milliū, totidem peste aliisque casibus, jacturam fecerunt; & ignominiosis novissime conditionibus cum Polonis transegerunt. Incussa insuper Polonorum reverentia Turcis: adeoque Osmanus ipse, ut Bzovius, Ecclesiasticus scriptor, refert, Vladislai Principis virtutem, æmulumque se superiorem agnoscens, ultro ipsi, legitimæ victoriæ brabæum, obtulit, missoq; ad illum Elephante, pressam animo generositatem adoravit. Inde disceptatio de discessu fuit. Sed in hoc quoque tandem Vladislao Principi Osmanus cessit: & curvato, cum suis, dorso, valedicens, prior ex castris Constantinopolim abiit. Insuper sublicium pontem, per quem ad propria Poloni regredientur, quasi demissioris animi monumentum, integrum reliquit. Interim lætitia & congratulatio in castris Sarmatarum ingens; qui protentis pileis, quoad oculis aspici poterant, Turcis valedicebant.

Vladislau-
sus victor,
in Polo-
niā re-
diens, se-
- Ut autem hoc gaudio Sigismundus Rex, & anxia hucusque Sarmatia frueretur, Vladislaus Princeps Andream Soldrscium Cancellarium suum, ut victoriæ Lauream, pacisque palmam, Sigis-

Sigismundo Patri ostenderet, in Poloniam misit. sū con-
Ipse paulatim sequebatur: & per congratulato- gratula-
rias, quacunque transibat, Sarmatiæ universæ vo- tionibus
ces, ad Patrem tandem, continuo velut trium- excipi-
pho, pervenit. Epist. 34. Quis haic runc sensus fuerit, fa-
cile est considerare. Si enim (ut Stoici similitudi-
ne utar) agricolam arbor ad fructum perducta dele-
ctat, si Pastor ex fetu gregis sui capit voluptatem,
si alumnū suū nemo aliter intuetur, quam ut ado-
lescentiam illius suā judicet: quid Sigismundo
Patri evenisse credendum, qui filium Vladisla-
um, à se verbis sæpius, ad fortitudinem, & ex-
emplis instructum, ad tantos subito, de hoste
tanto, triumphos, adolevisse videbat? Profecto,
cum Patri filius vicisset, & Pater sibi de filio, Patri
omnes cōgratularētur, duplex videbatur, Dom⁹
unius, triumphus. Warsawiam autem, primari-
am Mazovię Urbē ingredienti, effusa in occursum
promiscua hominum multitudo, ut nuper de
abitu anxia, ita nunc glorioſissimum redditum
congratulabatur. Alii autem Patriæ conservato-
rem, alii Sarmatiæ & Europæ universæ scutum,
alii Herculem nova quotidie monstra debellan-
tem, alii etiam Solem, magis magisque, virtutis
suæ radiis, Poloniā indies recreantem, prædi-
cabant. Et postremi quidem non sine mysterio:

R

cum

cum oppositus gloriissimus adolescens, Phœbi instar, Lunæ Turcicæ, obscurasset illam, lumine fortitudinis suæ, & horrendam ejus ecclipsin, sua gloria causavisset.

Cæterum ut omnia Vladislao Princi^o fau-
Osman^o, sta, & congratulationes ubique; ita Osmano, in
Constan-contrarium, omnia infortunata, & tristia evenie-
tinopo-
lim re-
versus,
strangu-
latur An.
1622.. bant. Execrationes alibi, detestationes, & male
gestæ rei ordinarius comes, contemptus. Tum
noxiæ adulationis & temeritatis suæ memorem,
nō moti tantummodo belli, sed ignominiosæ etiā
pacis, pœnitebat. Præcipue autem mittendo-
rum, ex Polonia Constantinopolim, Legatorum,
ibique, aliorum Principum more, commoran-
dorum, eum pudebat. Ergo, ut composita tur-
barentur, & Polonos desperatio mittendi legatos
subiret, abire in Arabiam penitus, eoque sedem
Imperii transferre meditabatur. Patuit fatale
consilium Turcis. Itaque, majorum bellorum
metu, ad palatium, Anto millesimo sexcentesi-
mo vigesimo secundo, congregati, ne ipsis qui-
dem foribus temperavere. Osmanus, per aver-
sam Palatii portam, trepidus ad Aget Baffam^u,
fuga elapsus, haud multum, imminens exitium,
latebra distulit. Statim enim à Janizaris & aliis
Turcis inventus, protractusque, plurimis vul-

neri-

PARTIS PRIMÆ, LIBER II.

131

neribus concisus, confosiusque est, vel, ut alii
volunt, strangulatus. Mox eodem furoris
cursu, Patruum ejus Mustapham, pacatio-
ris ingenii virum, Cæsarem consulatum,
in solium ejus collocavere. Et sic Osmanus tan-
dem, infelici expeditioni, & temeritati
sux, exitio suo paren-
tavit.

Partis Primæ, Libri Secundi Finis.



R 2

GE.

G E S T O R U M
VLADISLAI IV.
PARTIS PRIMÆ
LIBER TERTIUS.

CAPVT PRIMVM.

ARGUMENTUM.

VLADISLAI IV. Peregrinatio.

SUMMARIUM.

Vladislaus Princeps, pace foris domique parta,
ut experientiam & usum sibi acquireret Anno 1624.
ex Polonia ad Carolum Archiducem in Silesia: cum
illo Viennam ad Imperatorem Ferdinandum II. profi-
ciscitur. Ab Imperatore iterum in Bavariam ad Ma-
ximilianum Electorem: inde per præcipuas Germa-
niæ Urbes, salutato Coloniensi Electore, Bruxellis de-
scendit. Idem illi honor, qui olim Archiduci Alberto
Belgarum Principi, exhibetur. Bruxellis deinde, per
Mechliniam & Antuerpiam, in castra Bredaica pro-
fectus, omnia munimenta & propugnacula videt.
Spinola directionem exercitus in manus Vladislai de-
ponit, & illi ad mensam inservit. Omnibus perlustra-
tis,

vis, Bruxellas rediens, Serenissimæ Infantivaledicit: & ab aulicis ejus ad extremos Belgij fines deducitur. Per Mediomatrices & Lotharingiam, in Alsatiam ad Archiducem Leopoldum ascendit. A quo, maximo in honore habitus, cum Argentoratum exurisset per Basileam & Helvetiam, Mediolanum, Genuam, Parmam, & alias Italæ Urbes, Lorenum profectus, SVladislai statuam auream offert. A Summo Pontifice litteris Romanam invitatus, ibi summo in honore à Pontifice habetur, & Carolo V. equiparatus, S. Veronicam visitans, Sacrosanctam Christi faciem populo vi- fendant exhibet.

Item pace domi forisque parta, non erat in Polonia ubi fortitudinem suam Vladislaus Princeps, ubi virtutem, & suam bellicæ rei scientiam, cum utilitate exereret. Non erat ubi docere ipse aut discere quicquam posse videretur, cum omnia, quæ Sarmatiæ universæ erant, jam à crenpudiis cognovisset, & pacem undique fortitudine sua stabiliasset. Quid ergo? Pronum erat, Polonia feriente, in male occupatorum mores degenerare. Mobiliš enim & inquietamens homini data est. Nunquam se tenet, spargitur, & cogitationes suas in omnia nota atque ignota dimittit, vaga, & quietis impatiens; & novitate rerum letissima.

Seruec. de
Conf: ad
Helv:

Sed Regiae indolis adolescens, ne vili otio plebeis
vitiis occasionem faceret, ut ad maxima & egre-
gia natus, ita ad sublimiora & honestiora animū
vertit. Cum enim rerum administrandarum gu-
bernaçulis destinaretur, in mentem experientia
veniebat, quæ, necessariam Reipublicæ clavo,
prudentiam consummare.

Vladisla-
us Prim-
ceps, ut
experiē-
tiam sibi
compara-
ret, pere-
grinari
constituit

Cum autem variæ, ad illam sociam sibi ac-
ciscendam, viæ occurrerent, nulla tamen secu-
rior expeditiorque visa est, quam ea, quæ, pere-
grinatione facem præferente, ostentatur. Ita e-
nimir Sapientissimi quique: Plato in Ægyptum &
alias terras: Solon in Asiam, Ægyptum, & Indi-
am: alii in Chaldæam, Assiriam, & ad Brachma-
nas se contulerunt, ut sapientiam, experientiam,
& usum acquirerent. Hos tantos viros Vladislaus
Princeps sequi voluit: & peregrinationem tota-
mente complexus, Germaniam, Belgium, Itali-
am peragrare: variorum Principum, Gentium,
Urbiumq; mores cognoscere: & obsidionem Ur-
bis Bredanæ, per universa terrarum spatia famo-
sam, in qua omnes Mavortis artes, & industria
omnis, quasi in compendio, à prudentissimo,
rum temporis, Imperatore, Marchione Ambro-
sio Spinola, delineata erat, lustrare in animum
duxit. Insuper avunculi Cæsaris Ferdinandi II.

Maje-

Majestatem: Isabellæ Claræ Eugeniam, Infantis Hispaniarum, Belgarum Principis, & consanguineæ suæ magnificentiam & moderationem: & Summi Pontificis culmen venerari. Denique invisere nucleus terrarum Orbis: antiquitates advertete; rerum naturæ præclusa rimiari: et, solerti oculorum mentisque indagine, secretiora videre. Ad hæc enim curiosum nobis natura ingenium dedit: Et artis sibi Et pulchritudinis suæ conscientia, spectatores nos tantis rerum spectaculis genuit, perditura fructum sui, si tam magna, tam clara, tam subtiliter ducta, si tam nitida, Et non uno genere formosa, solitudini ostenderet. Ut scias illam spectari voluisse, non tantum aspici, vide quem nobis locum dederit. In media nos sui parte constituit, Et circumspectum omnium nobis dedit: nec erexit tantummodo hominem, sed etiam ut ab ortu sidera in occasum labentia prosequi posset, Et vultum suum circumferre cum totó, sublime fecit illi caput, Et collo flexibili imposuit. Ergo naturæ ductum & instructionem Vladislaus sequi voluit, & originis finisq; sui memor, in quem venerat, in quo vivebat, famamque nominis sui, crebris, è Moscovitico, Tartarico, Turcico hoste victoriis dilatabat, Mundum videre decrevit, & naturæ, ut natura voluit, mysteria & Sacra-
ta scrutari. Sed nonnullam flagrantí desiderio
Senec. de
vita beata.
Iouines moram,

moram, reluctantis Sigismundi Parentis cura faciebat: quæ tamen ipsa tandem, pravia delibera-

ratione adulta, in consensu m prudenter desiit.

*Quibus
comiti-
bus.*

Et jam nulla nisi de comitatu cura restabat: quæ tamen non diu anxious sollicitosque, in tan-

ta nobilissimorum Sarmatiæ virorum adolescen-

tumque copia, serenissimos Parentem filiumq;

torsit. Imprimis Alberto Stanislao Radzivillio,

Sac: Rom: Imp: Principi, Duci in Olica & Nie-

swies, Supremo Mag: Duc: Lithuan: Cancellario,

totius itineris reiq; directionem deferre placuit:

qui & hanc Provinciam libens in se suscepit. In

viæ comites Stephanum Pacium Mag: Duc: Li-

thuan: Notarium, & Lucam Zolkevium Capita-

neum Calusensem assumere visum est. Deniq;

Adamus Kazanovius, Castellanus modo Sendo-

miriensis, Archicamerarius Regni, in aula Regia

gratia florens, & illius fortissimi belli Ducis Martini Kazanovii frater Patruelis: Gerhardus Dönhoff, in Sac: Rom: Imp: Comitem postea eleva-

tus, Oeconomus Regius Mariæburgensis, Capita-

neus Coszerinensis, & Felinensis, & totius Prussiae

Cōmissarius Generalis bellicus, miles paulo ante in

Valachia, sub Vladislao Principe, fortis & felix, qui

Thorunnio adversus vim Suecicā Romana virtu-

te servato, Ducis Brigensis filiam cōjugem duxit:

Samuel

Samuel Rylscius Capitaneus nunc Rabstenensis,
Reinoldus von Rosen, & Nicolaus Piglovius,
Vladislai Principis cubicularii fuere.

Hac nobilissima Illustrissimorum virorum ^{Warsa-}
juvenumq; caterva stipatus, Vladislaus Princeps, ^{via disce-}
cum Annui ageret Orbis, post Christum natum, ^{dit Anna}
^{1624.} 17. die Maij, hora ante meridiem decima, ^{17. Maij.}
iter suum feliciter auspiciatus est, nullo quidem
ante se Principum Polonorum exemplo, quo sub-
sequentibus se ipsum poneret primus in exem-
plar. Ergo facta Serenissimis Parentibus valedi-
ctione, osculisq; manuum Regiarum, à præfato
itineris comitatu, expeditis, Warsaviæ, è conclau-
si regio, à Serenissimis fratribus ad currum usq;
deductus est. Quem proficiscentem Rex & Re-
gina, è fenestra Palatii, ultra etiam quam oculis
assequi poterant, faustorum omnium appreca-
tione prosequabantur.

Cæterum cum Vladislaus Princeps, ad ambi- ^{Czestoch-}
guam bellorum tumultibus Germaniam profici- ^{chovia}
siceretur, antequā Paternum Regnum desereret, ^{Euchari-}
gratiam opemq; divinam implorandam censuit. ^{stia Sa-}
Itaq; recta Czestochoviam versus, in utriusque ^{cramoste}
Polonici Bohemiciq; Regni limitib^o, iter direxit; ^{reficitur}
ut pœnitentiæ & Eucharistiæ Sacramento refice-
retur, & locum miraculosa D. Virginis imagine

famosum, magna cum reverentia visitaret. Per-
venit illac 21. Maij circa meridiem, & sequenti
die, voti compos, cum plerisque è comitatu suo,
sacra synaxi refectus est.

Nissam, ex improviso, ad Archiducem Carolum, cum venit 24. Maij.

Tum vero à Dno Wolscio Marschalco Regni
(qui salutandi invitandique gratia ad ipsum ex-
currerat) compendiosore demonstrata via, ante
meridiem adhuc Lublinecum, primam hoc tra-
lum venit. Etu Silesiæ civitatem attigit, & Caroli Archiducis
metropoli Nissæ paulatim appropinquavit. Quod
ut sensit Archidux, ad recipiendum magna cum
gloria Principem multa moliebatur: sed quæ o-
mnia Vladislaus Princeps, jucundo Stratagemate
quodam, destruxit. Cum enim Krapkoviciam
pervenisset, interceptis ubiq; Caroli Archiducis
exploratoribus, & singulari cura detentis, quo
famam adventus sui preveniret, hora duodecima
noctis, Nissam magna celeritate perrexit. Et tam
feliciter quidem, ut hora octava mane prius Nis-
sam ingrederetur, quam venire nuntiaretur. I-
psum Archiducem, nihil min' quam de adventu
suo cogitantem, in templo offendit; adeo novita-
te rei attonitum, ut illusionem suspicaretur. Per-
acto interim mutuæ salutationis officio, Sacro au-
diendo vacatur. Inde ab Ecclesia ad arcem pran-
diumque transitum est; saepius Archiduce inge-
minante,

minante, ut Poloniæ Princeps tractationem tumultuariam boni consuleret; sibi enim videri, se modo hospites non habere, cum per januam rectam non intraverint; adeoque pœnitentiam culpæ, ob impeditum occursum admissæ, prandii tenuitate explerent, in crastinum omnia cumulatius affutura. Cæterum Archiduce poculum vini, in sanitatem Poloniæ Regis, Reginæ, & Vladislai Principis exhaustiente, tormentorum explosionibus aër semper intonuit. Subsequentibus deinde aliquot diebus, in diversis plerumque jucundissimisque locis (quo alia aliaque, inter refectionem quotidianam, novitas oculos animumque pasceret) prandium sumptum, in quorum uno parasytus Caro i Archiducis, octo pisces vivos, singulos separatim, spectantibus serenissimis, deglutivit.

Inde cum ad umbilicum usque Junii, vestes aliæ, ad earundem quas adituri erant, gentium mores modumque prepararentur, Vratislaviæ per otium videndæ, Vladislauum Principem cupido invasit. Itaque 8. Jun: Cum pacio, Zolkevio, Dönhoff, & Kazanovio (quibus totum hoc itinere familiarius usus est) crepusculo matutino, illac ignitus discessit. Hoc enim propositum erat Serenissimi Principis, toto itineris tempore, non nosci, ad eoq; & fictitium nomen assumpserat, ut commo-

Vladisla
Princeps
Vratisla
viam ex
currit, 8.
Iungit.

dius Vladislai nomen & persona lateret: tum ut splendore nominis sui suppresso, præparatos hominum plausus declinaret, & omnium, victorias ejus mirantium & celebrantium, oculis ad verecundiam toties non sollicitaretur. Sed quemadmodum dies splendorem Solis, nubibus licet densis obscurati, demonstrat; ita evibrati, Serenissimi Vladislai Principis, virtutum radii, nullo non loco præsentiam ejus patefecerunt. Certe Vratislaviæ statim, in ipso templo, dum interesse sacrificio missæ cogitat, à militibus, qui in expeditione Valachica stipendia sub ipso meruerant, notatus fuit: quorum oculis sese caute subduxit, ut concursum curiosæ turbæ vitaret. Lustratis deinde omnibus, quæ oculos ejus merebantur, Nissam rediit.

Et jam, præparatis omnibus, destinata profecitioni dies 14. Jun: aderat: cum Archidux Carolus Vladislaum Principem Viennam usque comitari decrevit; et, nequicquam renitente Serenissimo Poloniæ Principe, adimplevit. Cum autem prope Viennam essent, placuit Serenissimis, eodem, quo intrat Vladilaus Princeps nuper, Stratagemate, adventus sui famam prævenire. Itaque uno solo curru vecti, duobus quemque comitantibus famulis, Viennam properavere. Successit amoenissimus do-

Archidux
cum illo
Viennam
intrat
21. Junij.

lus.

lus. Tantum enim à fama venientium aberat, ut eadem die Imperator cum Imperatrice, in Suburbanos hortos, animi gratia, concesserit. Læti tam prospero successu Serenissimi, cum Viennam jam fefellissent, eodem, ad fallendum Imperatorem, cursu festinabant. Et eadem vespera, equis concitari jussis, Imperatorem & Imperatricem, cum impetu venientis rhedæ strepitu in eventum arrestos, ex improviso salutavere. O quis tum stupor! quæ gaudia! quæ mutuæ benevolentiæ signa! Ruebat in alterius alter amplexum, & inter mutuas congratulationes, & varia mutui affectus Symbola, Viennam Palatumque Cæsarium ingrediebantur: In quo, post biduum, Serenissimus Poloniæ Princeps, comitantibus, Radzivillio Duce, D. Pacio, & D. Zolkevio, ab Imperatore, Imperatrice, Cæsarea prole, Carolo & Leopoldo (quisub hæc Viennam venerat) Archiducibus, in sanctiorem Domus Austriae thesaurum deductus est, & coacervatas à tot Imperatoribus Archiducibusque, tot annorum felicitate, divitias, cum variis stupendisq; raritatibus, & incomparabilibus naturæ artisque miraculis, ipso Imperatore omnia monstrante & explicante, lustravit.

Inde certatim Regum Principumque Legati variis Legatis visitaverunt ea-
Poloniæ Principem visitavere: & una quidem ea-
dislaum

Principe demque die, Dn. Carapha Nuntius Apostolicus:
invisunt. Comes de Ognati Regis Hispaniarum Legatus: &
a 5. Iun. Dn. Altovitius Legatus Magni Hetruriæ Ducis.
Sequuta porro quotidiana tripudia, hastiludia,
jaculationes ad scopum, venationes, & exercita-
tiones aliæ, ad honorem Principis institutæ. Quæ
plerumque etiam, ipso Serenissimo Principe bra-
bæum anhelante, in ipsius gloriam desierunt. Una
præcipue chorea figurata, ab Imperatrice, & quin-
decim ex ejus gynecæo Domicellis, partim solu-
tis, partim conjugatis instituta, plerorumq; spe-
stantium animos in stuporem traxit. Ad illam
cum promiscue homines cursitarent, facta per cō-
clave Imperatoris via, nemo, nisi quem Impera-
tor ipse januæ astans voluisse, aut Vladislaus Prin-
ceps, penes Imperatorem janua tectus, ex suis esse
suggessisset, intromittebatur. Multi in hac solen-
nitate ornatum, plures saltantium Domicellarum
decus & agilitatem, plurimi doctissimum ad nu-
meros alterno pede motum, suspiciebant. Omni-
um vero judicio, gratia, arte, dexteritate, palmam
Serenissima Imperatrix meruit. Hoc absoluto sal-
tu, & decantatis Serenissimorum, Imperatoris,
Vladislai Principis, & utriusque Archiducis lau-
dibus, reliqua pars mediæ noctis honori Sarma-
tarum impensa est; cum ipsa Imperatrix, pleros-
que

que è Serenissimi Principis comitatu, & in primis
Radzivillium Ducem, ad choreas Ordinarias se-
cum ducendas, invitárit, saltaveritque.

Cæterum Vladislauis Princeps, multis die-
bus, & affectui, & amori mutuo, & hilaritati im-
pensis, cum à febri (in quam summo omnium, &
vel maxime Imperatoris, cum dolore, inciderat,
& diebus aliquot decubuerat) convaluisset, ad
promovendum, in ulteriorem Germaniam, iter,
se præparavit. Et Imperator quidem diutius
præsentiam ejus anhelabat: sed votum ejus intra
resolutionem Vladislai Principis erat. Itaq; cum
ulterius præsentia ejus frui non posset, cum Se-
renissimis filiis, & Archiduce Carolo, Vladislauum
Principem, Vienna discedentem, ad medium
milliare, extra Urbem, honoris gratia comitaba-
tur. Cui cum vices Poloniae Princeps rependere
vellet, ante se Imperator loco movere non voluit,
quam, valedictione peracta, mixtisque comple-
xibus, Princeps abiisset.

Reliquerat profecto magnum desiderium
sui, & famam virtutum suarum non exiguum, Vi-
enna, Vladislauis Princeps: cum omnes summam
ejus in armis dexteritatem, in congressu mansue-
tudinem, in colloquio affabilitatem, in rebus o-
mnibus prudentiam admirarentur. Adeoq; &

Virtutes
Vladislai
Laudatae,
& Prin-
cipum er-
ga illorum
studium
sibi.

sibi gloriæ singuli Magnates duxerant, si ejus humanissima conversatione, vel minimo tempore, frui contigerat. Sed & fama tantarum virtutum (præter eam, quæ Moscoviticis, Turcicis, Tartaricisque triumphis, jam antea omnium animos occupaverat) Viennâ, in Germaniam reliquam, admirabili celeritate proficisciens, omnium affectus & curiositatem magis, ad recipiendum vindendumque tantum Principem, erigebat. Quapropter ut primum præsentiam ejus, ab Austria in Imperium ascendentem, Germania animadvertisit, tota quodammodo ad salutandum, congratulandum, invitandum, & venerandum commota est. Adeo ut (quemadmodum Cicero se Italiæ humeris, ab exilio, in Urbem Romanam, delatum gloriabatur) meritissimo jure, Germaniæ, Imperiiq; Romani Electorum, Ducum, Principum, Comitum, Magnatum, Urbiumq; liberorum congratulationibus, celebrique comitatu, Bruxellas in Belgium, ad Serenissimam consanguineam suam, Isabellam Claram Eugeniam, seductum gloriari possit.

At, ne exaggerare rem videar, studium omnium erga eum Linzij ex pictura Vienna missa ag- um erga eum Linzium proficiscentem, videam^{m.} Antequam eo veniret, jam & curiosa artificum Viennæ depictus, & eorum, qui eum ibi noscitur, cognosc-

cognoverant, descriptione, ita erat Linzii deli- *& salutat*
neatus, ut cum Urbem, famulantum turbæ im- *tur 19.*
mersus, ingrederetur, & se à nemine cognitum
iri existimaret, jam & à Capucinis, & Societatis
Iesu Patribus, directis in eum, summa ipsius cum
admiratione, oculis, salutaretur. Cum Salisbur-
gum deinde, 23. Julij, sub crepusculum vesperti-
num intraret, statim ab Archiepiscopo salutatus,
in sequentem diem, ad Palatum & prandium hu-
manissime invitabatur. Quo, sequenti die, rega- *Salisbur-*
liter absoluto, extra Urbem eremitoria, hortum *gi ab Ar-*
Archiepiscopalem, Salientum aquarum fontes, *chiepis-*
magna cum voluptate, lustravit. Ad Palatum, *copo re-*
horto vicinum, cum transisset, Archiepiscopo su- *galiter*
perveniente, in eo, ex selectissimis, quibusvis con- *tractatur*
fectionibus, collationem sumpxit. Altera subse-
quenti die, auditio in sacello Archiepiscopali Sa-
cro, & alio, extra Civitatem, per amœno superbo-
que Palatio visitato, comitantibus Archiepisco-
pi Commissariis, propositum Poloniæ Princeps *A Baya-*
iter prosequebatur. Sed, ecce, vix aliquot millia- *ria Ele-*
ria processerat, cum in Petingensi Pago, Bavariæ *dore in-*
Electoris Commissarii obviam venere. A quibus, *vitatus*
nomine ejusdem Electoris, invitatus, Monachi- *Mona-*
um cum eis intravit. Et aberat tum quidem Ele- *chium*
ctor, gravissimorum negotiorum causa, Noriber- *intrat.*
28. Jul.

T

gæ,

gæ, cum Moguntino Electore occupatus. Tamen ejus nomine Marschalcus Curiæ Baro Teringius, cum majore aulæ Bavariæ nobilitatis parte, multis curribus, extra portas, in oœcursum prodidit, et, honoris gratia, Vladislaum Principem, nitidissimam (ut fama refert) Germaniæ Urbium, Monachium introducit. Quænam ibi tum gaudia, qui concursus, quæ vociferationes curiosi & promiscui vulgus, nemo facile dixerit. Exciverat Serenissimum Ducem Guilielmum desiderium videndi Poloniæ Principis, Ratisbonæ, ex cellulis Carthusianorum. Hic, cum Serenissima Electrice, Vladislaum Principem, singulari lætitia & humanitate, in Palatio excipiebat; & ab utroque, ad conclave suum, omni apparatum splendore instructissimum, deducebatur. Nil magis autem comitatum ejus, quam Palatii, & potissimum Salæ, camerarumq; Imperialium, magnificentia, superbiaque, in admirationem rapuit. Nec mirum: cum nihil hisce, tota Germania, simile reperiri, perhibeatur.

*Maximi-
lianuſ E-
lector Mo-
nachium
Principē* Maximilianus Elector, ut primum Poloniæ Principem sua subiisse tecta comperit, aut suspensis, aut expeditis negotiis, Monachium propernens, vit, et, circa horam noctis undecimam, post bīduum adfuit: & mane statim Principem Vladislaum

laum adire, salutare, felicemque adventum con-^{Vladislau}
gratulari, non destitit. Ad comites quoque Ele-^{salutat.}
ctoris benevolentia sese extendit: quibus singu-^{31. Iulij.}
lis humanissime dexteram osculandam præbuit.
Et prandium cum Vladislao Principe, in illo an-
tiquario suo sumpsit, quo pulchrius aut curiosius
aliquid, oculis videri posse, quivis merito dubi-
caverit.

Reliqui, usque ad albitum, dies, armamen-
tario (in quo, præter magnam copiam tormentorum, ingens eorum multitudo, quæ ex prælio
Pragensi, aliisque locis, à victore Maximiliano,
huc translata fuerant, videbatur) domo, in qua
rarissima naturæ & artis opera asservantur: facello
illo intimiore, quod Virginū Principi salutatæ, Ge-
nitrici Genitoris sui jam geniti gignenti sacrum, dica-
tumque, & totum quasi ex auro, adamantibus, &
lapidibus aliis pretiosis, compositum constru-
ctumque est; & similibus aliis perlustrandis, ab
sumptu. Quibus visis, Vladislaus Princeps, Augu-
stam vindelicorū pergere meditabatur. Maximili-
anus Elector, cū Principem ab honesto proposi-
to dimovere non vellet, generosissimo illū equo,
pretioso ephippio phalerisque superbo, donavit.
Itaque Princeps, Electrici, & Guilielmo Duci,
valedicens, cum Electore Starenbergam abiit:

^{Vladisla-}
^{us Maxi-}
^{mianus}
^{Elector}
^{valedicit}
^{7. Aug.}

ubi, sequenti die piscatione & venatione recreati, ab amplexibus, in diversa viarum, divulsi, in vicem valedixerunt.

*Augusta
Vindeli-
corum in-
trat. 8.
Aug.* Et Vladislaus Princeps quidem, Augustam Vindelicorum, sub Vesperam sequentis diei ingressus est. Quem ubi advenisse Magistratus advertit, summo mane, honorarium vinum offrens, salutavit. Inde quicquid in civitate præcipui, aquariam machinam, templum & reliquias S. Udalrici, armamentarium, Fuggerorum domus, stabula, & equos lustravere. Aderat ipse Dominus Fuggerus, & Poloniæ Principe salutato, ipsum cum toto comitatu suo, ad cœnam nocturnasque choreas invitavit. Acquievit Princeps, & cœnam cum ipso, uxore, & sorore ipsius sumpfit. Cum vero, absoluta cœna, ad amplissimā salam deduceretur, exspectantes ibi musicos, & avidam cum tanto Princepe saltandi virginum Patritiarum turmam, veterum more, albo vestitam habitu, simplicitatem prioris seculi referentem, offendit. Nec abnuit omnino Vladislaus Princeps: sed septem aut octo gyros choreales absolvit, ne ipsarum penitus desiderium contempsisse videretur.

*Noriber-
gam in-
greditur.
14. Aug.* Augusta Vindelicorum Poloniæ Princeps, per Donawerdam, Noribergam profectus est. Et hanc

hanc quidem, mediocri promiscui vulgus cursu, intravit. Cum vero sequentis diei mane, Teutonici Ordinis Commendator, quatuor curribus Principem, ad domum Teutonicam, Misæ audiendæ gratia, deduceret, tanta hominum, Poloniæ Principem videre desiderantium multitudo confluxit, ut tectis, domibus, & plateis occupatis, vix homines hominibꝫ cederet, & via vix curribus rotisque pateret. Addidit, audito Sacro, Magistratus Principi Syndicum Urbis, ut Senatorialm Domum, armamentarium vetustate, magnitudine, & multitudine armorum celebre, arcem insuper sive castrum, commodius meliusque lustraret.

His magni nominis Urbibus prælustratis, per Herbiplim (à cuius Episcopo summo in honore habitus fuit) Hanoviam, & Francofurtum ad Mœnum, Moguntiam navigavit. Et aberat tum quidem Moguntinus Elector, quare à famosissimo, ob eruditionem & eloquentiam Viro, Patre Maximiliano Sandæo, Societatis Jesu nomine, salutatus, ad eorundem collegium visitandum invitabatur. Et Vladislaus Princeps, gravissimi viri eloquentia, in assensum tractus, humanissime acquievit. Visitatione vero prandioque perfecto, Schapha cum suis Rhenum tentavit. Sed

Mogun-
tiam 25.
Aug.

nobilissimus Germaniæ fluminum, vehementia
venti, in procellas altiores actus, nō sine periculo

*In Rheno
periclitata
bur.*

Principis & sociorū ejus, intumuit. Adeo ut Vla-
dislaus Princeps, mores ejus, in perniciem navi-
gantium proniores, abhorrens, in proximo, uno
à Moguntia milliari, pago, reliquum istius diei
noctemque quiesceret, usq; dum insidiosa tem-
pestas desævissit. Et favere Cœlites. Altera enim
lætior sereniorque dies erat, & Rheni mira quies,
mira malacies. Verissimūq; illud apparuit, quod
Anneus. Nulla tempestas magna perdurat. Procellæ
Lib. 7. quanto plus habent virium, tanto minus temporis.
Natur. Venticum ad summum venerunt, remittuntur omni
violentia. Necesse est ista concitatione in exitium sui
tendant. Ergo felices illas ad Rhenum terras, viti-
feros illos ab utroq; latere montes, & vestita pa-
gis littora, undique uvas & vinum offerentibus
Feliciter accolis, securi & maxima cum voluptate, præter-
navigaverunt. Bacharaci (ubi præstantissimum
Rhenense vinum nasci dicitur) à Geldriæ & Pa-
latinatus Gubernatore, Verdugio, magno tor-
mentorum boatu, & lautissimo prandio, Polo-
niæ Princeps excipiebatur. Cum deinde castrum
Pfaltz (vet' quædā arx est & turris, rupi, medio
injectæ Rheno, superstructa; quæ toti deinde Pa-
latinati nomen dedit) curiosius perlustrasset, &
reascen-

reasensis navibus Boppardum versus vela face-
ceret, Trevirensis Electoris Commissarii, alia o-
neraria rate occurrentes, ipsum, Archiepiscopi
Domini sui nomine, confluentiam in Palatium
Archiepiscopale, hac nocte diverteret, roga-
runt: quo, importunitatis evitandæ prætextu,
nonnihil reluctante, illi navem suam Sarmaticæ
navi colligantes, simul perrexere, dicentes eam
esse Domini sui voluntatem.

Cum inter mutuas colligatarum navium ci-
vilitates, tribus enavigatis miliaribus, ad civita-
tem applicuissent, ecce aliis, & aliis honor. Sta-
bant, in arma coacti, toto littore, longo ordine, cives.
Arcensia tormenta omnia, iteratis vicibus, Trevirē-
m magno fragore reboabant. Ipse Archiepiscopus si, mira
Elector in porta (quæ tamen prope Palatium hu-
erat) excipiebat. Et, Electore Sarmatas in Pala-
tium deducente, festivis, à tergo, cives explosio-
nibus prosequabantur. Tum vero, cum Palati-
um subiissent, prolixiora adhuc Electoris, erga
Principem, benevolentia studia: & in cœna, sex-
centis luciniarum ferculis sumptuosissima, non
extrema musica, dum corpus reficeretur, aures
demulcebat.

Confluē-
tia, ab E-
lectore
Trevirē-
si, mira
hu-
māni-
tate ex-
cipitur.
24 AUG.

Nec tamen hisc terminis, officiositas Archi-
episcopi, circumscribebatur. Ut primum enim,

Officiosus
Electoris
Trevire-
fis dolus. ex vicinis Sarmatiæ Regnis, Phœbus faciem suam ostendit, quasi nihil egisset, ad nova beneficia sese composuit. Initium autem à sacris faciens, Sancti Sebastiani Craneum, ad osculandum Poloniæ Principi, & universo comitatui ejus, propria sua manu porrexit. Inde ad jentaculum invitavit: sed Vladislao Principe omnino renuente, mixtis invicem amplexibus, valedixere. Putabat Poloniæ Princeps, jam sese Archiepiscopi Electoris benevolentia etibus explicuisse. Sed invenerat astuta humanitas ej^o, quo ulterius obsequiis suis, jucundo Stratagemate, Princeps navigaret. Navem propriam suam, esculentis, poculentis, rebusque necessariis omnibus, tanto Princeps dignis, ad abundantiam instrui jusserat. Tum Commissariis suis, ut non uno verborum lenocinio, Poloniæ Principem, nihil hujusmodi opinantem, in illam pellicerent, imperarat. Quid faceret Princeps? Navem ingressus est. Non ante autem officiose circumventum se vidit, quam, dum *terræque Urbesque recedunt*, Strata à Commissariis mensa, sumptuosum jentaculum apponeretur. Tum risus, joci, sales: quibus adeo Vladislaus recreatus fuit, ut instructum postea, eodem modo, prandium non aversaretur.

At

At jam vix millaria pauca processerant, cum ^{Ab Ele-} Serenissimi Electoris & Archiepiscopi Coloniensis Commissarii, Dominus Crivellius, cum aliis ^{etore Co-}^{loniensi} tribus, occurserent. Salutabant illi, Domini sui ^{Bonnam} nomine, & humanissime invitabant. Prorsus quasi ^{introdu-}^{citur. 25.} ex composito, Poloniæ Princeps Vladislau^s, ab Archiepiscopis & Electoribus invicem in manus tra-^{Aug.} deretur. Quin immo & Elector, cum Alberto Du-
ce fratre suo, Vladislauum Principem, secundo flu-
vio descendantem, ad ripam Rheni, curribus,
rhebus, & equis, exspectabat. Grande piaculum
fuisset tantum Electorem transisse: humanitatem
sprevisse, nefas. Quid ergo? Relictis navibus flu-
ctibusque, prævia salutatione & amplexu, terram
iterum & currus ascendunt. Ubi in late patentes
campos ventum, venatio placuit. Qua recreati
Serenissimi, repetitis curribus, Bonnam intrave-
re. Ut primum autem cataractas portarum tran-
siere, ejusmodi ingentium machinarum fragore
salutati fuerunt, ut rumpi cœlum, moveri terra,
& omnia misceri elementa viderentur.

Altera mox die, generosissimus Dominus ^{Neobur-} Adolphus Wolff Metternich, Serenissimi Wolf-^{gici litte-}
gangi Guilielmi Neoburgici, Juliæ, Cliviæ, Mon-^{re ad Vla.}
tium Ducis Commissarius, litteras humanitatis & ^{Principi.}
officii plenas, Serenissimo Vladislao Princi^{26. Aug.} tra-

V didit.

dedit. Desideraverat Serenissimus ille Dux faciem
Vladislai Principis: sed prægnantibus causis ur-
gentibus, in Hispaniam, paulo ante, discesserat.
Non omne tamen officium secum trahens, has,
tradendas Serenissimo Poloniae Principi, litteras, in
amoris & affectus Symbolum, Dusseldorpii Com-
missario suo, reliquerat. Est enim ille Dux, si quis
alius, benevolentiae & humanitatis eximia; adeo
ut, sicut omnium aliarum virtutum ergo, ita haec
quoque ex parte, tota passim Germania celebretur
Quare & Commissarius ejus, ad mentem Ducis
sui, non ante à latere Principis Vladislai abivit,
quam eum Bonna, ad ipsos Brabantiae fines, obse-
quij & observantiae ergo, deduxisset. q. supradictis

Cæterum (ut ad Vladislaum Principem, Elec-
torem Coloniensem, & Albertum Ducem, Bonnæ
litium ^{mi fort a-} se mutua præsentia exhilarantes, revertamus)
rei sacer ^{totalis} post prandium in sequentis diei, placuit industriæ
perlu- Batayicæ monumentum, pilei Sacerdotalis (ger-
frat. 27. manice Pfaffen Müß) fortalitium perlustrare.
Aug. Est autem illud in Insula Rheni, æquali prope di-
vortio, à continente divisa, munimentum, & ap-
paret à longè spectantibus, prorsus inexpugnabile;
quod tamen, sub Henrico Montensi Comite, par-
tim Hispanicis, partim Ducis Neoburgici, copijs,
jugis in adanis. Totius pomeridianum tempus

curiositas illa consumpsit. Postquam vero, omni-
bꝝ perlustratis, Bonnam reversisunt, generosissimo
equo, phaleris & Ephippio pretiosissimo, Princi-
pem Elector donavit.

Urebat autem, Principis Vladislai pectus, de-
siderium illius celeberrimæ Urbis, Coloniæ Agrip-
pinæ visendæ. Itaque, absolute prandio sequentis
diei, comitantibus, Electoris, & Neoburgici, Com-
missarijs, navigio illac descendit. Tum vero, cum
amplissimam hanc, Sanctam, famosissimamq; Ro-
mani Imperij Urbē, sub oculos suos haberet, ut so-
litā eius, in superioribꝝ ejusmodi Divis adorandis,
humanitatē effugeret, latere (ut toto itinere fece-
rat) suarum partium duxit. Sed non adeo oculatis-
simæ Urbis, ingenio suo, sensum evaserat, ut non
illa adventū ejus, varijs artium humanissimarum
beneficijs, præcognosceret. Itaque machinæ gran-
diores passim, per valla, munitionesque ad congra-
tulandum, dispositæ: coacti in arma cives milites-
que: Consules & Senatores, Rhedis curribusque,
in ripa Rheni, ad salutandum, præparati stabant.
Et juxta tantum promiscui sexus, quantum Provin-
ciæ non strictæ sufficeret. Dum vero, inter huma-
nissimæ Urbis benevolentiam, & Principis Vladi-
slai modestiam, decertatur, vicit tandem ingeniu-
m Principis, & navigio littus appellens, per suos,

Coloniæ-
sis Vrbis
erga Vla-
di slau m

Princi-
pem mira-
humani-

tas 28.

Aug:

jam formanti salutationis verba Senatui, nō in hoc,
sed in sequenti navigio, Vladislaū Principem esse,
insinuavit. Credidit, qui neminem noverat, asse-
rentium verbis Magistratus: Nec ante deceptum
se vidit, quam ē sequenti navigio, Commissarios
Electoris, & Neoburgici Ducis, prodire conspexit.
Interim Poloniæ Princeps, confertam turbam pre-
mens, Urbem ingrediebatur. Tanta autem erat,
Vladislaum Principem videndi, curiosorum ho-
minum multitudo, ut transitus nullo paēto, nisi
per exiguum viam, quam, Satellitum officialium-
que militarium opera, & baculorum adminiculo,
factam, milites custodiebant, pateret. Ut primum
autem hoc tecta sua subiisse Numen, & perspica-
ciam suam se felliſſe Senatus animadvertisit, statim,
ad hospitium veniens, facta verbis, in exquisitæ hu-
manitatis speciem concinnatis, salutatione, stu-
diorum officiorumque suorum promptitudinem,
Serenissimo Principi totique comitatui ejus, mi-
ra propensi animi & affectus declaratione, obtulit.
Ne vero loqui tantummodo videretur, statim ad
cænam, & singulos postea pastus, quadraginta co-
ronatos, per Urbis insignia, cantaros, prætorio, ut
appellant, vino plenos, viginti sibi invicem, longo
ordine, succendentium virorum ministerio misit.
Sequenti die placuit Poloniæ Principi maxi-
mam

mam lustrare Urbem, & frequentia Sanctorum
delubra venerari. Cum vero Civitas omnis, ad <sup>templa
& adifi-
cia publi-
caluistrat</sup> Principem, quem non noverat, & adesse tamen
didicerat, videndum commoveretur, hunc jugi-
ter morem Vladislaus servavit, ut comitatui suo ^{29 Aug.}
immersus, innumerabilis & curiosæ plebis oculos,
effugeret pariter & irritaret. Sic, deducentibus
eum Consulibus, amplissimæ Urbis ambitum,
magnifica ædificia publica, spectabiles conti-
gnationibus multis privatas domus, duobusque
cornibus, semilunari concavo, Rheni præterfluen-
tis allapsum, et, è regione Divitiensi monumen-
tum vidi. Sic armamentarium, novæ militiæ in-
ventis prægnans, et, præter cætera tormenta, no-
tas per Alphabetum grandiores machinas, & San-
ctos, miræ capacitatis, Apostolos, sic nuncupatos,
advetit. Sic frequentissima illa Divorum Temp-
la, architecturâ mirabilia, ornamenti varia, plum-
bo tecta, & Sanctorum reliquijs venerabilia subiit
& veneratus est. Sic S. Ursulæ, & tot millium so-
ciarum Virginum: Sanctorum Gereonis, Mauritij,
& sociorum martyrum, ossa & sanguinem, pijssi-
mus Princeps, christiane coluit. Cum vero, tran-
siens ad unco monumento turrim, Metropolitanā
D. Petri Basilicam subiisset, & venerabilia trium
Orientalium Magorum Regumque corpora de-

tempora
ob ambo
non capte
ad ambo
ad ambo
ad ambo
ad ambo
ad ambo
ad ambo

votus visitaret, & ipse, suis immeisus, Agrippinenses hucusque se felliisset, casu, promiscue omnibus, quis esset innotuit. Aram Dux Radzivillius prior ascenderat, & porrigens Vladislao dextram, ascendere parantem juvit, alii subsequebantur. Cum omnes autem ora, ad aram, oculosq; converterent, quis esset Poloniæ Princeps noscere curiosi, corona Vladislao Principi, omnium, ut oportebat, primo imposita est, & futuri aliquando Regis tempora ominosum diadema cinxit; hoc circumstantium omnium vociferatione & applausu, ac si jam Regem Poloniæ, quem Principem cognoscabant, coram intuerentur.

*In Senato
toria do-
mo, ma-
gnifica
collatio-
ne, à Senatu
excepit* Inde, eodem deducente Senatu, majori jam populi concursu & curiositate, munitam tutamq; ferreis portis, tormentis, vigilibusque Senatoriam domum: frontispicium, innitens, è porphyrio la- pide, columnis, candido alabastro, auro, marmore, historiisque ornatissimum perlustravit. Et illam curiæ turrim, tot centenis simulacris quodammodo fastuosam, ascendit: veteris militiae arma & machinamenta vidit: & desuper turritam Urbem, & omnia circumiacentia loca spectavit. Instruxerat autem magnificam & sumptuosam collationem, in camera illustriori, Senatus: ad hanc Princeps, post omnia, ductus est. Et acquieavit,

cum

cum humanissimam sinceramque Magistratus benevolentiam, in omnibus experiretur.

Postera dies, sicut & altera insequens, pariter magnificentia Urbis impensa est. Hac quoq;^{Reum su-} cum laude Poloniae Principis, & singulari ejus^{spendio} liberat.^{31. Aug.} clementia & misericordie fama, quod pauperem, ad exiguum furtum, magna necessitate coactum, intercessione sua apud judicem binosque scabinos, suspendio liberarit, cum jam jamadfurcam ducendus esset. Quam Principis virtutem, tum omnes, tum promiscuum vulgus, quod ad spectaculum innumerabilis multitudine convenerat, maxime celebravit. Adeoq; & ad hospitium Vladislai Principis, plerique se contulerunt, ut, cum jam vidissent qui liberatus fuerat, curiosiore oculo tantum Principem intuerentur, qui insigni clementia & misericordia liberavisset.

Noluit Vladislauis Princeps, tum quidem late sedulus, inter cognoscentis se vulgi frequentiam, diutius commorari: sed, actis Reipublicæ, pro singulari benevolentia & humanitate, gratiis, Urhem, ut advertit, & statutis, & moribus, & magnificencia, veteris Romæ æmulam, quarta, postquam intraverat, die, prima Septembribus, tandem deseruit. Quem Juliacum versus proficisci tempestis tormentorum boatis Colonenses prolebas.

Colonia
discedit
1. Sept.

queba-

quebantur. Ut primum vero Juliacos fines attigeret, Adolphus Wolff Metternich, equo desiliens, Vladislaum Principem, nomine Neoburgici Ducis Wolfgangi Guilielmi (qui in Hispaniam, ut dixi, paulo ante discesserat) humaniissima salutatione excepit: qua peracta, rursus insiliens equum, per Universam Provinciam porro, Commissarii munere fungens, comitabatur. Adfuere & ex presidio Juliacensi milites sagittariique, ut Principem securitatis gratia, una cum Electoris Coloniensis Guardia, comitarentur. In plerisque Juliacensium pagis, puellæ, tenso per adversum, vel transversum plateæ, filo, Vladislai Principis (quem ex antecedentium militum proditione, & pluma pilei alba nigraq; cognoverant) equum veluti captum detinuere; donec aliquod ipsis honorarium offerretur. Hoc plerumque Sponsæ, sparsis capillis, fecere. Per hæc tam frequentia puellarum studia, Juliaco Princeps appropinquavit. Civitate vero ipsa jam oculis incurrente, Administrator, seu Vices gerens Neoburgici Ducis, cum Gubernatore arcis, officialibus belli, magnaue nobilium Provincialium manu, occurrit. Qui, prævia felicis adventus congratulatione, desiderium Ducis Domini sui, Hispanico itinere impediti, fruendi hac felicitate exponit: deinde Vladislaum Principem ad

*Iuliacum
venit*

ad civitatem castrumque dedit. Interim tormenta omnia, magno aëris fragore, latitiam testabantur. Quin immo & Gubernator, quasi non esset ulterius quod imperaret, quod regeret, quod custodiret, traditis Principi clavibus arcis, omnia sua Principi, & seipsum commendavit.

Inde, cum Poloniæ Princeps sequenti die sanctissimas, & non, nisi evoluto septennio, publice ostendi solitas, Aquisgrani reliquias, & vidisset, & veneratus fuisset, ad primos septendecim Provinciarum, hoc est Belgii, fines pervenit. Sed, ecce, jam Serenissimæ Infantis Legatus, Comes de valle, In Belgij limitibus à Legato tanto terrarum spatio, Bruxellis, in occursum Serenissimi Principis Vladislai missus, magno nobilium numero stipatus, adventum ejus præstolabatur: & humanissima Oratione, Serenissimæ Infantis nomine, excipiebat: qua absoluta Wisetham Serenissimæ Infante simul perrexere. Ibi, cum rumor esset quingentos Hollandorum equites, Serenissimo Principi insidias struere, Stratagemate agendum ratus, publice spargi jussit, Leodium se vel Terlemontum versus, iter suspecturum, Officialibus interim clam monitis, tota nocte Diesthemium esse properandum. Hac solertia & celeritate Principis Vladislai factū est, quod Batavi, primo, qui in vulgus iverat, ru more decepti, Leodium & Terlemontum versus,

itinera incassum observarēt, & Serenissimus Princeps, expedito itinere, tota nocte progressus, octava matutina, Diesthemium, salvus cum suis inmum ve
traret. Sed cum sopor omnes occupasset, ad tertiam usque pomeridianam quiescitur, & debitum noctis, interversa hac parte natura, diei impenditur. Interea temporis refectione præparabatur, quæ, quoniam hora non nisi post meridiem, quarta sumpta est, pro prandio simul & coena satisfecit. Tum tenebris iterum restituto sopore, stipulata rursus cum nocte concordia.

Mane, hora inter quintam & sextam media, Dominus Pacius, cum Comite de Rhekam (qui Coloniâ nuper Bruxellas præcesserant, & nunc die antecedenti, cum Serenissimæ Infantis aula, in occursum Serenissimo Principi, Namurcum profecti fuerant) advenere. Adeo quippe, sparsus, solertia Principis, Wisethæ rumor, invaluerat, ut Infantis aula, pari errore cum Batavis, circa Vladislai Principis iter, caligaret. Cæterum parem gaudio & festivis congratulationibus diem, ante hac, Belgium fere non meminit, qualiter hanc ipsam, non leviter obstupefactum, sensit. Postquam enim Vladislaus Princeps, Diesthemio profectus, ad illam, celebratis à maximis, Lipsio & Puteano, Viris, miraculis celebrem, D. Virginem Aspricollensem,

Lovanii
intrat 6.
Sept.

sem, Sacrum, musicis instrumentis solenne, audiisset, & jam Lovanio, verissimis Belgarum Athenis, appropinquaret, medio, ab illa Urbe, milliari, Comes de Nojelles, Infantis Oeconomus, cum ejusdem aula & Guardia, occurrens, Infantis nomine, Poloniæ Principem salutavit. Paululum deinde progressi, civium nonnullæ cohortes, quatuor distinctæ vexillis, ab utroque latere viæ, per medium Serenissimum transeuntem, festivis bombadarum explosionibus, honorerunt. Cum portam ipsam ingrederentur, machinæ grandiores & mortaria, ut vocant, in publicæ lætitiae signum, detonuere. Musica deinde, mixta suavissima variorum musicalium instrumentorum harmonia, Sarmatarum animos auresque demulsit; ut non tantum Belgium, sed in Belgio Musarum quoq; domicilium se intrasse animadverterent, & non uno festivitatis & lætitiae gressu, ad hospitium prandiumque ferrentur. Hoc Regali prorsus magnificentia, Princi, in Dalensi Collegio, præparatum fuit. Ibi Hispanus nobilis, genu flexo, Vladislao aquam porrexit. Quia autem eo, quo Archidux Albertus, modo, Poloniæ Princeps, jussu Infantis, tractari debebat, nullus, nisi Dux Radzivillius, in eadem, cum Principe, camera layit, reliquis in antecameram

lotum exeuntibus. Quin imo Infantis Legatus, Comes de Nojelles, rogatus, ut Principis mensæ accumberet, potius moriturum sese, quam id facturum, respondit. Tantum quoque Vladislai Principis reverentiæ & obsequio datum, ut neq; incolarum quisquam, neque exterorum, imo ne famulorum quidem Principis, aut spectatum, aut servitum admitteretur.

*Miru cō-
cursus
hominū
Vladislau
videre cu
pienitū.* Cæterum cum Belgium universum, præsentiam tanti Principis (cujus famam, fractis paulo ante Orientis Viribus, & Osmano Turcarum Imperatore, ad mortem usque, victo, prostrato, humiliato, per omnes totius Orbis nationes, immensu- sa cum gloria, properantem, mirabatur, & cuius faciem videre, inter felicia sua numerabat) sentiret, ex omnibus passim Provinciis, Urbibus, Locis, Magnates juxta ac plebei, ad videndum concurrebant. Adeo ut, cum, post prandium, Lovanio Bruxellas moveret, totum iter, quod quinque milliarium est, curribus, equis, hominibus, euntibus & redeuntibus, occurrentibus & à tergo sequentibus, ita fuerit refertum, ut forum quodpiam nundinale videretur. Et interhanc, hinc inde approrerantium, abeuntiumque frequentiam, quatuor milliaria, Poloniæ Princeps confecit. Ad quintum autem cum pervenisset,

ecce

ecce nova reverentiæ facies, novum lætitiaæ argu-
mentum, novus honor. Quippe Præfecti stabuli,
rheDIS, curribus, & equis, occurrebant. Quorum
major Comes Octavio, rhedam pretiosissimam, &
expresse noviter pro Vladislao Principe factam,
eidem tunc præsentavit.

Et jam Poloniæ Principi, Urbi magis magisq;
appropinquanti, alii aliiq; honores defereban-
tur: quin immo & ipsi Hispaniæ Grandes, obvi-
am illi exire voluerunt, petieruntque. Sed adeo ^{Varij o-}
^{currunt} ^{Polonia} Vladislaus Princeps recusavit, ut Principis titu-^{Principi.}
lum, si id fieret, exuturum se diceret, confusum-
que iri ex illis quicunque venisset. Attamen ne
sic quidem omnium officiositatem evalit. Quip-
pe unus ex illis, humanitate fortassis, vel affectu,
cæteros anteire cupiens, Ducibus, Comitibus, re-
liquisque Serenissimæ Infantis aulicis, in occur-
sum Principis festinantibus, sese inseruit. Ad
quos cum Serenissimus Princeps, paulo post Præ-
fectos stabuli, pervenisset, omnibus salutatis, il-
lum nec affatu, nec nutu quidem venerabatur;
adeoq; præposterum ejus humanitatis officium
prudentissime castigavit. Ante ipsam Urbem,
cum Poloniæ Princeps jam pervenisset, civium
Bruxellensium major pars, sub tredecim vexillis,
ordine in aciem efformato, explosione bambar-

darum, conceptam, ex tanti Principis præsentia,
lætitiam testabatur.

Cum autem, adulta jam nocte, civitatem
Bruxellas ingrederetur; collucentibus undiq; tædis, rogis,
intrat, facibusq; non aliter, debellatis tenebris, quam
vulnera- tur, & ab mera die progredebatur. Unum autem, non
Infante interruptam hucusque istius diei lætitiam, festi-
excipitur vitatemque, velut nubes serenitatem solet, in-
fortunium corruptit: Quod tamen insignis pru-
dentia, clementia, virtusque Principis, tantum
suum esse voluit, ne ad alios vel nutu exiens, pe-
riculum infelici reo, & publicæ hilaritati, tristi-
tiæ nebulas intermisceret. Res est. Quia eodem,
quo, gloriæ memoria, Archidux Albertus, ho-
nore, Poloniæ Princeps recipi afficique debebat,
more tunc temporis recepto, domitores equo-
rum, seu Cavalirizzi, Serenissimo Principi quoq;
occidentes, ab utroque latere, ad Palatum co-
mitabantur. Horum unus præmonitus, ante ad-
ventum Vladislai, ut ferrum, quo vagina gladii
præmunitur, vacillans, curaret firmari, neglexe-
rat. Jam autem, fungens quoque officio suo, in
porta ipsius Palatii Bruxellensis, inter murum &
currum proprius adiectum medius, neque, ob
ingruentem equitum turmam, pedem reducere
valens, manubrio gladii in murum impacto, api-
cem

cerm ejusdem, vi pergentis currus, pedi Principis
infixit. Sensit se vulneratum Vladislaus, indicium
tamen doloris nullum prodidit, sed vulnerantem
manu protrudens, ad aulæ majoris gradus per-
rexit. In gradibus soli Radzivillio Duci vulne-
ratum se querebatur: cui, quo in loco, petenti,
pedem & ocreas totas cruentatas ostendit. Hor-
rente & attonito Radzivillio Duce, Princeps ma-
gis magisque impallescet. Attamen, ut & pec-
tantis saluti consuleret, & ansam tumultus ma-
joris eriperet, rem totam, silentio tectam, dissi-
mulavit. Quam recte, Senecam audiamus. *Nihil* Consol.
ad Mar.

pulchrius existimo, inquit, in fastigio collocatis, quam
multarum rerum veniam dare, nullius petere. Cæ-
terum Serenissimo Principi, medietatem gradu-
um jam emenso, Infans Hispaniarum, Isabella
Clara Eugenia, Belgarum Princeps, monastico
virginum Carmelitarū habitu vestita, occurre-
bat, et, humanissima salutatione prævia, eundem
appræhensa manu, ad amplissimam salam dedu-
xit. In qua Poloniæ Princeps, donec totum tran-
siret gynæcœum, moratus, tandem, comitanti-
bus ipsiis Hispaniæ Grandibus, reliquisque auli-
cis, in conclave, olim Archiducis, nunc siue com-
memorati designatum, descendit. Et sic quidem
festivitati istius diei sitis impositus.

Jam

Jam vero quis honor, quæ reverentia, quis
Varia in respectus, qui ludi, quæ convivia, omnia ad Se-
honorem renissimi Poloniæ Principis gratiam, subsequen-
Principis tibus aliquot diebus, instituta fuerint, nemo fa-
institu-
untar. facile dixerit, scripseritve. Nam & Serenissima In-
fans, eodem, cum Principe, currū vecta, D. Vir-
ginem Lachensem visitavit: & varias variorum,
intercessionem Serenissimi Principis efflagitantium,
prætensiones, in ejus gratiam, omnes absolu-
vit, nihil negavit. Cardinalis Cuova, Nuncius A-
postolicus, Duces, Principes, Comites, Marchio-
nes, Magnatesque terræ, certatim visitavere. Pa-
tres Societatis, cum ipsorum templum visitaret,
erectis arcubus triumphalibus, sparsoque, qua-
iturus erat, per vias gramine, & tragicomædia, de
felicitate hujus mundi, exhibita, præsentiam
ejus honoraverunt. Ad S. Gudulam, tres hostias
miraculosas visitaturus, tanta hominum, utrius-
que sexus, multitudo, ad videndum Principem,
vastissimum alias templum opplevit, quanta in-
tegræ regioni sufficeret. Vix aditus transitusque
Magnatibus ipsis patebat. Multorum autē, ex ni-
mia compressione, vita, plurimorū valetudo sol-
licitata. Apud Illustrissimos Duces, Arschota-
num, Croycium, Bornevillium, Comitem Emb-
densēm, aliosq; Illustrissimos generosissimosque
Domi-

Dominos, balleta, ut vocant, & choreæ, cum Illusterrimis nobilissimisque Domicellis, quotidiana. Convivia vero, sumptu, dapiumq; numero, prorsus regalia. In quibus aliis, ferculapleraque, vexillulis, in quibus Vladislaus Princeps, Osmanum Turcarum Imperatorem, framea conficiens, spectabatur, insignita conspiciebantur. In aliis variorum Principum Magnatumq; sanitates (signum lætitiae interim, pro more Patriæ, facientibus tubis, cultris patenas, pugnis mensam pulsantibus) propinatae. Treverium quoque (locus hic est, Serenissimorum Belgarum Principum voluptati, recreationique destinatus, magnificentia, picturis, situsq; amænitate singularis) per otium visitatum: ut non uno voluptatis genere Princeps afficeretur: sed oculis quoq; & valetate locorum deliciæ quererentur, & nova semper novaq; curiositate, nausea tediumq; deliciarum fugaretur. Quatuordecim dies integras, hæ tractationes, hæ convivia, hi honores, hæ gaudia, hæ choreæ, hæ tripudia, & hisce similia, tenuere. Præterquam quod ludicra alia, hastiludia, spectacula, in honorem omnia Serenissimi Poloniæ Principis instituta, & peracta fuerint.

Decimaquinta tandem, ab adventu die, Vla-
dislaus Princeps, recta ad castra Bredaica profe-

Mechli.
niā profi-
ciscitur.

Cturus, cum jam in procinctu esset, allato de ad-
ventu Mauritii Auriaci Principis, Bredam versus
tendentis, nuncio, ab instituto deflectens, Antuer-
piam iter direxit. Comitabantur Principem, præ-
ter ordinariam Palatii Infantini familiam, hono-
ris gratia, Dux Croycius, Comes Octavius, Comes
Nouelles, aliique Magnates. Per nitidissimam Bra-
banticarum Urbium Mechliniam iter fuit. Hujus
pomerio cum appropinquasset, cives armati, & in
quinq; vexilla distincti, in apertos capos prodiere,
& Poloniæ Principem repetitis bombardarum ex-
plosionibus venerati, ad Palatum Comitum Ho-
oghstratenium comitabantur. Mox Consules Ci-
vitatis Vladislauum salutavere, cujus intercessione,
homicidæ duo, vita donati.

Altera die tantus erat utriusq; sexus, ad Po-
loniæ Principem videndum, confluxus, ut cum
Antuer-
pia ma-
gno cum
bonore
excepitur
22. Sept.
audio in sacello Patrum Societatis Jesu Sacro, pa-
rochiale templum in transitu visitaret, vix ipsi Se-
renissimo Principi aditus, nisi adminiculo præ-
cedentium esset. Cum in Palatio Willebrucensi pram-
edium absolvisset, navem concendit, et, faventi-
bus fluviorum Nymphis, Antuerpiam navigavit.
Magnus, o, tum triumphus, magnum studium,
magnus erga Serenissimum honor Antuerpiensi-
um fuit. Quippe pro curribus & equis, ponte na-
vali

vali Schaldis subjugatus. Cymbis plurimis, navis illa pulcherrima, qua Serenissimus Princeps vebatur, à multis honoratiorum, in honorem, tum etiam summo, ante alios, videndi desiderio & curiositate ductorum, circumnavigata; adeo ut una etiam, quæ tres honoratores cives vebat, nimio festinandi studio inversa, rectorem & Dominos suos, piscibus devorandos, effuderit. Urbi deinde magis magisque appropinquanti, explosione tormentorum, undequaq; mirifice intonantium, Civica castrensisq; lætitia excipiebat. Egradientem navi, Senatus pulcherrimæ totius Orbis, multorum judicio, civitatis, humanissime salutavit. Civium armatorum, in triginta duo vexilla distributorum, nonnulli ante portam, nonnulli in plateis Civitatis dispositi, Poloniæ Principem, & à lateribus, & à tergo, & à fronte concludentes, ad hospitium (quod erat Palatum Domini Simenes, in platea, super Marinam, dicta) comitabantur. Et ne sic quidem honori tanti Principis satisfactū credentes, aliquot deinde horis, domum ipsam & transitu, & tympanis, & explosionibus, & tibiis, laudabili in armis & affectu constantia, salutavere. Tres dies integras, Poloniæ Princeps, lustrandæ Urbi impendit; ita quoque singula scrutatus, ut typographiam, pictorum tapetumq; officinas,

quoq; non dedignaretur. Nihil æque tamen ac ca-
stri inexpugnabilis, Urbisque munimenta: curiæ
operumq; publicorum magnificentiam: D. Virgi-
nis Mariæ picturas, ornamenta, & altissimæ turris
artificium: & templi novi, domus professæ Socie-
tatis Jesu, intus ex marmore & alabastro prorsus
incrustati, picturis, aureis argenteisque ornamen-
tis, statuisque rarissimi, decorem nitoremque col-
laudavit.

Quarta demum die (cum pridie vesperi Co-
mes de Salazar, alias Don Luy de Velasco, Gene-
ralis equitum præfctus, cum duobus millibus e-
quitum, è castris Bredaicis, ad Vladislauum Princi-
pem deducendum venisset) ad Bredaica castra
præfctus est. Cujus adventu cognito, Marchio
^{m castra}
_{Bredaica}
^{venit 26.}
^{Septemb.} Ambrosius Spinola, cum aliis exercitus Primati-
bus, Serenissimo Principi, ad medium milliare,
occurrebat. Henricus Comes Montensis, Locum-
tenens equitum Generalis, tribus millibus equi-
tum, ante ipsa castra dispositis, venientem Polo-
niæ Principem salutabat. Cum ergo tot Heroi-
bus, tot probatissimis belli Ducibus, tot fortissi-
mis & exercitatissimis equitum millibus comita-
tus, castra ipsa ingredieretur, tremuere propu-
gnacula universa, & vicina tellus. Quippe Spinola
jusserat, in honorem Poloniæ Principis, omnes in
circui-

circuitu castrorum machinas, alternantibus longioribus tubis, & schlopetariis omnibus, in obfessos exonerari. Obstupuere, cum factum antea nunquam fuisset, ad insolitæ rei tumultum Bre- danenses, & quis Mars, quæ Bellona, quod præsi- dium subsidiumve novum, in hostilia castra ve- nisset, à viciniorib[us] Hispanorum excubiis, in- terrogavere; occulto quodam Famæ Genio, quo, fortissimum Poloniæ Principem Vladislaum ad- venisse, tam hostes, quam amici, cognoscerent.

Admirabile quoq[ue] hoc, si non penitus omi- nosum. Sub idem tempus, cum castra Poloniæ Princeps ingrederetur, Luna viduata luce à So- le communicata, deliquum pati cœpit: quasi Vladislaum, ad arma iterum castraq[ue] transgres- sum, Turcicæ Lunæ deliquii commonefaceret: aut quod passa ad Tyram, sub Osmano, erat: aut quod, ejus auspiciis, aliquando passura esset, ominaretur. Nec aliter ipse Ambrosius Spinola accepit: & non irrito spiritu dictante prædictus, Serenissimum Principem eum aliquando fore, qui liberæ nationis (cui brevi imperaturus esset) armis nixus, ut Turcicum Sydus æternum defe- stum sui, militaris luminis, scilicet gloriæ & for- tunæ, pateretur, olim effecturus esset.

Sub in-
gressum
ejus Luna
defectus.

*Spinola
directio-
nē exer-
citus in
ipsū trās-
ferit, & ei
ad mensā
inservit.* Quin imo, motus reverentia nominis, fretus fortitudine, virtute, & victoriarum numero Vla- dislai Principis, magnus ille Imperator, ad prēsen- tiam ejus, personam, quam gerebat, exuit, & po- testatem omnem, dispositionem omnem, regi- men & imperium omne, salutem & securitatem totius ob-sidentis exercitus, denique dispositio- nem prōmptionemq; tesserae ipsius militaris, non infeliciter in sinum ejus depositus. Necdum satis. Ubi cœnam Serenissimus Princeps, in ædificio, ex- temporanie quidem, sed commode pro ipso præ- parato, sumpsit, nullus neq; Principum, neq; Co- mitum, neque Marchionum, neq; belli Ducum, accumbere mensæ præsumpsit. Sed Generalis ipse Marchio Ambrosius Spinola, cum Primoribus ca- strorum aliis, una cum Serenissimi famulis, men- sæ inservivit, inde ipse cum aliis comedit.

*Castra
circuire
incipit,
& mira
spinola in
dustria.
27. Sept.* Ut sequens dies illuxit, Spinola nihil potius habuit, quam, cum belli Ducibus aliis, Vladisla- um invisere: immo rogare, dignaretur castra cir- cuire, sub oculis ejus universa esse, & judicio ipsius cuncta submittere. Operum enim suorum specta- torem tantum Principem desiderare, quem cen- forem dudum animo suo destinasset. Annuit Po- loniæ Princeps, jam antea curiosus, celebrata toto Orbe munimēta lustrare. Ut vel rumore cognove- rat

rat Principis voluntatem exercitus, nihil ilico nisi
tubæ & tympana, militum arma induentium fra-
gor, & ad suas promiscue stationes se conferenti-
um strepitus, audiebatur; adeo ut maxima illa i-
stius exercitus moles, quasi momento temporis,
legionibus signisq; distincta; & in unis castris, sed
diversis munitionibus stationibusque, in armis,
quasi pugnatura staret, & nutum Vladislai Prin-
cipis præstolaretur. Et hic quidem castra circuitu
incipiens emetiri, propugnacula singula, singulas
legiones, invisens, tormentorum schlopetorumq;
explosionibus, vexillorum submissionibus, omni-
que exercitio militiæ, disciplinæq; Belgicæ, ubiq;
honorabatur. Accidit autem ut curiosius omnia
lustrans Vladislaus, & bacillo oportunum muni-
tioni extruendæ locum demonstrans, diceret, *Si
propugnaculum hic exstrueretur.* Ad aures Spinolæ
venit: atque cum tantus Princeps, bellique peri-
tissimus, recte censuisse videretur, statim, à di-
gressu ejus, moliri jussit; tanta celeritate, ut se-
quenti die, foralitiū cæteris altius, eodem, quem
monstraverat, loco, Serenissimus Poloniæ Prin-
ceps videret. Cæterum tam vastus erat castrorum
gyrus, ut Princeps ea die, septem horarum spatio,
vix dimidiā partem lustrareret. Et ne hoc quidem
sine periculo. Obsessi quippe in ipsum, & comi-
autoid
tatum

tatum ejus, grandioribus machinis, saepius detonuere; adeo ut carentes globi verticem aliquando, quandoq; frontem prætervolarent. Sed propositi sui tenax Vladislaus, nec ejusmodi bombis inassuetus, tanti non aestimavit, ut vestigio moveretur. Unus autem in stabulum penetrans, unum ex equis Serenissimæ Infantis (quibus Poloniæ Princeps in castra vectus fuerat) occidit, alterum Domini Pacii vulneravit.

*Alteram
mediata-
tē caſtro-
rum cir-
cuit. 28.
Sept.*

Unam noctem Vladislaus Princeps, inter diuidias castrorum partes, interposuit & quievit. Altera enim die mox restantem castrorum partem aggressus est, eodem exercitus, in eundem Principem, obsequio, eadem reverentia, eodem honore. Interim hesterno periculo monitus, cautè & provide omnes, quos reverentia ipsi aut comites, aut pedissequos adjunxerat (ipsorum saluti consulens, ne, turmatim incedentes, periculum globorum incurrerent) à se removit: & sic illum, qui restabat, semicirculum, majori cum securitate, alio septem horarum spatio, feliciter absolvit. Placuit prudentissimo Principi, aestimatissimi, suo ævo, probatissimique Belli Duci, Ambrosii Spinalz, ingenium, prudentia, disciplina: & conatus ipsius egregios, inventa plane Mavortia, & militaria prorsus consilia, collaudavit. Et Marchio Ambrosius

brosius Spinola, inter sua felicia numeravit, tanto
Principi placuisse.

Tertiam diem Poloniæ Princeps, castrorum
commeatui lustrando impendit. Inter reliqua ad- castrorū
commea-
miratione dignissima, ista potissimum videri me- tum lu-
ruerunt, quod octo braxatoriis nunquam quie- strat. 29.
sept.
scentibus, exercitui universo, cervisia coquere-
tur, & tredecim furnis, quotidie, septendecim
millia panes pinserentur. Cæterum Dux Rad-
zivillius, tot tantisque spectaculis, ægritudi-
ne impeditus, interesse non poterat. Pridie
enim quam Serenissimus Poloniæ Princeps, ad ca-
stra Bredaica proficeretur, dolorem in majore
dextri pedis digito senserat, qui in morbum de-
inde abiens, tantas, brevi temporis spatio, vires
sumpsit, ut, Vladislao Principe mane ad castra
Bredaica discedente, non tantum Antuerpiæ re-
manere, sed Bruxellas quoque reverti, coactus
fuerit. Quem in Palatio ægrotantem, Cardinalis
Cuova, Nuncius Apostolicus, Duces, Arschota-
nus & Croycius, Comes Embdensis, & Magnates
alii visitavere. Quin immo & Serenissima Infans
sciscitatum de valetudine misit, & hac ipsa qui-
dem die, qua Serenissimus Vladislauis Princeps
commeatum castrorum lustrabat, qui S. Michaë-
lis erat Bruxellensis Civitatis Patroni, cubiculari-
um misit significatum, ante Infantem ad proce-
Z fionem,

sionem, quæ fieri ea die consuevit, non ituram, quam sciret, quo statu Ducis valetudo esset. Nec ante etiam, quam responso accepto, discessit.

Attamen, ut ad Poloniæ Principem revertamur, hic quarta die, sub ortum Solis, priore Comitis de Salazar comitatu, ex castris Bredaicis,

Antuerpiam versus discessit: quem Marchio Ambrosius Spinola, terna tormentorum, in circuitu

30. Sept. castrorum, explosione, post omnia humanitatis, benevolentia, reverentia, & obsequiorum officia, prosequebatur. Cum Antuerpiam vero ingrederetur, Generali equitum Praefecto Comiti de Salazar, annulum, proprio digito suo detractum, remunerationis ergo donavit. Inde, secunda die,

2. Octob. Bruxellas redit. Ibi eodem, quo prius, honore, reverentia, & magnificentia habitus & tractatus.

vulnus in Una autem eum curandi consolidandi, primo pede curat.

adventu inflicti, in pede vulneris, causa angebar, Itaque, è Medicorum consilio, lectulo sese quietique composuit: quem ipsa Infans Hispaniarum statim invicit. Non ante tamen convaluit, quam die quinta, qua affixus jam lecto hæserat, cucurbitulae applicarentur. Et tam feliciter hoc, ut altera mox, hoc est sexta, die, per cameram obambularet: septima iterum choreis nocturnis, apud Ducem Arschotanum, interesset.

Sed

Sed jam & nausea deliciarum, & cana præ officialibus Hyems, ad viciniores Soli caloriq; Provincias, properandum suasit. Itaque Vladislaus Princeps, per Casparum Nagotium, expensarum suarum Præfectum, omnibus singulisque Infantis Officialibus, præcipuisque aulicis, torques aureas, et, quo frequentior esset memoria sui, cum propria effigie sua distribuit.

Noluit se munificentia vinci, à regio Regij adolescentis animo, Isabella Clara Eugenia Hispaniarum Infans, & mox, sequenti die, dona quoq; Poloniae Principis comitatui detulit. Radzivillio Duci metallum (ut vocant) aureum, pretiosis lapillis & magnitudine præsellens: simile, sed minus, Dominis, Pacio, Zolkevio, Dönhoffio, & Kazanovio. Cæteris Poloniae Principis cubiculariis famulisque, catenæ aureas duplices: Domino Nagotio quoque, & domesticis reliquis, catenæ aureæ datæ.

Inde, cum altera dies choreis, apud Ducem Croycium, esset impensa, tandem 14. Octob: Serenissimæ Infantii valedicens, Bruxellis discessit. Comitabantur, honoris gratia, Serenissimum Poloniæ Principem, præter Serenissimæ Infantis domesticos, Dux Arschotan^o, Dux Croycius, Comes de Noielles, Baro de Buliers, Dominus Olivares su-

premus expensarum Præfectus, aliiq; Magnates
Belgici, totius diei itinere, Nivellam usque: &
nocte illa choreis transacta, soli ex illis, Duces,
Arschotanus & Croycius, mane Bruxellas redie-
re; reliquis, ad ipsos Lutzenburgicos Belgiiq;
fines, ubique occurrentibus excipientibusq; ar-
matis subditis, usque ultimum Hispano-Belgicæ
ditionis pagum, Abbe dictum, perseverantibus.

Ibi cum ab invicem, valedictione peracta,
Metas i- discederetur, Poloniæ Principem, Mediomatri-
gnost lu-ces, sive Metas, & antiquitate, & munitionibus,
strat. & Francisci primi Galliarum Regis expugnatio-
ne: tum etiam Caroli V. Imperatoris irrita ob-
sidione celebres, ex occasione videndi curiositas
invasit. Itaque cæteris Nanceium recta pergen-
tibus, Vladislaus Princeps, cum Radzivillio Du-
ce, Illustrissimis Dominis, Dönhoffio & Kazano-
vio, duobus insuper famulis, illac à via deflectit.
Et per pontem quidem, responso super natione
reddito, transmissus est. Portam ipsam vero in-
gredienti, excubitor sese objiciens, Officialem,
(quem Corporalem illi vocant) accersivit. Qui
etiam, corrugato in Saturninam austерitatem vul-
tu, interrogasset: qui genus, unde domo, quid
negotii, & an litteras alicui deferrent; atque id
responsi retulisset, duos nobiles Polonos & duos

Germa-

Germanos, cum duobus famulis esse, qui curiositate videndæ civitatis Metensis invitati, à reto itinere, quo Nancejum tendebant, descivis-
sent, postero statim die alio se collaturi. Patien-
tia Dominis commendata, prætextuque consen-
sus à Gubernatore petendi, coacta, sono tym-
pani, frequentiore militum manu, custodi-
am portæ auget. Data, paulo post, omnibus in-
trandi copia, dispositi utrinque militum ordines,
defixis obtutibus, veluti aliquid hostile metuen-
tes, quoad possunt, ipsos prosequuntur: assigna-
to è collegis suis uno, qui eos, ad diversorium
parvi Æthiopis, duceret. Vespere quidam è
dictis militibus Kazanovio obviam factus, ab
eodem ad cœnam invitatur. Qui cum super ra-
tione tantæ difficultatis, in intromittendis ipsis
facta, interrogaretur: subfuisse metum respondit,
primo propter colorem baltheorum, qui, quia
ruber erat, pro factione Austriaca habebatur:
deinde propter apparentiam personarum, quæ
Martem spirare, & eminentius quid, quam or-
dinarii militis conditionem, præ se ferre vide-
batur.

Postera die, Iustratum templum, perambu-
lata Civitas, ascensum campanile, & exinde Me-
tis discessum. In itinere occurrenti cuidam viro,

Savernā:
ingredi-
tur 24.
Octob.

à Dn. Dönhoff dictum, Vicegubernatori Metensi ut nuntiaret, Poloniæ Principem in civitate pernoctasse: qui, etsi difficulter, & post longam moram, intromissus fuerit, tamen, superato fastidio, per humana ipsum salute impertire. Vir hic, novitate rei attonitus, facta Principi reverentia, strenuam, in expediendo rei commissæ negotio, pollicetur operam: Quo peracto, per Nancejum, Savernam recta properatum. Antequam vero Savernam ingrederentur, Archidux Leopoldus (qui jam ante, invitatum Poloniæ Principem, aulicum Bruxellas usq; miserat) cum tota aula, armatisq; civibus, obviam processit, et, repetitis tormentorum explosionibus, in civitatem & Palatium suum deduxit.

Cum autem comitatus Vladislai Principis nondum advenisset, altera die, assumpto secum Argento-
ratū ex-
currit.
25. Oct. Archiducis supremo stabili Præfecto, Argentoratum excurrens, quod summopore desiderabat, nemini notus intravit. Qua de re lætus, jucunda cum libertate, Urbem perambulabat. Attamen majoris momenti & rei Argentina erat, quam ut uno vespere perlustraretur: quare & maximam in sequentis diei partem, curiositati impedit. Tum armamentarium toto Orbe celeberrimum: campanile templi majoris, vix aliud par agnoscens;

*Argento-
ratū ex-
currit.*

25. Oct.

scens: organa soni suavitate multum commen-
data: ratum illud arte & magnificentia horolo-
gium: altare insuper majus, mira dexteritate,
à Monacho quodam, olim, & presbytero seculari
sculptum, perlustravit. Quibus visis, flexo ad
pontem Rheno injectum itinere, circuitaq; cur-
ru Urbe, sub noctem, Savernam reversus est.

Inde sequentibus aliquot diebus gratissimæ
conversationi, lætitiae, choreisque datis: visisq;
per otium, Molshemio, Benfelda, Schletstadio,
Brisaco, Ruvachia, & Eisenhemio, civitatibus,
Poloniæ Princeps, antequam primis & cōpiosis
nivibus, Alpiūm valles & juga occuparentur, in
Italiā iter dixerit. Itaque Archiduce Leopoldo
valedicto, per Basileam, Grisones, & Rhetos: per
Soloturnensium, & Lucernensium fines, prope-
ratum; & ipsa Helvetiæ viscera, non sine pericu-
lo, peragrata. Visus, per transitum, locus, olim,
Leopoldici exercitus fusione, nobilitatus. Trans-
missus rate, Flielam usque, Lucernensium lacus,
& notati, ex alto, in littore, loci, in quibus Gui-
lielmus Uraniensis, manus Præsidis & Captivita-
tem evadens, se præcipitem dedit: & areola illa,
in qua moles rebellionis, à tribus illis rusticis,
quotidiano clandestinoque conventu, fabricata.
Insuper & rudera arcis Habsburgensis (fons ille,

*Ab Archi-
duce, Ita-
liam ver-
sus disce-
dit. 6.
Novem.*

ex quo mare gloriæ Austriacæ effusum est) perlustrata. Tandem ad horribilia, Gothardici montis, præcipitia ventum est, & transitus pons ille, qui reliquiis Pontis Infernalis adstructus est. Et, quinq; horarum spatio, superans Carpathiis suis altiora cacumina, Poloniæ Princeps, in apicem summumq; evasit.

*In Italia
venit &
summo
ubiq; ho-
nore ex-
cipitur.*

Et jam pedibus Alpium superiora calcans, subiectam oculis à Septentrione Germaniam, ab Occidente Galliam, à Meridie, quā petebat, Italiā intuebatur: sed mox, prono itinere, pro ut se montium valliumque illarum situs offerebant, in Longobardiam cum suis præceps ferebatur. Tum vero Vladislao Principi, sua ipsius indoles, sua ipsius memoria, & exterarum linguarum à juventute studium, non parum usui venit; cum ipsorum idiomate Italis, non secus ac Italus ipse, Sarmata loqueretur. Itaq; à terræ Magnatibus, non sine insolenti quodam spectaculo, ut incola, quodammodo civesque suscipiebatur, honorabatur, habebatur: qui in Polonia natus, per Germaniam, ab illa terra veniebat. Invitabant ergo certatim varii Principes, Duces, & Marchiones. Sed Poloniæ Princeps, cum illas magni nominis Urbes, Mediolanum, Genuamque, & quæcunq; in iis notabilia incognitus perlustrasset, Romam quoq;

quoq; nemini notus pergere meditabatur. Sed ubiq; eum curiositas hominum fere aperuit, & frequenti ex vicinis Urbibus Oppidisq;, Magnatum juxta ac plebeiorum, concursu, quem sola curiositas videndi eum causaverat, honorabatur. Ita à Parmæ Principe, Mutinæ & Urbini Ducibus, aliisq; generosissimis Viris Dominisq;, tenerrimo passim affectu excipiebatur. Et verbo, ausim affirmare, non alium tunc Italiæ sensum fuisse, cum Poloniæ Principem Vladislauum, Moscoviticis, Turcicis, Tartaricisq; victoriis densus, suscep- ret, quam si denuo triumpharet.

Quod ne medicere tantum aliquis judicet, ipsas Summi Pontificis litteras, Poloniæ Princi-
pi, A summo
Pontifice
Romam
invitat
cum, perlustrata Bononia, & transito Rubicone, Ariminum pervenisset, per Ducem Carolum Ma-
gallotti 10. Decemb: traditas, inspiciamus.

URBANVS. PP. VIII.

Dilectissime in Christo fili noster, Sa-
lutem & Apostolicam benedictionem.

HÆc Patria generis humani, quæ non semel arma-
tos terrarum triumphatores vidit ad Piscatoris
sepulchrum procumbentes, cum jam diu anxiis vo-
tis te vocet, propinqua nunc adventus tui spe sum-
mopere lœtatur. Cum enim in die apud idem Anni Chri-

Aa

stiani

stiani & Sancti Jubilæi solemnitas credentes populos ad
hoc Religionis Sanctuarium convocet; jucundum Cœlo
hominibusque spectaculum fies Polonie Princeps, qui
Regiam juventutem illustribus victorijs Catholicæ
Ecclesiæ commendasti. Excitam illam Aquilonis Ori-
entisque latebris colluviem Turcarum atque Tarta-
rorum, quæ toti Europæ non ita pridem videbatur di-
luvium minitari, Roma scit Poloniæ Principis virtute
compressam, coactamque fuisse salutem meticuloſa pa-
Etione & fugat turpi redimere. Proin cogitare potes-
te hic Urbis amore, & populorum plausu colendum,
ubi fortitudinis tuae tropica, quæ Christianitatis pro-
pugnacula fuerunt, consentientibus nationum tam di-
versarum vocibus celebrantur. Nos vero, qui jam
diu triumphalibus nominis tui laudibus favemus, Apo-
postolici amoris brachiis te complectemur, dec⁹ Septen-
trionis & fidei præsidii. Scito ergo te maxima, ad ven-
tu tuo, Pontificie charitati solatia allaturum, quiccer-
te præsens cognosces, quanti apud nos ij Principes sint,
qui Barbaricam impietatem profligantes, cœlestis re-
gnum in terra propagant. Mensem nostrā uberioris de-
clarabit dilectus filius Carolus Magallottus, custodia-
rum nostrarum Generalis Locumtenens, Barberini
Nepotis nostri Avunculus, & Cardinalis Magallotti
frater, quem nobis charissimum ad te ablegamus, ut
Apostolicas litteras afferens, Paternum desiderium
nostrum,

nostrum, tibi significet. Is autem se nobis morem gessisse
tum arbitrabitur, cū omni officij atque obsequij genere
demereri poterit Patrocinium tanti Principis, cui ad
nos proficisci felix iter precamur, & Apostolicam
benedictionem amantissime impertimur. Datum Ro-
mæ apud S. Petrum, sub Annulo Piscatoris, die 28. No-
vembris, Anno 1624. Pontificatus nostri Anno secundo.

His Pontificiis litteris Poloniæ Princeps Ro-
manam invitatus, per Anconam, & Loretum (ubi ^{venit, &}
reliquias vidit, devotionem absolvit, & votivam ^{ad Ponti-}
S. Wladislai statuam auream obtulit) recta Ro-^{ficem in-}
mam properavit. Cum autem in Castelnovo per-^{tur 20.}
venisset, Cardinalis de Torres, Poloniæ Princi-
pi in occursum venit. Mirum dictu, quanta, in salu-
tatione, jucunditas utrimque eluxerit: gratulan-
tibus sibi mutuo, hanc tantopere desideratam, re-
videndi occasionem. Cæterum, cum Romæ, Po-
loniæ Principem, tot nobilissimis victoriis clarum,
jam in propinquo esse, tota passim Urbe vagare-
tur, & concursus ingens, tantum videndi Princi-
pem curiosorum hominum, nullo turbidi aëris
pluviæq; habito respectu, fieret, Vladislaus Prin-
ceps, clauso curru, ne, ob præsentiam Cardinalis,
agnosceretur, Romam perrexit, Palatumq; Do-
mini Ammerini Caponi, prope portam populi,
commorationi suæ assignatum invectus, mutatis

tantum vestibus, statim ad Palatium Summi Pontificis, à Cardinale de Torres, Summo Pontifici reverentiam facturus, deducebatur. Licet autem Poloniæ Princeps præmoneri curasset, se nullius Cardinalis occursum acceptare velle, tamen cum Summi Pontificis ante cameram veniret, expectantem illic Cardinalem Barberinum, Nepotem Summi Pontificis, offendebat: qui, occurrens Serenissimo Principi, petiit ut sibi ignosceret, quod ordinationem ejus transiliisset: non enim voluntate hoc sua factum, sed mandato Summi Pontificis. Ita Poloniæ Princeps, inter Cardinalem de Torres (cui dextera) & Cardinalem Barberinum (cui sinistra dabatur) medius, in conclave Summi Pontificis introducebatur. Et factis trinis reverentiis (ad quas singulas sua sanctitas, mediocri corporis paululum inclinati è throno sublevatione, respondebat) propius accedens, in genua pro volutus, pedem Summi Pontificis osculabatur. Summus autem Pontifex, arcto complexu sublevati caput ori suo utrinque singulari cum affetu apprimens, eum Sedili ligneo depicto, ad sedendum, à manu sibi dextera invitabat: Cardinalibus de Torres & Barberino, à sinistra, in similibus sedilib' collocatis à longe. Quibus, Vladislao Principe abituriente, surgentibus, Cardinalis Magal lottus

Iottus superveniens, accessit. Sessione durante, tres circiter quadrantes familiari conversationi impendebantur; elucente semper, in Poloniæ Principe, quadam præsentia, libertate, animique magnitudine: qua non tantum existimationis, fama virtutum suarum prænuntia, in animis omniū excitatæ respondebat, sed etiam animum Summi Pontificis mira voluptate perfusum, in spem majorum, pro fide Christi, facinorum erigebat. Expedito hoc colloquio, Dux Radzivillius cum aliis vocatus pedes Summi Pontificis osculabatur: quem, una cum Domino Pacio, Summus Pontifex statim agnovit, memoria notitiæ, Bononiæ (cum illic Legatum ageret) factæ, renovata. Felix quoque ea parte tunc Radzivillius Dux, quod Illusterrimis fratribus suis, Principe Johanne Alberto, & Principe Alexandro Ludovico, Radzivilliis, Romæ inventis, Cardinalibus Magnatibusque, reciproca visitatione, quotidie gratiosum stuporem illideret; cum ex Lithuania tam longe dissipata, in Italia sua Romani, uno tempore, triplex unius Illustrissimæ Domus ornamentum, jugi congratulatione mirarentur. Cæterum ad Poloniæ Principem revertamur. Hic Papali salutatione peracta, ab aliis Cardinalibus extra conclave, à Cardinale autem de Torres, ad hospitium usq; deductus est.

Variatē-
 plā & Pa-
 latia lu-
 strat. Subsequentibus deinde aliquot diebus, à Car-
 dinalibus varie visitatus, summis honoribus affi-
 ciebatur: præsertim cum ipsius Consistorii decre-
 to, primæ ipsi ab omnibus Cardinalibus essent de-
 latæ. Præcipuas quoque Romanæ Urbis Ecclesiæ,
 præsertim Basilicas Petri & Pauli, Mariam Rotun-
 dam, B. Virginem Populicam, S. Stephanum Ro-
 tundum, Aram Cœli, Capellam Pontificiam, ipso
 Pontifice celebrante, pius visitavit. Palatia etiam
 Pontificalia, S. Petri, in monte Quirinali sive Ca-
 vallo, Cardinalis Bentivolii; Capitolium, villam
 Borghesianam, hortos Mattheiorum, & Cardina-
 lis Montali, honorificentissime ubique exceptus,
 perlustravit. Sed & Cæmoniam apertioñis por-
 tæ Sanctæ, ex theatro, è regione ipsius portæ San-
 ctæ, in gratiam ejus exstructo, Christianè spe-
 ctavit.

Denique, relato à Radzivillio Duce exem-
 plo Caroli V. Imperatoris, desiderio videndæ S.
 Veronicae (ad quam accessus nemini nisi S. Petri
 Canonico patet) Poloniæ Princeps accendebatur.
 Sed, cognito ejus desiderio, an in numerum Ca-
 nonicorum adsciscendus esset, in Consistorio agi-
 tatum est. Trepidantibus aliis, aliis tergiversan-
 tibus, aliis etiam an Carolo V. Imperatori Polo-
 niæ Princeps Vladislaus comparandus esset, in du-
 bium

biū vocantibus, Summus Pontifex dixit, Carolo
V. Imperatori, Poloniæ Principem Vladislaum sese
equiparare, sicut omnes eos, qui triginta prælijs Tur-
cam fuderint. Itaque, Pontificis sententia præ-
valente, accepto ad S. Petrum Canonicatus Privi-
legio, Poloniæ Princeps superpelliceum candidum
indutus, à duobus Canoniciis, ad locum, in quo S.
Veronica asservatur, deductus est: & Sacrosan-
ctam Christi faciem hominibus, qui illuc afflu-
rant, prope innumerabilibus, visendam è so-
lito theatro exhibuit, ac, formato cru-
cis signo, benedictionem im-
pertivit.



CA.

CAPVT SECUNDVM.

ARGUMENTUM.

Continuatio Peregrinationis Vladislai IV. & ejus in Poloniam reditus.

SUMMARIUM.

Elapso Anno Domini 1624. Poloniæ Princeps Neapolim proficiscitur, & varijs ibi spectaculis honoratur. Romam reverso ensis bis acutus, & pileus holosericus consecratus à Pontifice illi offertur. Cum Pontifice prandet, & ab eo corporibus SS. Primi & Feliciani donatus, Florentiam proficiscitur. Summo honore à Magno Duce excipitur, & variis solennitatis recreatur. Pisis & Livorno visis, Venetas proficiscitur. Ibi septimanis aliquot regaliter habitus, per Styriam, Viennam, & Nissam, in Poloniam revertitur. Ejus munificentia ubique passim collaudata.

Polonia
Princeps
Roma
Neapo-
limprofi-
ciscitur.
2. Ian:

His omnibus, Anno post Christum natum 1624. peractis, Poloniæ Principi in mentem venit Neapolim quoq; lustrare. Quapropter Anno 1625. 1. Januarij die, per Radzivillium Ducem, felicia novi Anni auspicia lætumque decursum Urbano VIII. Pontifici Maximo apprecatus, sequenti die, lustratis hortis Tyburtinis, Tusculo, & fontibus a- quæ

quæ-ductibusq; Frescatinis, eo profectus est. Cum autē ad primos Regni Neapolitani limites, Fundos pervenisset, ecce Proregis Neapolitani (qui tunc erat Dux Albæ) Commissarius Dominus Johannes Deodati, nomine Proregis, salutatione, & prandio quoque, ante adventum Poloniæ Principis regaliter præparato, excepit. Inde per felices illos Campaniæ agros, qui emollire Annibalem, fortes ejus exercitus, militares, ferreos, durosque Virorum animos olim potuere, Neapolim prope- Neapo-
ratum: quam 8. Jan: die, sub vesperam tandem lim in-
ingressus est. Cujus adventus ubi Proregi inno- trat 8.
tuit, statim ad eum Sellæ gestamine delatus, salu-
tationis officium coram explevit.

Sequenti die miraculū resolutionis sanguinis S. Januarij, quod admoto ej^o capite fieri solet, spectavit: tertia Puteolos, reliquiarū antiquitatis lustrādarum causa profectus est. Unde reversus, à Prorege, ad Palatium ejus iterum se conferente, ad spectacula in crastinum invitabatur. Itaque Poloniae Princeps, maturato sequenti die prandio, cum comitatu suo, ad Palatium Proregis, via secreta per hortum (ut curiositati hominum, ad spectan- Equeſtre
Heroum
certamen
videt.
dum ipsum turmatim accurrentium sese eriperet) vectus, statim ad theatrum, ad spectandos ludos sibi præparatum, sese recepit; ipso Prorege in- 11. Jan:
B b. parte,

parte, theatro Poloniæ Principis proxime subjecta, sub Majestate sessitante. Dato signo Poloniæ Principem advenisse, equites, qui præsentiam ejus exspectabant, præviis tympanis, tibiis, aliisq; instrumentis bellicis, bini & bini, sumptuosissimo, & inadmirabilem magnificentiā composito viorum equorumque ornatu, circum sunt ingressi. Dubium profecto, magisne vestium concinnadarum industria, an ars instruendorum equorum ipsorumque pulchritudo, an vero liberalitas & magnificentia quinquaginta istorum Heroum, in effundendis sumptibus, eorumque dexteritas in equestribus exercitiis laudanda. Ita enim omnia hæc, mirifica prorsus vi, oculos intuentium perstringebant, ut singulis præcellentia deberi videatur. Dum ita suspensi spectantium animi admirationi Pompę illigantur, equites, factis aliquot gyris, velut prælii cujuspam præludiis, in diversas turmas sensim divisi, concursu sagittarum, hostilium in modum formatarum, veterum prælia figurabant. Quo concursu aliquoties iterato, in duas diversas turmas iterum digressi, paululum quievere. Deinde, dato signo, duo ex una turma simul erumpentes, alios duos ex adversa turma in arenam provocaverunt. Vocati in evocantes effusi, iictibus globorum terreorum ipsos petiere, quos hi,

hi, vel clypeo apte objecto, caute declinaverunt, velevitandi imperitia, facie in tergum versa, alia-
ve corporis parte exceperunt. Hac alterna bino-
rum, deinde quaternorum, ex utraque parte, evo-
catione, pugna ad unum continuata. Qua peracta,
hastifragia contra duos rusticos, ad id decem scu-
tatis conductos, armisque præmunitos, exercuere.
Vergente jam die, ludi, specie severitatis Martiæ,
exuti, in placidiores, choreas nempe, conversi:
Hæ, cænante Poloniæ Principe Vladislao in Pro-
regis Palatio (adsidente & ipso, prope Serenissi-
mum Principem, Prorege) cæptæ, in multam de-
inde noctem protractæ sunt. Pro Poloniæ Prin-
cipe Vladislao, locus theatri modo exstructus e-
rat cancellis præmunitus, viaq;, ad eum usque lo-
cum, asseribus testa. Ipse Prorex, in capite aulæ
collocatus, publicum ejus festi se præbuit specta-
torem. Ad saltum neq; vir, neque fœmina, egre-
diebatur, priusquam à choreæ Præside (qui ma-
turus & moribus & ætate vir erat) hâc primum
manu in medium producta, ille alta voce postea
vocaretur. Saltantibus Magister ejus artis adsiste-
bat, ut errores vel exemplo præveniret, vel moni-
tione corrigeret. Peracto saltu, vir fœminam in
medio aulæ relinquebat, quam deinde ad suum
locum Præses ille reducebat. Contigit autem tunc

binas simul saltasse, quarum uni reducendæ dum
Præses ille manum porrigeret, altera, videns solam
se remansuram, ipsum sequebatur, clamitans, ut &
se reduceret: ita Seniculus, in medio duarum ju-
vencularum constitutus, risum omnibus excitavit.

Sequenti die Poloniæ Princeps, pedestri he-
Pedestre eorundem Heroum sternorum Heroum concursu recreandus, iterum
in Palatium Proregis proficiscebatur. Locus spe-
certamen Et acuti erat aula illa, in qua, hesterna nocte, choreæ videt 12. Ian:
ducebantur. Hic Poloniæ Princeps, è regione fœ-
minarum, cancellis itidem tectus, constituebatur.
Ipse Prorex, mediâ, inter fœminas, Majestate (in
qua Angeli effigies, collo adamantes gestantis, mi-
rifice fulgebat) confedit: judicibus ludi, immedia-
te sub theatro Poloniæ Principis, collocatis. Sic
spectatoribus constitutis, Heroes illi bini & bini,
præcedentibus singula paria tympanis quatuor,
tubicinibus aliisque subsequentibus, eorum scu-
tiferis miro vestium armorumque splendore or-
natis, aulam Junonio velut passu ingrediebantur:
levataque in transitu ex humeris hasta Proregem
venerati, in medio aulæ in gyrum congregati ste-
tere. Tunc, factis pugnæ legibus, delectisq; æmulis,
in diversas partes digrediebantur, facta, interjectu
perticæ, partium separatione. Quid porro? Stre-
punt tympana, clangunt tubæ, ardent animi. Sic
clausis

clausis galeis à singulis ex utraq; parte cōcurrsum;
fractisque ternis à quolibet hastis, numeratis de-
inde gladiorum ictibus cominus decertatum.
Judicio de victoria lato, præmium victoriæ [quod
plerumq; annulus erat, à quapiā ex fœminis spe-
ctatricibus subministratus] præambulis tympanis
fistulisque, alicui, quam vīctor nominabat, fœmi-
næ porrigebatur.

Hoc spectaculo Poloniæ Princeps horis ali-
quot recreatus, ad Palatium suum tandem rever-
sus, nocturna quiete, ad iter in crastinum Romā,
se præparavit. Tunc eum, Proregis nomine, i-
dem, qui anteā Iohannes Deodati, Proregis Oe-
conomus, per totam ditionem Neapolitanam,
Fundos iterum comitatus est, & Pontificis Offi-
cialibus, in limitibus Poloniæ Principem honoris
gratia exspectantibus, quasi in manus tradidit.
Ita Poloniæ Princeps iterum, à Domino Carolo
Magalotti, curribus & equis Pontificijs exceptus,
ab eodem rursus Romam, & ad Palatium S. Petri
(ubi toto deinde commorationis tempore hospi-
tium habuit) deductus est.

Tunc inter alia iterum, in honorem Polonię
Principis, cum jam discessum pararet, illud æter-
na memoria dignum. Cum moris sit ut quolibet
Anno Iubilæi, ensis bis acutus, pileusque holose-
fertur.

*Neapolit
discedit.*

13. Ian.

Romam

redit.

17. Ian.

Ensis &

pileus cō-

secratus

illi à Pon-

tifice of-

fertur.

ricus, pelle ermelinorum subductus, benedictione Papali sacratus, cuiquam Christianorum Primum offeratur, hoc quoque favoris genere, munificentiam in multis, erga Poloniæ Printipem, prolixe exercitam, Summus Pontifex cumulare voluit. Itaque, abolito ritu in hac occasione adhiberi hucusque consueto, compositaque, in gratiam Principis, post hac semper usurpanda, Cæmonia nova, in sacello Summi Pontificis interiore, juxta conclave ejus, gladius ille lateri Vladislai Principis à Summo Pontifice applicatus, à Magistro Cæmoniarum cingulo astringitur, ac deinde exsolutus Radzivillio Duci tenendus traditur. Pileus consecratus similiter capiti Principis à sua sanctitate impositus, curæ ejusdem Ducis committitur. Adhibitæ sunt in hoc actu cæmoniae, orationesque, quas hodiernus Pontifex, extensis, ob inconcinnam, quam referebant, ruditatem veteribus, de novo, ut dixi, compositæ.

Cum Pō-
tifice prā-
des,

fe & Poloniæ Princeps Vladislaus, simul pran-
suri, ad aulam prandio delectam se contulerunt.
Pontifici lavanti Princeps Poloniæ, Ordina-
rio Principum Regumque Christianorum more,
mantile genu flexus porrexit. Accumbente
Summo Pontifice ad mensam aliquanto eminen-
tio-

tiorem, sub Majestate, Poloniæ Princeps ad alteram mensam demissiorem, intervalloque sejunctam, ad manum Pontificis aulæque dexteram, sedili ligneo, nulloque tegumento, collocabatur. Rarissimæ hujus solennitatis visendæ cura, multos in Palatium Summi Pontificis pellexerat: & licet pauci intromitti ex singulari gratia viderentur, in eam tamen copiâ excrevere, ut tota aula oppleretur. Bibente Pontifice, omnes genu flexi, in terram procidere: ipse autem Poloniæ Princeps, paululum assurgens, allevato ex capite pileo, potantem venerabatur. Poloniæ Principi à Kazanovio vinum porrectum in simplici vitro, sine orbe, aut quocunque, distillantis ex vitro vini, receptaculo. Frequens inter utrumque, per internuncios, in mensa conversatio. Submissa quoque à Summo Pontifice, ex mensa sua, Poloniæ Principi fercula, in argumentum singularis benevolentia cessere. A prandio, Turcici, Tartarici, Moscoviticique, Regiæ Majestatis Polonicæ, & ipsius Vladislai Principis, triumphi ac laudes, versibus pulcherrimæ harmoniæ subiectis, certante vocum exquisitissimarum instrumentorumq; modulamine, decantatæ.

Quibus dum rapti circumstantium animi, Familia-
velut æmula cælo suavitate, detinentur, ipse Sum-
rins eum
Papa cel-
mus

loquitur, mus Pontifex in cameram proxime huic aulae
& eiva conjunctam, cum Poloniæ Principe Vladislao
ledicit. secedens, portæque adsidens, avocatum aliquan-
 tisper à sensu musicalis voluptatis animum,
 familiarioris cum Poloniæ Principe conver-
 sationis, non facile reddituræ dulcedini appli-
 cabat. Satijs laudum vocumq; admiratione au-
 ribus, Poloniæ Princeps à Summo Pontifice ad
 conclave suum digressus, paulo ante cænam, ei
 valedicturus, rediit. Admissis(dum Serenissimus
 Poloniæ Princeps Pontifici adsidet) ad oscula pe-
 dis omnibus comitatui Serenissimi attinentibus,
 & Poloniæ Princeps, facta gratiarum actione
 humiliq; reverentia, abituriret, Summus Ponti-
 fex caput ejus arctissime complexus, utrinq; vul-
 tu suo, magno cum affectu, ac fere lachrymabun-
 dus, appressit, et, benedictione impertita, dimisit.

Abeunti à Summo Pontifice, à Cardinale
Corpora Barberino oblata sunt corpora Sanctorum Primi
ss. Primi & Feliciani Martyrum, Patronorum diei natalis
& Felici-
ani ei of- Poloniæ Principis Vladislai : particula item
feruntur. ossis S. Sebastiani, pluribus, ad instar rosæ, cir-
 cumsuta gemmis. Radzivillio Duci corp° simili-
 ter S. Argentini donatum. Reliquis singulis da-
 tæ effigies Summi Pontificis aureæ argenteæque
 cum rosariis. Cœna lautissima deinde Vladislaus
 Prin.

Princeps, cum comitatu suo, à Cardinale Barberino, exceptus est: cui etiam Cardinalis de Torres, amplissimi Poloniæ Regni, & illustris Polonicæ nationis protector, interfuit.

Inde Poloniæ Princeps 20. Jan: Roma profectus, ad ipsos Hetruriæ fines, à D. Carolo Magalotti, Summi Pontificis nomine, deducebatur. Invitaverat autem jam antea Vladislauum Principem Magnus Hetruriæ Dux. Ut primum ergo Statum ejus attigit, prope Radicofanum, Don Coloredo cum quadraginta nobilibus: prope S. Ciricum Princeps Don Lorenzo Patruus Magni Ducis: ac ^{A Magno} novissime, prope S. Cassanum, ipse Magnus Dux, ^{Duce Flo-} cum duobus fratribus, Principe Don Carolo, & ^{rentiam} Principe Don Matthia, Poloniæ Principi occurrebat: ^{introdu-} salutatumq; in currum suū excipiens, in Or- ^{citur 26.} fini Palatium deduxit. Præparata erat hic mensa pro Poloniæ Principe separata, cui, multam post instantiam Poloniæ Principis, Magnus Dux, cum Principibus fratribus accubuit. Hinc, præcedentibus via ordinaria famulis, Serenissimi, per hortū Palatii Magni Ducis, Florentiam invehabantur.

Nullibi in Italia tantum lætitiae, chorearum, & spectaculorum. Ut sileam enim pilarum ludum (quem Itali calce, à calcibus quibus pila protrudi solet, vocant) in honorem Poloniæ Principis non

Cc

semel

semel exhibitum: conflictus leonum, ursorum,
A Magno taurorum, aprumque frequentes: equestria de-
Duce va-
rjs spe-
etaculis tum vel, rarissimæ dexteritatis ingeniique Co-
recreatur moedæ, in honorem Poloniae Principis actæ, sin-
gulis prope Scenis, mirifice oculos omnium ani-
mosc; recreaverunt. Et quid refert unam alteram-
ve è pluribus, tanquam ad gustum, lectori quoque
media de proponere? In primis Tragicomœdia, de marty-
S. Ursula
sociarūq; Virginū.
veteris majore exhibita, Scenatum elegantia &

varietate, actorum vocibus & habilitate, vestium
apparatumq; omnium splendore & magnificen-
tia, in stuporem & fixam attentionem spectantium
animos, mira cum jucunditate, composuit. Sru-
penda hic Inferni consultantiumque Dæmonum
repræsentatio: ejus subito in situum Coloniensem
mutatio: Civitatis Colonensis facta veterum mo-
re testudine oppugnatio: Paradyssi artificiosissima
juxta ac jucundissima effiguratio: balletum deniq;
à Nobilibus Curiæ personas Romanorum, Civium-
que Colonensium, de Gauro Hunnorum Rege,
triumphantium, referentibus, exhibitum, oculos
mentesque adsistentium mira voluptate perfudit.

Comœdia
de Ruge-
riali, prope civitatem, Comœdia de Rugero, Al-
ro, Alce-
lomæ

cina, & Melissa, pulcherrimo quoq; apparatu & ^{ne, &} theatro fuit decantata. In prima Scena Neptunus, ^{Melissa.} duobus Hyppopotamis per mare in rupe vectus, comitante Vistula & aliis fluviorum imaginibus, apparuit. In secunda, totum mare in fluctus undasque & scopulos igneos, præstigiis Alcinæ deformatum, circumnatantibus undiquaq; monstris infernalibus & marinis. Inde arbores saltitantes loquentesq; introductæ. Mutato deniq; mari in scopos & saxa, arte Melissæ, repagula Insulæ pandebantur; unde octo virgines egressæ, chorea figurata, lætitiam, è liberatione conceptam, testabantur. Quibus, paulo post, totidem juvenes, theatro deproperantes, saltus alacritatisq; comites sese junxere. Finito hoc saltu, effusisq; è Scenæ loco, in aream conjunctam, spectatoribus, equites viginti quatuor in eandem aream progrediebantur, compositosq; ad numerum & cantum equorum passus, miris prorsus flexibus, in gyros choreales torsere & retorsere; sic ut difficile judicatu fuerit, majorne memoria & industria fuerit in equitibus, an vero dexteritas in ipsis equis.

Deniq; in Palatio Cardinalis, transacto choreis aliquanto tempore, diductisq; theatri velis, ^{Iuvenum,} ^{Virginū-} ^{que spar-} ^{tanarum} ^{certamē} prævio tympano, Duce Marte, egressus Princeps Franciscus, manum Spartanorum iuvenum in arenam deduxit: inter quos Princeps Johannes Caro-

Ius Eques Melitensis primas habuit, selecta juvēnum, ad pugnam exercitatorum, cohorte stipatus. Ex alia theatri parte, Ductrice Pallade, Princeps Leopoldus, copiam virginum Spartanarum produxit, contra juvenes illos hastis certaturam. Ut trīsq; partibus ē regione sibi constitutis, Mars & Pallas, de præcellentia suā quisq; cohortis, versibus musicæ subiectis, in theatro altercantur; ac demum ad periculum virium prælio faciendum devenitur, accensis in pugnam utrorumq; animis. Ministrantur hastæ, librantur brachiorum composita agitatione ictus, concurritur, scite utrimq; decertatur. Fervente conflictu, Cœlum in theatro aperitur, & Jupiter, dato per fulmen signo, silentium indicens, victoriam, publico decreto, virginibus Spartanis attribuit. Recedentibus præliatoribus Diisq;, & amoenissimo Cœli conspectu velis erepto, choreæ denuo inchoatæ.

Hisce similibusq; spectaculis, Poloniæ Princeps, septimanas aliquot varie recreatus, tandem iter suum prosequi decrevit. Sicut enim omnium discedit. aliarum rerum, ita deliciarum quædam quoq; sa-
13. Feb. tietas est: quarum Magnos Principes citius, quam seriorum nausea subit. Itaque Poloniæ Princeps Florentia tandem discessit: sed sic quoq; magnorum Principum illorum humanitatem, benevo-
len-

lentiam, cultumq; non evasit. Quippe Archiducissa, ipse Magnus Hetruriæ Dux, Madama, Princeps Laurentius, aliique Principes, cum tota aula, honoris gratia comitabantur. Et tunc quidem, decem Florentia milliaribus (ut tanti Principis, jugi novitate, animus pasceretur) prandium, sub tentorio, patentibus campis sumptum. Inde Poloniæ Princeps ab Archiducissa, & ipso Magno Duce, in diversam à proposito sententiam tractus, Pisas ^{Pisas in-} prius, Livornum, & mare mediterraneum videre ^{trant 14.} _{Feb.} decrevit. Itaq; sequenti die Pisas intravere. Ibi inter alia, in gratiam Polonię Principis, triremes novæ, tubis, tympanis, tibiis, & solennitatibus aliis, in elementum usui suo conveniens, actæ.

Pisis Livornum profecti, pretiosissima Magni ^{Livorni} _{mare na-} Ducis trireme, quæ Cleopatræ & Antonii Regiam ^{vigates à} puppem, ad molles delicias omnino compactam, ^{triremi-} _{bus Mag-} ornatu & artificio vinceret, ad medium usq; mil- ^{nii Ducis} liare undas secavere. Mox triremes omnes Magni ^{recrean-} Ducis, quotquot in stationibus erant, anchoras le- ^{turnava-} vantates, in occursum navigaverunt, & Serenissi- ^{libus ex-} mos tormentorum explosionibus veneratæ, cun- ^{ccitius.} ctis navalibus exercitiis recreavere. Magnum tunc temporis hoc à Poloniæ Principe, ad solitæ clementiæ famam, & populi, cui olim, liberis omnium votis, imperaturus erat, efficax ad exemplum:

Cc 3 quod

Vladisla^o quod plurima Sarmaticæ Nationis mancipia, ad
 Princeps triremes damnata, sua apud Magnum Ducem in-
 multa Sarmati-
 caman-
 cipial li-
 bertati
 restituit.
 tercessione, pristinæ libertati restituerit. Horum
 à Turcis alij, alij à Tartaris Scythisque in extre-
 mam servitudinem abducti, miserrimæ vitæ tædio
 libertatē præputio emerant; & mox, nefas! Chri-
 stianorum spolijs inhiantes, pyratica opes & divi-
 tias anhelarant. Sed proposito in exitium acti, à
 Magno Duce rursus, expugnatis eorum navigijs,
 ad triremes damnati fuerant, velut in quotidiana
 tormenta mortemq; continuam jussi superesse.
 Nunc autem clementia Serenissimi Polonię Prin-
 cipis, sceleris pœnitentia ducti, libertatem & re-
 ligionem Christianam simul recuperaverunt.

Venetias
 venit &
 variis ibi
 spectacu-
 lis hono-
 ratur.
 Tandem Poloniae Princeps, Archiducissæ,
 Magno Duci, Madamæ, & Laurentio Principi,
 valedictis, per Pisam & Florentiam recta Venetias
 proficiscicebatur. Quas ubi post aliquot dies intra-
 vit, à magnæ Reipublicæ magnis Senatoribus, of-
 ficiosissima oratione exceptus, omni officiorum
 genere honorabatur. Nam & toto commoratio-
 nis tempore, quod aliquot Septimanarum erat,
 Reipublicæ sumptibus, in Donati Palatio, regie
 fuit tractatus: & quicquid Sanctioris aut celebri-
 oris in Urbe, deducentibus Senatoribus, Polonię
 Principi patuit. Comœdiæ deinde, & spectacula
 alia,

alia, in honorem Principis, diebus singulis fuere exhibita. Deniq; & in magno Canali Naumachia, in ejusdem Principis gratiam, fuit instituta. Hanc centeni aliquot Patricii ordinis adolescentes, facta, Senatorio jussu, vestibus pretiosissimis diversiq; coloris partium differentia, exhibuere. Mirum dictu quomodo & ornatus vestium, & juvenum invicem concurrentium docta agilitas, lenocinium mutuum sibi præstiterint. Adeoque & multorum judicio, hoc navale certamen, Nau machiis veterum, Romæ ab Imperatoribus olim exhibitis, & sumptu, & elegantia, & singulari concurrentium juvenum exercitio, fuit æquiparatum.

At jam vere novo redibat paulatim Sarmatiæ
suæ sua quoq; felicitas, & vicina septem <sup>Per Vicin-
nam &
Nissam in
Poloniæ
redit.</sup> Tri-
nibus Regna, Phœbus efficacioribus radiis, in æ-
mulam Longobardiaæ amoenitatem variabat. Ita-
que Poloniæ Princeps, ut Patriis quoque deliciis
frueretur, cum per otium munitiones Palmæ No-
væ lustrasset, Venetæ Reipublicæ valedicens, per
munitissimum in Styria Græcium, Urbem nata-
litiis maternis charam, Viennam rediit. Ibi emer-
gentes è præsentia ejus lætitiae, in orbo ejusdem
Principis, in mæstitiam degeneraverunt. Sed pau-
latim, divina gratia, pristinæ sanitati restitutus,
Imperatoriis, jucunditatem anhelantibus, votis
fatis-

satisfecit. Novissime, in negotio Principis Caroli Ferdinandi Fratris sui, Nissam profectus, Episcopatum Vratislaviensem Serenissimo Fratri, & optatum peregrinationis suæ fructum, usum & experientiam, ad Serenissimos Parentes in Polonię retulit.

Et hic est, humanissime Lector, famosissimæ hujus peregrinationis finis; cuius ego rarissimas solennitates, omniam horum ubique frequentiam, omnes non attigi. Fateor enim ingenue, me ad honorum, Polonię Principi Vladislao passim exhibitorum, varietatem & eminentiam, *Fjus mu-*
nificentia
ubiqz, sin-
gularis. calamo styloque, non potuisse assurgere. Hoc unum ergo dixisse sufficiat, & viribus meis fuisse majores, & Principum, Urbiumque magnarum, sumptibus fere fuisse tractatum. Ea autem, vice versa, Regii Principis Vladislai ubique munificentia fuit, ut cum ad sumptus plurima, in excipiendo Principe, Duces, Magnates, Urbesque impendissent, plura tamen ipse donarit. Quin immo & authorem omni fide dignorem habeo, diversis in hac peregrinatione occasionibus, ut liberalitatem & magnificentiam suam ostenderet, à Polonię Principe Vladislao, ad centum quinquaginta millia, fuisse donata. Et recte hoc ad con-

Sen. de
Vitacea-
ta.

filium Sapientis Latini. In divitiis & temperantia,

& liberalitas, diligentia, dispositio, & ma-

gnificentia campum habeat

patentem.

FINIS PARTIS PRIMÆ.



